

東
華
續
錄

光緒二百十三

臣朱壽朋敬編

臣張毓英恭校

十二月戊午朔諭朕欽奉 慈禧端佑康頤昭豫莊誠壽恭欽獻崇熙皇太后懿旨禮部奏元旦禮儀一摺元旦令節皇帝率王公百官著在皇極殿行禮停止筵宴其在外公主福晉命婦均著進內行禮○已未諭軍機大臣等國家設官各定名稱督撫奏事亦有程式此次馮煦陳奏夾片連用朱臬司毓道字樣殊屬非是著傳旨申飭○辛酉度支部奏查本年四月據前任兩廣總督岑春煊奏鹽務可籌鉅款擬派員出洋調查稅場收稅之法酌量仿辦一摺奉 旨飭該部知道欽此由軍機處鈔交到部當經臣部遴派員外郎唐瑞銅郎中范紹霖隨帶緝譯前往印度調查鹽務就場收稅辦法於五月初五日奏明在案現在該員等調查事竣回京繕具節略稟覆前來臣等詳加察核印度鹽務就場收稅一稅之後任其所之誠為良法而考其本末則與現在中國鹽務情形不同實有礙難仿行者印度有客鹽有土鹽客鹽來自英法等國均於進口時扼要而權之土鹽約分數種曰池鹽曰井鹽曰石鹽皆產於北印度之陸地曰煮鹽則產於緬甸之海濱曰晒鹽則產於孟買及馬特來斯之海濱其鹽場均屬團聚而不散漫故稅場

收稅而場鹽皆可其範圍中國雖祇有池鹽井鹽海鹽而鹽場之團聚者則惟山西四川等處之池鹽井鹽而已其餘海濱所產之煮鹽晒鹽則北起奉天南迄廣東袤萬有餘里鹽場每苦散漫而不團聚故就場收稅而場鹽亦難免偷漏其不同者一印度之鹽屢次減稅稅減則私販自無大利可圖故就場收稅法簡而私販轉少中國之鹽屢次加價價加則私販均有大利可獲故就場收稅稅減而私販必多其不同者二印度運鹽無定商銷鹽無定地歲徵鹽課並無定額故辦理就場收稅毫無牽制中國運鹽有定商銷鹽有定地歲徵鹽課且有定額故改行就場收稅則多隔閡其不同者三觀此三者之不同而印度鹽務之可以就場收稅中國鹽務之難以就場收稅亦已顯而易見若不揣其本而齊其末誠恐未收其利而先受其害且鹽務之就場收稅中國亦當議之而不行或行之而不效矣溯自道光年間兩淮鹽務疲敝諸臣建言就場收稅或以劉晏之鹽法爲師或以雲南之鹽井爲證經戶部尙書王鼎侍郎寶興兩江總督陶澍等先後議覆以爲時勢不同地方不同礙難仿辦事遂中止其後咸豐年間淮南試辦就場收稅毫無成效王鼎等所言果驗此則前車之轍尤不能不引以爲鑒者也臣等公同商酌竊以爲中國鹽務如欲仿照印度辦法改爲就場收稅一稅之後任其所之則必破除引界免去課額而後可而紛更太甚關繫綦重實未敢輕爲嘗試應請毋庸置議中國鹽務無論綱法票法緝私均有成規凡所爲

杜場私禁商私除土私絕鄰私著違之則載於鹽志近之則見於各鹽政之奏牘莫不標本並治綱目備舉果能實力奉行自可私銷漸減官課漸增擬請 旨飭下各該鹽政各就該處情形詳細體察認真整頓務使鹽務日有起色以肅鹺綱而裕課款得 旨如所議行○壬戌 上詣 壽皇殿行禮○癸亥予進士館游學畢業學員楊兆麟等獎勵有差○以周彪爲雲南鶴麗鎮總兵○諭軍機大臣等程德全電奏燕前據奏請飭催東北邊防經費著該部知道又請撥解巡防兵餉業經降旨飭度支部議奏茲據電奏東北邊防緊要待款接濟著度支部將東北邊防經費暨巡防兵餉迅即分別飭催籌撥等因度支部奏明自明年起再由部加撥防餉銀十萬兩報聞○甲子沈家本等奏九月初三日奉 上諭朕奉 慈禧端佑康頤昭豫莊誠壽恭欽獻崇熙皇太后懿旨禮教爲風化所關刑律爲紀綱所係滿漢沿襲舊俗如服官守制以及刑罰輕重間有參差殊不足以昭畫一除宗室本有定制外禮部暨修訂法律大臣議定滿漢通行禮制刑律請旨施行俾率土之臣民咸知遵守用彰畫一同風之治欽此跪聆之下仰見 皇太后 皇上覆載無偏一視同仁之至意欽佩莫名除通行禮制應由禮部議定具奏外竊維率土之濱莫非王臣自來帝王御宇未有歧視臣民者我 朝入關之初八旗刑制視漢人有不同者原以八旗戶口未臻蕃盛丁壯俱隸軍籍若犯罪概照民人竄發軍伍卽虞缺額差務亦因之稽延故將前明軍人犯

罪免徒流之律改爲旗人犯罪免發遣之條凡滿洲蒙古漢軍犯該徒流軍遣分別改折枷號不與漢人一例實發其時盛京所招民人有犯徒流等罪亦照旗下分別枷號可見折枷之制全爲軍伍差務起見初非歧視旗民也且當時約束旗人較民人尤爲嚴肅一賭博也而旗人獨擬絞候一秋審也而旗人概擬情實嘉慶以後始將此等例文刪除與民人一體辦理然未刪之例如喫酒行兇卽行送部發遣金刃傷人卽永不准食糧如此之類皆旗人治罪之重於民人者史可見旗人治罪舊律世俗以爲優待旗人者皆未識定律之本意也乾隆年間疊次纂定旗人不准折枷各例道光五年復分別情節輕重凡不在寬廉鮮恥之列者准其折枷如係不顧行止有玷旗籍者俱照民人一體實發纂爲通例蓋凡身隸旗籍者人人有軍人之責任卽人人當有軍人之資格一經有玷旗籍卽銷除旗檔永遠不准挑差在東西各國之剝奪公權有軍籍資格一項頗與此例之意嚮相符合自此例頒行以後旗人犯罪之與民人一體辦理者日見其多與從前情形已不相同此由生齒日繁人類卽難一致法令與人情風俗互爲消息自不得墨守成規況乾隆十二年有八旗漢軍准改民籍之例道光五年又有八旗滿洲蒙古准改民籍之例是化除畛域早示端倪方今中外交通法律思想日趨新異儼仍執舊律劃分滿漢之界不惟啟外人輕視之心尤與立憲前途諸多阻礙臣等於現行律例詳加查考其滿漢歧異之處同一決意用刑而

民人用笞用杖旗人獨用鞭責同一發遣定地而民人應發雲貴兩廣新疆者旗人則發黑龍江寧古塔等處其他旗人犯罪或較民人爲輕或較民人爲重者相歧之處尙多誠如 聖諭不足以昭畫一雖定例之初原各有因時制宜之道但綱紀所繫若仍彼此殊異不足以化彫域而示大公平等公同商酌凡律例之有關罪名者固應改歸一律卽無關罪名而辦法不同者亦應量爲變通除笞杖已改罰金旗人鞭責業經一體辦理外擬請嗣後旗人犯罪但照民人各本律本例科斷概歸各級審判廳審理所有現行律例中旗人折枷各制並滿漢罪名畸輕畸重及辦法殊異之處應刪除者刪除應修改者修改應修改者修改應修併者修併共計五十條開列清單恭呈 御覽如蒙 俞允卽由 臣等通行內外問刑衙門一體遵行庶法樞歸於統一足以彰 聖主同仁之治而憲政立有根基亦可冀萬年不拔之業矣再在外蒙古案件應按蒙古例問擬者事隸理藩部此時未便遽議更張應仍照舊章辦理合併聲明得有如所議行○予故安徽巡撫恩銘於安徽省城建祠○乙丑諭軍機大臣等郵傳部參議蔡乃煌奏江浙人心思動恐長亂酌擬請先事預防一摺著端方陳啟泰馮汝驥嚴密防範勿稍疏虞並著趙爾巽體察情形妥酌辦理原摺著鈔給閱看將此諭令知之○端方陳啟泰電致軍機處查蘇浙交界地方烏匪黨羽甚衆出沒靡常迭飭水陸各營認真偵緝昨據統領浙西鹽捕等營江南提督劉光才電稱游擊孔

德陞張普沾等巡至青浦之朱家井探報匪黨三百餘人在河頭三灣等處率隊奮擊斃匪數名陣亡勇丁一名餘匪由西竄逃當卽電飭迅速跟蹤追剿期絕根株頃據浙撫馮汝駁復電海甯海鹽桐鄉等處匪徒滋事情形甚重並毀教堂學堂而近省之硤石鎮匪黨合衆省防緊喫兵力不敷請派兵來嘉興駐紮會剿等語查浙省嘉湖等處多與蘇屬毗連現既匪勢披猖亟應不分畛域合力剿辦以免蔓延現已飭派三十六標第二營管帶何正修率領所部一營刻日開拔馳赴嘉興並派參謀處提調曾通辦理後路轉運接濟事宜兼可幫同布置一切與浙省各軍和衷會商分投剿辦仍由馮撫就近隨時指示俾協機宜一面電飭蘇省沿邊文武及水陸各營扼要嚴密巡防以杜匪徒竄越滋擾期副 朝廷綏靖地方之至意所有浙匪猖獗派兵會剿緣由謹請代奏 上諭軍機大臣等端方陳啟泰電奏悉鑒捕營遇匪三百餘人而斃匪不過數名足見該營隊並未奮力擊剿著傳知提督劉光才督率所部認真剿捕務將此股迅卽撲滅倘涉蔓延定惟該提督是問浙境海甯等處匪情甚重並毀教堂學堂省防亦見喫緊何以馮汝駁尙未奏報殊不可解著馮汝駁查明情形迅卽電奏一面嚴飭所屬文武實力剿捕並嚴密保護各教堂人命財產勿稍疏虞現既匪勢披猖要在不分畛域合力剿辦並著端方多備營隊以資接應並遣派兵輪在浙境海面梭巡稽查勿使外匪接濟軍火期可早日肅清○以肅元濟創辦機器造紙公

司賞給正二品封典○丙寅以陳啟泰爲江蘇巡撫瑞澂爲江蘇布政使胡建樞爲山東按察使○諭軍機大臣等有人奏廣東北海鎮總兵李準昧良溺職請飭查辦等語著張人駿按照所參各節秉公確切查明據實具奏毋稍徇隱原片著鈔給閱看將此諭令知之○丁卯諭軍機大臣等有人奏四川江津縣知縣龔寶琨等貪劣擾民等語著趙爾豐按照所參各節確切查明據實具奏毋稍徇隱原片著鈔給閱看將此諭令知之○諭已革陝西布政使樊增祥著開復革職處分○命甘肅提督姜桂題統兵十二營馳赴浙江辦理剿撫匪事宜○張之洞等奏本年二月十六日准軍機處交片稱軍機大臣面奉 諭旨都察院代遞直隸江蘇山東三省京官以津鎮鐵路籌款自行建築呈請代奏一摺著袁世凱張之洞妥商辦理欽此欽遵照錄原奏鈔交到 臣當經 臣等往返籌商將大概辦法於四月十七日合詞電奏並請派梁敦彥會同籌議相機與德英商論奉 旨允准在案查天津至鎮江鐵路經總理衙門會同礦務局於光緒二十四年十月間奏准特派大員自立公司向英德兩國銀行商訂借款督飭妥辦旋由督辦鐵路大臣與英德兩國銀行訂立借款草合同三十五條於光緒二十五年四月十三日具奏奉 旨依議欽此草合同內載由天津至嶧縣爲北段由嶧縣至鎮江爲南段共長一千八百餘里約借英金七百萬鎊合市價五千六十餘萬兩九扣交付周年五釐起息以五十年爲期借款未清還以前道路及

行車一切事宜由該銀行代爲調度經理每段設立總局一處所設各總局派華洋員共五人又派委銀行代辦一員洋總辦一員總工程司一員所有出入款項歸總局管理每年所餘款項先提十分之二歸銀行等作爲酬勞次提十分之一作爲公積交兩銀行存儲各等語當經總理衙門恭錄 諭旨照會英德兩國使臣查照立案道光緒二十八年七月間外務部奏請特派督辦大臣與德英銀行議訂津鎮鐵路正合同奉 硃批著派袁世凱爲督辦大臣欽此 世凱遵卽札委唐紹儀梁如浩會同德英銀行所派洋員議訂一切旋因德員柯達士呈送北段合同底稿載借款英金八百萬鎊核與原議不符又以德使添索接造枝路二道一由德州至正定一由兗州至開封爲原議所無且因南北兩段不能同時合議以致旋議旋輟雖經陸續磋商迄難就範此歷年籌辦津鎮鐵路借款之大概情形也該三省京官以英德使臣催訂正約甚急聯銜呈請准由紳商籌款建築情辭迫切自係爲保全商民生計起見惟此項草合同業經奏奉 諭旨允准斷難議廢且准外務部電稱德英兩使迭次來署催逼路事謂成約具在磋商已有進步乃遽改易辦法實於兩國邦交大有妨礙特代本國政府詰問等語似此據約力爭誠非空言所能抵禦只能相機設法改正 臣敦彥奉 命會同籌議迎卽與德華銀行代表柯達士中英公司代表漢蘭德竭力磋磨 臣之洞 臣世凱隨時與 臣敦彥電商機宜五月內柯達士復親至武昌催促訂約經

臣之洞與之詳商兩次手書要義十五條付之力言斷不能踰此範圍臣敦彥與該公司等爭持五越月會晤數十次始與議定將借款辦路分爲二事另指的款作押給以現利抵換將來二成餘利及購料行用使兩公司不能藉口干預路權此項的款祇作擔保之用並非實在動撥將來還本還利仍取給於鐵路進款惟既指款作押自以籌定的款爲最要關鍵當由外務部與三省督撫等往復電商經各該省允認常年抵款直隸省釐稅一百二十萬兩山東省釐稅一百六十萬兩江甯省釐稅九十萬兩江蘇省釐稅十萬兩合計銀三百八十萬兩約符借款抵押之數該銀行等均無異說臣等復以津鎮鐵路既不日可成所有膠澳條約第二端第一款所載各路總應均包括在內一併歸入津鎮官路辦理由外務部照會德國使臣旋准該使臣覆到節略內稱德國政府願津鎮路約畫押後即行開議甲德國允一由膠澳至沂州府一段仍作爲津鎮枝路歸入官路二由濟南府往山東界之一道包入津鎮官路乙中國允由德州至正定府及由兗州府或幹路中之他處過濟甯州至開封府兩枝路於十五年內由中國自行籌辦倘用洋款須向德華公司商借等語是德使於從前所爭造各枝路亦大有讓步自可照此定議現由臣敦彥與該銀行等改訂借款合同二十四條名爲中國國家天津浦口鐵路五釐利息借款係英金五百萬鎊以三十年爲期十年後全數清還每百鎊加還一鎊半二十年後無須加價初次價票三百萬鎊

虛數九三折納於初次售票時提留二十萬鎊以代餘利所造之路仍分南北段約二千一百七十里勘量路線由督辦大臣核辦約計四年造竣於合同畫押後不得延至六箇月外建造工程以及管理一切之權全歸中國國家辦理聘用德英兩總工程司合同由督辦大臣自行獨訂臣之洞臣世凱逐條核訂竊以該合同內所載辦法確能於造路借款劃分兩事不特主權利權均無損失於原訂之草合同多所補救即凡興工用人購料以及提款還款各事宜均操之在己毫不授人以柄較之他項路約實爲周密復經臣等將此項合同轉商之外務部王大臣詳細校閱亦意見相同均無異議謹具合同清單恭呈御覽俟奉 旨允准再行簽押即由臣等知照外務部照會英德兩國使臣飭令該銀行等按照合同妥速辦理並一面由外務部分別行知度支部郵傳部暨各該省督撫等查照定議至一切枝路辦法仍由外務部按照德使前送節略與該使妥爲商定俾臻完善得 旨如所議行○戊辰諭軍機大臣等有人奏浙西烏盜充斥地方官吏養癰貽患請旨懲處一摺著馮汝驤按照所參各節確切查明據實具奏毋稍徇隱原摺著鈔給閱看將此諭令知之○己巳憲政編查館奏本年九月二十八日奉 上諭修明內政吏治爲先親民之官莫如守令若地方官盡得其人實心任事何利不舉何弊不除近來捐納保舉流品冗濫以候補人員爲尤甚迭經降旨飭令各省督撫於各員到省時考試甄別乃十數年來分發選

缺到省各員經督撫考驗黜革開缺及咨回原省者甚不多觀一味虛應故事濫容闕冗是並無揚清激濁之誠殊屬不成事體著憲政編查館會同吏部詳定切實考驗外官章程請旨飭下各省督撫將所屬地方候補選缺到省各人員認真考驗嚴定去留並條列實跡咨報吏部查核以清仕途而端治本欽此竊維考試甄別定例非不詳明乃因習視爲具文遂致廢收夫實效茲復恭奉 諭旨飭令詳定切實考驗章程等因查古今考課之法不外考言詢事兩端考試第試之以言而考驗必驗之以事至於舉行甄別則必待試驗之俱實而後徵舉効之非虛方今捐納保舉兩項人員自道府以至佐雜分發各省日形擁擠流品蕪雜賢否不齊向來考試甄別雖有停委降補回籍休致各條而日久奉行不力誠有如聖諭所謂一味虛應故事不成事體者必欲求切實考驗之法非將原定例章合併變通另訂章程無以清仕途而肅吏治等前次議覆御史趙炳麟捐納變通辦法業經聲明捐保人員概令入法政學堂肄習又臣館於奏陳考核上年州縣事實清冊摺內另擬勸懲辦法皆爲實事求是起見茲謹酌照新章參合舊例擬定切實考驗外官章程六條謹繕清單恭呈 御覽如蒙 俞允當卽通行遵辦抑臣等更有請者前代考課民吏有以身得言精判校於未選之先者有以才守政學實舉於任職之後者其始法非不密而其後卒患乏才臣等所擬章程皆審度情勢所能行不敢稍鄰於苛細而遵循之實則在疆臣經

曰徒法不能以自行此則臣等凡有用人者之責尤願與疆臣共勉之者也得旨如所議行○庚午諭
張人駿奏勦辦廉欽股匪迭獲大勝出力文武員弁請獎一摺本年廣東廉欽兩屬土匪滋事勾結亂黨
互相聯合意圖上竄南寧牽動兩省全局蓄謀甚狡經該督派令郭人漳等攻復三那防城搜勦欽西那
棉屯等處一役苦戰十餘日尤屬異常出力在事各員弁自應量予獎勵已革陝西補用道郭人漳著開
復原官銜翎留粵補用並免繳捐復銀兩江蘇補用同知黃體明著免補同知以知府仍留原省補用通
判職銜馬鏞桂同知職銜林緯邦楊尊任通判職銜楊祖時均著以通判分省補用州判職銜黃業興著
以州判不論雙單月遇缺儘先選用副將銜補缺後副將已革參將王有宏著開復原官原銜升階留粵
補用並免繳捐復銀兩隨營官郭毅著以從九品不論雙單月儘先選用補用守備馬文富著免補守備
以都司儘先補用千總曹玉光把總張國臣曾雄張世益均著免補千總以守備儘先補用以示鼓勵餘
著照所議辦理該部知道○民政部法部奏報館之設原以開通風氣提倡公論為主其言論所及動輒
政治風俗相關東西各國主持報務大都為政界知名之士而政府亦復重視報紙藉以覘衆意之所歸
惟是言論過於自由則又不能無越檢踰閑之弊故各國皆有新聞條例之設用以維持正議防制訛言
使輿論既有所發揮而民聽亦無從淆惑意主善也中國報界萌芽伊始京外各報漸次增設其間議論

公平宗旨純正者固自不乏而發行既多即不免是非雜出若不詳定條規申明約束深恐啟發民智之樞機或為藉端牟利惑世誣民者所波累而正當之報紙轉不足取信於士民臣部前於光緒三十三年七月二十八日將報館暫定條規繕單具奏當經聲明報律現正會同改訂一俟編纂就緒即請奏定頒行等語欽奉 諭旨允准在案查此項報律先經原設商部擬具草案由原設巡警部酌為修改共成四十六條當以事關法律非詳加討論不易通行且以京外報館由洋商開設者十居六七即華商所開各報亦往往有外人主持其間若編訂報律而不預定施行之法俾各館一體遵循誠恐將來辦理紛歧轉多窒礙迭經咨商外務部體察情形妥為核復旋擬稱各項法律正在修訂之際尚未悉臻完善若將此項報律速為訂定一時恐難通行似應暫從緩議等因用是審慎遲迴未敢率行定議嗣經中外臣工先後條陳催促仰蒙 訓示飭令妥訂施行臣等亦以報章流弊漸滋不可不亟為防範之計故先將該律草案摘要刪繁擬成暫行條規奏明試辦一面復調查各國通例參照內地情形就原案四十六條斟酌再三稿成屢易現經奉 旨飭令迅速妥訂毋再延緩自應欽遵辦理臣等書臣鴻慈於會議政務期間面與外務部堂官悉心籌議參考中西務期寬嚴得中放之皆準以為推行盡利之地並經外務部將英使譯送香港新定報律各款於十一月二十五日鈔送查閱臣等查該律內稱無論何項人等凡在香港

港境內刷印售賣或分送各項報章書籍及一切報告說帖其宗旨在搖惑中國人心釀成變亂或使人
民因此犯罪於中國者得處二年以下之監禁或五百元以下之罰金等語擬請現定各款亦大略相仿
無甚參差將來頒布施行縱令有意外之交涉亦可援引比照以爲杜絕徇庇之計節經反覆討論意見
相同謹將改定草案四十二條繕具清單恭呈 御覽擬請 飭下憲政編查館照章考核請 旨欽定
頒行一體遵守庶幾甲令所布不致成爲具文而一切邪說橫議乃不禁而自止矣得 旨如所議行○
辛未度支部奏撥通州天生港口岸修築通船碼頭各工程用款擬在江海關常稅項下撥還商墊允之
○壬申以陸榮廷爲廣西右江鎮總兵○調緩湖北松滋等屬州縣錢糧○癸酉張鳴岐電致軍機處邊
事方亟請才至殷查丁憂太平思順道莊蘊寬才識開通心精力果邊防情形尤爲熟悉擬懇 天恩飭
兩江總督江蘇巡撫轉飭莊蘊寬迅速來桂以資臂助前准陸軍部電令就地編練新軍岐擬暫駐南寧
將編練事宜妥爲籌辦俟稍有頭緒再赴龍州巡閱乞代奏 上諭軍機大臣等張鳴岐電奏悉著端方
陳啟泰轉飭莊蘊寬迅赴廣西以供差遣現邊防正在喫緊編練新軍非一時所能就緒仍著馳赴龍州
巡閱布置俟邊防粗定再將編練事宜妥爲籌辦○甲戌命景星德廉三丁振鐸曹鴻勛陸元鼎協理開
辦資政院事務○諭軍機大臣等有人奏奉天巡警總局總辦候補道朱慶瀾等貪詐騷擾吞蝕民款一

摺又片奏昌圖府通江口新設治河防廳署同知程學恂苛斂商民等語著徐世昌按照所奏各節確切查明據實覆奏毋稍徇隱原摺片著鈔給閱看○乙亥諭尙書呂海寰著派充督辦津浦鐵路大臣並著直隸江蘇山東督撫會同辦理○諭軍機大臣等瑞良電奏悉著賞假一箇月回京省視無庸開缺江西巡撫著沈瑜慶暫行護理○諭軍機大臣等綽哈布趙爾巽等電奏悉朝廷因旗民困苦特爲廣籌生計乃竟有不肖之徒藉端煽惑糾眾鬧堂惡習殊爲自外生成著該將軍等查明爲首滋事造謠煽動之人從嚴懲辦並將約束不嚴之協佐各官分別查究勿稍姑息○諭那桐著派充督辦稅務大臣呂海寰毋庸會辦○丙子諭軍機大臣等陸徵祥電奏悉著再賞假兩箇月假滿後迅卽來京無庸開去差使○瑞良奏贛南一帶亂事初平自以安集人心緝拿逸匪爲要議現在陸軍尙駐南安未便遽行遣撤仍由奴才嚴飭各員弁切實搜查務使盡絕根株以弭後患惟贛州南安寧都三屬幅輳遼闊俗悍風強原有巡防隊六營分途駐紮本慮其單今爲長治久安之計非厚加兵力不足以資鎮懾奴才現擬將此次派去協剿之巡防各軍於將來大隊拔撤時酌留一營長駐贛州城內以備隨時調遣庶不致彼此牽掣有誤事機至善後清鄉事宜經署臬司江毓昌節節查辦安定章程督飭營縣勸導士紳編查保甲大致業已就緒該署司現仍駐紮南安已由奴才電飭再委得力員弁詳細搜查務期匪淨民安仰副 朝廷綏靖

嚴疆之至意得 旨著卽認真整頓期收實效○端方與爾巽陳啟泰馮汝駁電致軍機處竊蘇浙交界地方島匪肆擾經方派營剿捕浙省之桐鄉海甯等處鄉民借口災荒聚眾鬧漕經嚴彈壓解散均經先後奏報在案旋承准軍機大臣字寄奉 上諭郵傳部左參議蔡乃煌奏江浙人心思動恐長亂萌請先事預防一摺著端方陳啟泰馮汝駁嚴密防範勿稍疏虞並著爾巽體察情形妥酌辦理等因欽此正在籌商布置會同奏報聞奉 旨昨已派姜桂題統率十二營限半月內開拔馳往浙江會同江浙督撫辦理剿撫事宜又奉 旨浙省爲海防重地向多窺伺而土匪鹽島久已充斥必須有重兵鎮懾切實搜捕務絕根株一律肅清不得因匪暫竄遂生鬆懈其沿海要害亦宜相度形勢依次布置統俟姜桂題到防會同妥籌辦理各等因欽此復經往返電商悉心籌酌伏查蘇浙兩省島匪卽蔡乃煌摺內所稱浙西之青紅幫匪太湖之鹽販蘇松一帶之青皮光蛋平日以販私開賭爲生與民雜處特眾橫行有時強借強索有時擄人勒贖有時白晝搶劫官兵往拿兵少則拒捕兵多則竄逸其窟穴多在太湖附近支河汶港之間聚則爲匪散則爲民與大股巨寇攻城掠地抗敵叛逆者情形迥不相同辦理之法必須力捕以擒其渠竊搜以搗其穴游擊以摧其鋒兜拿以防其逸尤必力辦清鄉以澄盜源舉行鄉團以固民氣尤在慎選牧令以清吏治乃足以收鋤莠安良之效實係緝捕之事而非戰陣之事其責成應注重

地方吏治而以兵力輔之非若戡定叛亂全仗兵威姜桂題一軍拱衛京師有同禁旅若此等小醜遽勞京兵疆吏既無以自安且蘇松嘉湖一帶全屬水鄉港汊紛歧不容馬足北軍亦不相宜至浙省鄉民開荒乃地方官失於撫綏所致與梟匪係屬兩事現已解散正在查拿首要較輯良營吏不宜令其攪擾若京師驟發大兵誠恐民心惶惑轉致脅動洋言方等公同商酌擬請將江浙梟匪一事責成方會同泰順等專辦剿撫力任其難一面續派江南軍隊赴浙與前派之軍合力防剿一面仍遵前 旨酌調鄂軍一二標前來互相援應以厚兵力江鄂兩軍於南方地勢較為合宜仍飭兩省原駐之巡防隊緝捕營水師營暨捕營飛划營各軍專主掩捕連原有之軍已逾三十營布置得法足備搜拿剿辦之用卽或兵力稍有不足湖北軍隊尙可隨時續調長江一水兵輪便捷赴機亦甚迅速設再不敷量辛酉一軍本係長江游擊之師亦可調往足資應援其姜桂題一軍應請暫緩出發至浙省海防極關重要象山灣議作軍港亦宜預備布設酌駐重兵應由方駿等遵 旨於沿海要害相度形勢悉心往復籌商再行奏明請 旨定奪惟梟匪出沒於江浙兩省交界之區且匪多皖產江浙剿辦緊急則竄回皖境事關隔省呼應未易靈通又清鄉辦團諸務係屬吏治責在州縣非專派威望夙著司道大員假以事權居中督辦統率調度難期得力容方等會同妥商另行奏明請 旨辦理方等爲慎重軍事起見實味漬陳不勝戰慄隕越之

至伏乞 聖鑒訓示謹請代奏 上諭軍機大臣等端方趙爾巽陳啟泰馮汝駁會電奏悉蘇浙交界地

方匪徒肆擾勢甚披猖朝廷軫念民生用爲矚愛是以特派重兵前往以資鎮懾茲據奏稱股匪業經剿
捕解散分布營隊已屬嚴密復有鄂軍爲之聲援自不虞兵力單弱其所擬治匪辦法亦頗中肯綮果能
實力經營閭閻當可安堵姜桂題一軍應暫緩開拔惟近日迭據言官陳奏謂江浙盜賊充斥民不聊生
端方等身膺疆寄責無旁貸著實成該督撫等認真整頓勿得徒託空言著慶貽愚倘再有匪徒蠢動肆
擾地方定惟端方陳啟泰馮汝駁是問○調緩奉天海龍等一府三縣及山西陽曲等十二廳州縣錢糧
○丁丑山西巡撫張曾敭因病奏請開缺允之○政務處奏本年十一月十一日准軍機處鈔交陝甘總
督升允奏青海緩改建省先行試墾一摺奉 硃批會議政務處議奏欽此○等覆核該督原奏歷陳青
海地方情形首舉建省之難次言試墾之利並援引前兩廣督臣岑春煊原奏不必徒侈改制之名而當
先盡振興之實不必大耗度支之力而當先謀生殖之圖等語自屬因地制宜實事求是之意竊維繕完
邊圉卽所以鞏固屏藩況今世界交通商戰熾戰各擅勝場關地殖民無非徹土編繆之計青海南連川
藏北界新疆設竟張大規模又非財政充盈之際本年六月間青海辦事大臣慶恕奏陳設官立學駐兵
三策綱維既極詳明條理亦尙完密惟機宜坐失固慮後時涉貽以圖亦殊非計該地蠻荒沙漠部族雜

居論開化則尙未及時言利益則只知游牧若欲速建行省不獨風俗制度未易強固且恐設官而民無定所鈴束維艱興學而人無所知開通不易卽謂添設重鎮先固邊疆而遷內地之兵轉運之費太鉅用彼族之衆簡練之術未精矧以建築之資餉需之用一切取給浩繁當此庫帑支絀之時協餉不足之際更覺難於籌撥似不如准照該督所奏先行試辦一節較爲切實易行迨至蒙番一心振興實業再爲徐議建置庶幾地利出而兵可以養學可以興因以設官分職劃地而治較得先後緩急之序也至於該處形勢應如何詳細測繪劃分區域聯合部落使無互相侵越疑阻之嫌以及選擇理科農科畢業學生使爲該處人民指引教導講求地質之學暨一切籌款布置招募勸導之法應請 飭下西甯辦事大臣會同該督臣和衷商榷詳訂章程奏請施行允之○憲政編查館奏光緒三十三年九月初三日御史孫培元奏請凡留學生未經考試者無論內外大臣不得率請調用以市私恩而植黨援一摺經學部議覆此項限制辦法應由憲政編查館體察情形嚴定任官資格奏准通行等語欽奉 諭旨允准在案查東西各國任官之法皆分別等差明定限制非普通考試合格者不得爲判任官非高等考試合格者不得爲奏任官此外各衙門需用專門學藝另行設官者皆各有專條按照辦理成學者不必入官而當官者殆無不學故上收器使之效下絕躁倖之心政美吏清職由於此中國用人之漸善以科舉爲正途近日科

舉既罷入官者自以學堂出身爲正宗凡專門高等學堂以上畢業各生累經考試奉 旨授職者固當與從前正途錄用各員一體升轉其未與學部考試給與出身者雖與奉 旨授職各員有所區別而既經畢業則其學力程度當不至全無心得現在各衙門推行新政需材孔殷如果確有所知或不免採訪調用然使漫無限制令未經考試各生與 廷試授職各員一體補用亦斷非鄭重名器之道也等公同商酌擬請嗣後京外各衙門人員除由考試錄用及照章分發到部到省者應各按向章辦理毋庸另訂章程外其奏調人員如原係實缺候補者准令以原官或改以對品及相當官缺分別奏補原係學習試用者應令於奏調後接算前資扣足年限奏留補用其未經分發僅係候選者應自奏調到差之日起概令當差一年後分別以原官或改以對品及相當官缺留部留省學習試用仍俟照章期滿後奏留補用其未經考試原無官階之畢業學生如確係在專門及高等各學堂以上畢業得有文憑者應由奏調衙門將各該生文憑咨送學部勘驗合格後再將該員奏調到差日期咨行吏部存案自到差之日起扣足二年在京各衙門准其分別保以主事或以七品小京官學習行走在外各衙門准其保以知縣試用仍俟學習期滿甄別後奏留補用此外僅有虛銜各員及文憑不合格曾入高等以上學堂未經畢業之學生准由各衙門隨時考選以八九品官委用除照章升轉外不得踰級奏保以示限制似此斟酌變通寬

取廢用庶使懷材者無廢棄之患而躁進者亦無速化之方似於行政用人不無裨益如蒙 俞允卽由
臣館通咨京外各衙門一體遵守所有從前各衙門奏定調員補缺章程有與此項定章相牴觸者除奏
調在前各員仍准各按原章辦理外其奏調在後者概令遵照此次定章不得再行援案另辦以昭畫一
而免參差得 旨如所議行○憲政編查館奏光緒三十三年九月初三日御史孫培元奏考試游學生
請擇尤錄用以杜奔競而作人才一摺經學部議覆奏稱上年所定考驗游學畢業生章程係參照東西
各國制度將學成試驗與入官試驗分爲兩事苟教育普及官制大定則居官者無不學之人而學成者
不必汲汲於仕進此制實無流弊惟本年各省保送舉貢均授職有差其未經錄取者復經吏部奏定新
章分別等第量予就職至各項高等學堂畢業亦皆獎勵實官此項游學畢業量其登進之途比較情形
不無軒輊該御史原奏所稱考試及格應隨時就職就現在情形而論尙屬可行惟任官章程關繫重要
應由 臣部悉心妥議咨送憲政編查館王大臣詳細酌定奏明辦理等語本年十月二十四日奉 旨依
議欽此欽遵在案伏查我 朝取士任官之法向以科舉出身者爲正途而 廷試實爲登庸之始優拔
貢則有 朝考進士則有 殿試 朝考分別等第錄用有差略與各國文官高等試驗用意相似現在
科舉停罷歸重學堂此後量能授官自應以學堂爲取材之所惟入官試驗一時尙無善法而內外百司

推行新政需才孔殷此項游學畢業人員爲數又屬有限爭先羅致亦理勢之自然往往預筭初臨而刻章已列則與其私相延攬以辟召而得官不如明定章程俾因材而任使臣等公同商酌擬請暫照光緒三十一年考驗游學畢業生金邦平等成案嗣後游學畢業生經 欽派大臣會同學部考試請予出身後擬令恭應 廷試一次照從前 殿試例請 旨分別授職以廣登進而勵真才俟將來考試官吏章程大定再將各學堂實官獎勵及此項授職考試體察情形酌量變通奏准辦理茲由 臣部妥議 廷試章程十一條送由 臣館詳細核定開具清單恭呈 御覽如蒙 俞允卽由 臣部奏請 欽定廷試日期一體遵行得 旨如所議行○誠勸奏奴才恭讀迭次 上諭勸辦各項實業諭令中外臣工實心提倡以開風氣而挽利源又准理藩部先後來咨調查蒙地工商各業行令設法開辦具見 朝廷銳意圖強振興實業之意察哈爾雖係邊瘠難與腹地爭衡而口內外不乏殷商貿易遷鳥庫一帶著徒以開化較遲往往坐失利益奴才每於接見紳商時卽與宣布 朝廷恩意多方開導並力任提倡保護之責聞風興起漸有其人茲據保升直隸州知州趙宗詔同知銜區茂洪補用知縣高克候選通判楊桂清等聯名稟稱竊以交通地方實爲莫大利益而交通之術惟藉舟車自鐵路風行以來車之爲用尤廣目下京張鐵路一二年內可望告成而張庫路長工鉅籌款興築約須俟之十年以後此十年中似須設法交通爲

邊地稍溶利益宗詔等議得簡便之法爲交通之計擬於口外蒙古地方創行汽車先就張庫一路開辦
隨時擴充以開蒙古風氣以通邊地消息且便往來行人口外地勢平而且曠行車既甚利便又無窒礙
今年法人賽車會已在口外試行一次三千路程四日之間尅期而至事有把握非同虛擬現擬糾合同
志集成股本設立公司先購兩車試辦以逐漸擴充爲宗旨股分無取乎多而股東必求股實以共知底
衷爲合格但以汽車路行數千里實爲中國所罕聞必予以專利年限方敢創辦擬請於公司成立後無
論中國及他國人概不得再於口外蒙古地方另行汽車以張庫鐵路告成之年爲年限謹鈔呈公司集
股各章程暨行車免碰章程懇請奏咨立案准予專利年限俾得從速購車開辦竭力擴充以溥公益而
興邊利俟奉准後卽行遵章赴部註冊以符定例等情呈由察哈爾商務總局據情轉詳並道具章程清
冊呈請奏咨立案前來奴才等伏查比年以來西北商務月異歲新久爲外人所歆羨由庫至張經數千
里平沙廣漠隊商出入向恃駝騾動需累日行旅况瘁莫過於斯本年夏間法義等國商人在蒙地賽行
汽車不旬而周環球之半張庫鐵路一時我尙不能自辦卽使趕緊布置而成功亦復需時未雨之謀所
宜預計今該職等鳩集資本創立公司擬於口外試辦汽車取他人已行之成法保中土自有之主權其
利一交通邊地轉輸靈便集資不鉅而收效較捷其利二行車地段一循電報綫路再四考查該處既非

孔道並無窒礙之端其利三創始先從張庫往來以次推及內蒙各地果能暢行無阻則漸推漸廣無論便商運貨其爲用不亞鐵軌且可爲置軌之樞輿其利四有此一舉既可杜外人窺伺之謀又可爲沙磧生財之道將來京張路竣必更收輔助之功其利五奴才詳加覆核所擬章程均尙妥洽所集股本確係殷實華商核之部章尙無不合似可准其試辦惟此事爲吾國所創見含此亦無可辦之區草地平曠不難馳駛若不明定限制恐效尤踵起貽害商標自應許其專利方足以昭激勸而示保護下郵傳部議奏

○戊寅法部奏光緒三十三年九月初八日內閣鈔出東三省總督徐世昌等奏酌擬奉省提法司衙門及各級審判檢察廳官制員缺一摺奉 硃批該衙門議奏單三件併發欽此欽遵鈔出到部查閱原奏內稱臣等前奏東三省公署官制摺內陳明提法司別爲一署應另擬官制以爲獨立之基礎嗣據法部大理院會奏京內外各級審判廳職掌各摺片咨行到奉大旨以審判分爲四等而皆設檢察官以檢察之取外國單獨合議制度分庭而治並詳及各級官廳之職掌品位員數綱舉目張允爲外省準則又查續定外省官制內第言各省按察使改爲提法使該司官制以原設之經歷司獄等官改設奉省初設法官本無內地習慣若不先將該司職掌員缺酌擬試辦則各級官廳將無成立之期且司法關係極重尤宜參酌中外折衷至當誠以提法司管理一省司法上之行政而以審判之事專屬之各級審判廳以提

法司監督之期達於司法獨立之地位惟舊制有應暫存者如招解勘轉上控等件向來由縣遞解至院雖層折太多尙寓矜慎庶獄之意此制未能遽廢秋審爲各國法制所無實中國刑事中特別大典應仍隸於刑事以存其舊其新制有應步趨者如監獄爲司法行政大端日本司法省且設專局與民刑同提另列一科以待推廣又登記爲民訴之根據目前雖暫不舉辦不可不存其名應卽隸於民事以符名實至審判廳爲司法獨立機關規制尤宜詳備惟體察省情形有尙須變通者查原奏直省地方審判廳於直隸州及散廳州縣各設一廳推事長品級定爲從五其不屬府治者以內地府治皆有縣令同城今奉省除奉天錦州兩府設縣外其餘皆無附郭之縣其推事長品秩卽應依照各該地方官以四五六品爲差京師地方審判廳推事由廳丞於各廳推事中臨時派充不設專缺蓋因該廳推事額設二十四人足敷分布本省地方審判廳推事至多不過十二人若由此中分出徽審二員則民刑均不敷二庭之數今擬另設徽審推事專辦重罪徽審事件各直省高等審判廳推事品級定爲正六地方審判廳推事定爲從六因與京師審判廳微示區別惟中缺五品一階升轉究有未便今奉省各府地方審判廳擬改爲廳丞升爲從四似宜於高等審判廳推事及各府地方審判廳推事中各設刑科長民科長一員品級升爲從五略仿日本民刑部長之制登記爲民事訴訟之根據各國皆以屬之初級審判廳今亦擬仿

照辦理至高等審判廳如一省祇設一處則距省爲遠者赴愬維艱應否設立分廳原奏亦未議及擬於省城先設一處俟體察情形再行酌量分設以備就近審理上控訴訟至於檢察廳以保護公安爲專職介於行政權審判權之間如調度司法警察搜查犯罪逮捕犯人提起公訴陳明證據駁詰被告執行處刑及不服審判宣告而上控者民事如婚姻嗣續家產等案皆檢察官職權所及今遵於各級審判廳內均附設檢察廳專司檢察事宜均應服從上級檢察官之命令惟是司法部分關繫至重法律改良此爲緣起故凡建造廳衙不可安於簡陋任用法吏未便繩以常規用款用人不拘成例而後規模肇造氣象一新法令所頒中外受範尤不能不慎之於始等因具奏前來正在核議間據憲政編查館王大臣咨稱各省提法司應設屬員以原設按察司所屬等官由法部擬定職掌酌量改設奏明交館詳核等語除將該司官制清單應由臣等遵照王大臣原咨提出妥議再行奏請交核外臣等竊維設官分職大小必使相維內外尤宜銜接是以本年六月間臣部會奏各級審判廳職掌事宜摺內聲明管轄之區域建立之處所判官之選用事務之分配皆臣部應辦事宜而賁無旁貸並列京外職官各表以爲外省準則等因奏准通行遵照在案蓋司法機關非與行政官截然分離不足以謀獨立亦非由臣部爲之提挈不足以綜全綱茲據該督等奏稱提法司管理一省司法上之行政事務而以審判專屬之各級審判廳以提法

司監稱之期達於司法獨立之地位核與臣等前奏用意相同而其中如以秋審隸於刑事監獄另分一科登記隸於民事責令初級審判廳試辦並檢察官專司檢察事宜在各廳附設均係因時制宜保固法
極之意惟所稱內地府治皆有縣令同城奉省除秦錦兩府設縣外餘皆無附郭之縣其推事長即應照
各該地方官以四五六品爲差等語查各直省原設之府廳州縣係就行政而言臣等奏設之地方廳制
係就司法而言性質既有不同即品位不相統屬如謂原擬地方審判廳職官軍內僅冠以某廳州縣字
樣而府治無文不知府有附縣固應隸於縣中府無附縣即仍與廳州一體廳州縣均不過爲劃區域省
調查起見並無崇卑高下之分則府治之無縣令同城者不妨亦以府名可想原奏乃欲以各府審判廳
改爲廳丞升爲從四無論意爲增置未能與京師一氣相銜且與京外各高等廳勢位相伴亦屬漫無區
別況臣部前奏京師地方審判廳官制摺內本有外省不得援以爲例之文是廳丞體制較崇固未便以
府無附縣運可濫設也至豫審推事另設專缺自係明定責成但豫審係專理疑難及情罪重大之獄此
項案件無多豫審終結後即無所事似不如仍由各推事中臨時派充較省冗濫即謂該廳員缺祇有此
數分派無人或於各庭中酌派候補二三員略仿日本豫備判事之法亦足以資周轉原奏又稱高等審
判廳推事定爲正大六地方審判廳推事定爲從六中缺五品一階升轉究有未便等語查臣部原定直省

地方職官表內推事長係屬從五則此職卽爲各該推事升轉之階以每縣州縣各設一員計之爲數當已不少卽選擢諒亦無難若如所奏高等及各府地方推事中添設刑民科長一員品級升爲從五非惟職司層迭轉有遲滯之虞且司法甫謀分立亦難得如許合格人才足供驅策與其多立名目未免涉於虛糜何如限以階資俾得樂於見用此固臣等籌之已熟者也總之該省初設法官比較內地情形本易著手雖規模不可過陋而統系要使相聯倘不於此時組織完全仍復自爲風氣恐外無以齊列邦之觀聽卽內無以樹各省之先聲揆之整齊畫一之道殊未妥協臣等公同商酌所有部定審判廳官制前奏本極詳明應令該省查照辦理毋庸另議更張該督等又稱高等審判廳如一省祇設一處則距省爲遠者赴艱維艱擬再行酌量分設等語查修律大臣擬定法院編制法案業經奏交憲政編查館核議並另繕全冊咨部備案內有地方遼闊或其他不便等情法部應設高等審判廳管轄之地方審判廳內設高等分廳一條是該草案內早已籌議及此應俟奏准頒行後由該督等體察情形再行咨商臣部妥爲設立以資周備抑臣等更有請者臣部有管理全國司法上行政之責而提法司爲一省司法行政機關不啻爲臣部之分司卽應以臣部爲總匯現當新舊遞更之會雖不得不受節制於督撫以謀行政之便利然非直隸臣部不足收法權統一之效卽將來法官請簡請補各事宜亦應由開辦審判廳各省隨

時開單咨達臣部以便奏明請 旨依法升降此又臣部應盡之職務不得不顧續上陳者也得 旨如所議行○以寶榮爲山西巡撫丁寶銓爲山西布政使志森爲山西按察使○已卯諭軍機大臣等內閣學士麒德奏應請舉賢一摺吉林候補道王昌熾聲名素劣並有參案正在查辦該學士率行保薦殊屬冒昧著傳旨申飭原摺擲還○度支部奏東三省總督徐世昌請撥吉林常年經費六十萬兩現擬如數撥給一次允之○以祝大椿興辦實業賞給二品頂戴○以許鼎霖劉世培程恩培程祖福創辦公司均賞給正二品封典○加賞龍元濟正一品封典○庚辰諭軍機大臣等李國杰奏請就廣東崖門口外築堤圍垣移撥旗丁領銀各摺片著景澧張人駿按照所奏各節確實查勘妥籌議奏原摺片均著鈔給閱看圖說一件併發○張之洞等奏等奉 命籌辦津鎮鐵路事宜業於本年十二月初十日將改道津浦自行建修與英德兩國公司訂立借款合同繕單具奏奉 旨依議欽此查此項鐵路光緒三十一年間臣世續迭准外務部轉商部咨據山東京官柯劭志直隸京官惲毓鼎江蘇京官翁斌孫等先後聯銜具呈略謂近來各省鐵路類皆由本地紳商籌款自辦津鎮鐵路亦應仿照辦理現擬籌備款項自行建築無須別借外款等語當經 臣世續以津鎮預約係因借款而定三省紳士若欲收回自修必先籌集的款若干何時可以興造務須從長計議咨覆在案本年二月惲毓鼎等復具呈由都察院代奏申明前說

是三省紳士確知鐵路關係國家命脈商民生計而津鎮一路延袤兩千餘里商賈輻輳南北貨輸尤爲
羣情所繫屬請照各省商辦成案集款自修正論不爲不正惟英德兩國訂約在先牽涉滋多萬難議廢
臣之洞到京後接晤該紳等卽而達機要許於改訂正約時設法挽回仍留後來商辦地步現在借款合
同業經簽印並欽奉 特派大臣督辦該三省紳士等深明大義均能恪遵 諭旨無復異言臣等悉心
經畫幸未貽誤查津鎮鐵路當日本係國家與英德兩國公司議造本年議改此約之時三省紳士往詣
該公司商辦該公司拒不與商現經臣等將此約改定妥協改名津浦是此路由官議定自應仍屬於官
惟是開物成務固經國之遠猷利用厚生亦養民之要義 朝廷廣興樂利一視同仁凡利源之闢自民
間者無不與斯民共之必不於茲三省稍存歧視所有津浦鐵路借款股票除按照合同第十三款兩公
司應在中國國家清還借款之時擬懇 天恩准令三省紳商自集成本將此項股票撥與一半任其收
回惟三省應得此路權利應各視其境內地段若干里以爲攤買股票之準繩方昭平允且爲數甚鉅亦
非倉卒所能募集三省紳商應於此十年中豫計其境內路綫共長若干贖路之時應攤收回股票銀若
千早爲設法集款籌募既較爲從容利益亦各有定分庶可免偏枯而杜推諉此項津浦鐵路卽爲官商
合辦之路以期上下相濟昭示大公而該紳等迭次呈請自辦之說亦可臻諸實行不至歛望斯地無贖

土民有餘財睥睨熙熙同戴 高厚生成之德於無既如蒙 俞允卽由外務部行知督辦大臣郵傳部
暨三省各督撫先期立案以便屆時遵照辦理得 旨如所議行○辛巳諭軍機大臣等端方陳啟泰馮
汝驤電奏悉著派瑞澂督辦蘇松太杭嘉湖緝捕清鄉事宜仍責成該督撫會同督率勿稍貽誤○諭軍
機大臣等有人奏湖南巡撫岑春煊昏庸乖謬請旨飭查一摺著趙爾巽按照所參各節確切查明據實
具奏毋稍徇隱原摺著鈔給閱看○諭軍機大臣等此次禮親王世鐸奏保恭修玉牒人員爲數過多所
請獎敘亦屬太優著該王大臣等另核請獎○那桐等奏總稅務司因病請假並請派副總稅司接署最
務得 旨總稅務司赫德在中國總司樞務宣力有年卓著成效國家深資倚重所有承辦各事悉臻妥
協著加恩賞給尚書銜以示優異副總稅務司裴式楷並加恩賞給布政使銜餘依議○度支部奏修訂
法律大臣沈家本等奏變通旗民交產舊制一摺光緒三十三年十二月初七日奉 旨度支部議奏欽
此欽遵由軍機處鈔交到部原奏內稱 大清律例戶律典買田宅門內有旗地旗房不准民人典賣及
八旗人員盜買各省產業勒限變價歸旗等二條與戶部則例旗民交產門內准旗戶民人互相買賣之
例不符從前刑部例文大致照戶部則例添纂是爲舊制咸豐年間旗民准其交產故同治年間戶部修
改則例遂添纂旗民交產各條當時刑部條例未及修改故彼此參差嗣光緒十五年戶部奏規復旗民

不准交產舊制而則例未經修改故又不相符不准旗民交產因爲惠愛旗民起見然民間仍多私相授受終屬有名無實且刁猾之徒轉得藉例禁爲勒捐之地貧乏者急不能擇更受挾制虧損彌多實於八旗生計初無裨益擬請嗣後旗人房地准與民人互相買賣悉照咸豐年間成案辦理所有戶部則例旗民交產門內各條仍一律遵用至旗人之出外居住營生者准其在各省隨便置買產業毋庸禁止舊時刑部例文二條應即刪除事關田賦請飭部核議施行等因臣等伏查旗民不准交產例禁嚴定例之初實爲惠愛旗民起見咸豐年間因私相典賣涉訟繁多量爲弛禁同治十二年臣部修改則例於是始增纂旗民交產各條其時刑部例文未及改修嗣光緒十五年臣部以開禁以來民人置買甚多旗產恐日見少奏請申明例禁又在案惟臣部則例僅同治十二年舊本光緒二十四年臣部奏請纂修則例編纂未集屬以庚子之變案卷殘缺先後咨由各省錄送舊案迄今未能成書是以臣部前請申明例禁雖經奏准在案實未入例此該大臣等所稱彼此參差之實在情形也現該大臣等以生理之源當令相濟相通始各有以自養請嗣後旗民房地准與民人互相買賣其外出居住營生者准其在各省置買產業戶部則例旗民交產各條仍一律遵用將舊時刑部例文二條刪除竊維張弛之道因時制宜況奉明諭化除滿漢畛域亟應及時變通用昭一道同風之治至該大臣等稱規復舊制以後民間私相授受者

仍多究屬有名無實且刁猾之徒轉得藉例禁爲勒指之地貧乏者益不能擇吏受挾制於八旗生計無益等語^臣等詳加體察尤屬實情擬請照該大臣等所奏辦理除^臣部則例旗民交產各條仍請一律遵用外其舊時刑部例文二條卽請 飭下修訂法律大臣刪除以歸一律得 旨如所議行○法部奏京師高等以下各級審判總經法部於本年十一月初三日奏明開辦在案竊維各國裁判制度至爲精詳而其構成之法又實與行政官署有互相維繫之效故法制日臻上理而職權因以不撓現在各總成立伊始所有審判章程業已奏准試辦是既具獨立之基礎卽應求補助之機關查四級審判俱附設檢察一廳其要務在監察裁判提起公訴有糾正輔翼之責兼理其司法上之行政事務凡逮捕罪犯搜索證據以及調度司法警察等事必有統轄之地方官相助爲理然後利於推行而凡巡警分區營翼地面所以保治安而司緝捕者尤與審判衙門有恩息相關之誼當此裁判分立方始萌芽若非脈絡貫通何以化畛域而規美備是以^臣等公同商酌嗣後內外城總廳所管司法警察及兩翼營汛地面其有關涉審判事宜或與各級檢察官直接之件自應安定條規俾資遵守當經^臣等節次派員會同籌議酌擬司法警察職務並營翼地方辦事章程大致以劃分權限明定責成爲要義^臣等覆加詳核尙屬周妥可行謹分繕清單恭呈 御覽如蒙 俞允^臣等卽飭知該管廳一律遵照以杜侵越而免推諉以後如有應

行變通之處另由臣等隨時修改奏明辦理得 旨如所議行○壬午張人駿奏粵省財政困難懇請減解賠款以紓民力不允○以周樹模爲奉天左參贊錢能訓爲奉天右參贊吳鈞爲奉天提法使陶大鈞爲交涉使張元奇爲民政使張錫鑾爲度支使○調緩河南被災州縣錢糧○度支部奏雲貴總督錫良奏滇省防營已於上年四月遵章一律改爲巡防隊改隊之際就兵就餉簡陋相仍其巡防鐵路者因人類之雜兵格之低服裝之垢敝紀律之廢弛久已貽譏中外軍政之壞幾至無可措手惟有嚴加整頓統籌改編以期得力擬將全省巡防隊及鐵路巡防隊每營概以二百五十人爲定額按南防西防普防江防鐵路巡防分爲五路共四十七營分籌布置庶兵皆有用餉不虛糜查滇省防營於正餉之外原有津貼名目擬將正勇月餉一律加爲三兩六錢員弁什長伙夫較前亦稍有加增其駐紮邊界及鐵路者食用奇昂僭於內地擬再分別酌給津貼以示體恤將來物價平賤再將津貼一項酌量核減滇本受協省分近年鄰餉匱乏養兵經費恆苦不敷而鐵路巡防隊十三營又爲瘠苦之滇所獨有前因鐵路營數難減餉無所出曾經奏請按年籌撥的款二三十萬兩解滇供支現復添設營伍加給薪餉修建營舍製備軍衣需款愈鉅籌措艱難以致鐵路各營薪餉更爲無著仰懇 飭部迅撥的款按年解滇以資挹注而供支放等因一摺光緒三十三年十二月十三日奉 硃批著度支部按年籌撥銀二十萬兩以資接濟

欽此欽遵到部臣等伏查雲南鐵路巡防勇餉無著於本年七月間據該督奏由部撥給專款並瀝陳滇省營制廢弛情形籌議改練新軍等情經臣部會同陸軍等部議覆以該省鐵路巡防關係緊要經費支絀尙屬實情前項營餉按照造送三十一年新軍表冊所開計十一營歲實需銀十三萬六百六十三兩七錢擬請如數撥給在該省應解賠款內截留動支至該省新練陸軍請辦專款一節前經議准截留練兵經費銀十二萬兩並發庫款銀四十萬兩爲賑濟及各要需之用該省原有兵餉每年共銀一百萬兩有奇既據奏稱原有營兵腐敗不堪卽應廢行裁汰騰出的款以爲改練新軍之用等因於十一月初四日具奏奉 旨允准恭錄咨行該省遵照在案今又據該督臣奏明改編滇省防營情形並稱鐵路營餉無著請撥常年的款等語自係因未經接到部覆故有此請查鐵路防營薪餉等款臣部前次已撥給銀十三萬餘兩至此次所稱添設營伍加給薪餉修建營舍製備軍衣等項爲該督前奏所未及自宜另行撥給今既奉 旨按年籌撥銀二十萬兩除山臣部前次奏明撥給銀十三萬六百六十三兩七錢外擬請再行籌給銀六萬九千三百三十六兩三錢以符二十萬兩之數惟查該省應解明年洋款除續撥外所餘無幾不敷三十四年劃抵之用擬請暫在宜昌關稅收項下撥銀十二萬兩重慶關稅收項下撥銀八萬兩共符前數如蒙 俞允卽由臣部行知湖廣四川各總督轉飭各關監督遵照自明年起分批

解交雲貴督臣兌收其自三十五年起應解前項銀兩仍由雲南應解賠款銀內如數截留以裨要需得旨如所議行○癸未轉裕厚爲民政部左丞以劉彭年爲民政部右丞轉延鴻爲民政部左參議以汪榮寶爲民政部右參議○道爾巽奏湖北按察使梁鼎芬因病呈請開缺允之○以陳壘麟爲湖北按察使○政務處奏准軍機處鈔交東三省總督徐世昌等奏吉省屬境遼闊擬請擇要增設府州縣員缺一摺光緒三十三年十二月初六日奉 硃批會議政務處議奏欽此竊維吉省控引江奉輻輳最廣向以土曠人稀設官無幾近則移民墾土生殖日繁且現籌旗民生計尙擬陸續遷往自應豫謀建置以期成邑成都第經營伊始必當審度地勢布置適宜庶可便控馭而規久遠原奏稱擬於省城東北蜂蠻山添設知府一員曰蜜山府省西長嶺子添設知縣一員曰長嶺縣西南蒙江添設知州一員曰蒙江州東南樺皮甸子添設知縣一員曰樺甸縣查吉省疆域東北最爲遼闊且界接鄰邊防尤重原奏稱蜂蠻山一帶平原千里東臨興凱湖一無屏蔽西距寧古塔城七百餘里兼顧難周委係實在情形自應增設府治以資鎮懾至省西長嶺子爲長春洮南兩府要道適中之地西南蒙江毗連韓境東南樺皮甸子爲頭二道江及古銅河大沙河流域亦皆扼要形便之處所請增設一府一州二縣員缺均係擇要建置應卽照准原奏又稱各缺均仿奉天章程酌派設治委員先往試辦一切事件逕由該員直接司道辦理州縣

亦不歸府轄係爲便事覈實起見應請 飭下該督撫遵照所擬慎揀委員認真經理務使殖民興業數年之後成效可期一俟辦有端緒再行奏請補授並一面咨部立案以符定制至應行刊鑄印信建葺城署核給廉俸暨器款用人等項分職一切未盡事宜統由該督撫等按照新章酌量情形隨時奏明辦理得 旨如所議行○吳廷斌奏黃河爲東省命脈所關當連歲安瀾之後河身日見淤墊堤岸愈形卑薄徒駭漸淤尼閘不暢大溜改趨東南山海灘入海危機暗伏防患宜先 臣前駐貴州籌定巡緝清鄉各事宜卽於十月二十五日前赴上游費莊乘舟順駛下游周歷千有餘里每遇險要工程督同三游總辦逐一親詣勘驗迴環相度研究利病竊見坐灣迎溜頂衝處所埽樹林立水勢涵湧危險萬狀惟用磚石鑲埽壩及護根脚者類能屹立洪濤無虞倘墊蓋東省近年幸保安瀾固由下游薄莊決口大溜奪徒駭入海尼閘通暢亦由改用磚石之功昔河 臣果毓英嘗主是議議者或以費重運艱急切不能應手爲慮實則工之最險者土楷各料難資抵禦舍拋砌磚石別無良策光緒二十四年前大學士 臣李鴻章奉 命查勘山東黃河奏調 臣隨同東來履勘月餘籌擬大治暨救急治標各辦法當時 臣卽建議力主多用磚石拋護險要厥後漸用此法日計不足歲計有餘根基得以漸穩遂奏連年安瀾之效實爲 臣始料所不及第察看全河工程險多石少限於經費顧此失彼零星補苴萬難久持亟宜抱定宗旨實力擴充如

能長用磚石兼可省隨時加鑲稽料節省尤鉅然三游情形不同自應酌分辦法查上游河面較寬明險雖少暗險甚多臨黃河埵逼近河干一經水勢盛漲保守頗難北岸金堤南岸大堤常被衝刷實爲可慮楊莊大堤工長七八十里內外皆水尤爲巨險擬擇要鑲做釘埵並於殘缺卑薄者一律加培完固他如南岸孫樓等處大溜直逼埵身勢已岌岌亟應添築埵堰多鑲磚石此籌辦上游工程之情形也中游改用石料最早每見頂溜迎溜搏擊搜底淘根卒能鞏固無恙者皆賴石料保護之力然北岸鐵匠莊等處要險甚多非多運石料添築埵堰難資捍衛其五里營一帶屬因上游民埵漫水溜入掛劍臺等處以致大堤被衝受害日深頃年搶險糜費無底應將最險大堤二千餘丈全行砌石護沿爲一勞永逸之計此籌辦中游工程之情形也下游險工屢見更屬防不勝防幸各埵堰根脚多有拋護石料者得以勉爲支持第該處距山甚遠船運既艱需時尤久鑲做石埵遠難集事祇有設法多運擇要施工俾根基逐漸穩固並擬就河干添設竈廠多燒大磚以補石料之不足此籌辦下游工程之情形也至全河受治全恃海口通暢今安瀾已歷三年難免尾閘淤淺茲查薄莊決口迤下大溜緊傍南岸遙埵測量海口至深處不過一丈上下且近來河勢漸向東南遷徙分流側衝若不預籌防範則溜勢渙散非徒兩岸村莊受害亦難收束水攻沙刷深尾閘之益擬就兩岸埵堤度勢向前接築北岸自新溜溝莊起至西舊溜溝止計工

長三千六十丈南岸自崔家莊起至王地壩壩止計工長三千三百五十丈兩埝告成則北岸之牧馬廠地畝及徒駭河身南岸之已墾地畝及舊存鹽灘以後或可均免衝刷淤漫之患下流既可暢行上流自無壅滯治河衛民洵有裨益再徒駭河自臨化縣境九山河一帶近年被黃水淤墊約工長五十餘里現在泥水爛漫無從勘估擬俟明春道路涸復再行勘度酌量舉辦以上採運卵石添築壩埝遊埝加培兩岸卑薄堤身各工程已飭三游總辦切實估計除須撥撥防汛搶險各經費外至少約共需銀十五萬兩茲據詳請具奏前來臣覆加查核參以此次履勘情形均係必不可緩之工所需工款亦係核實估計減無可減應請照擬辦理明知時事艱難財政奇窘既不敢動用部撥年例各款而本省工捐亦經截止本屬籌無可籌然黃河爲東省安危所繫若因工款難籌致令疏於人事竊恐所失既鉅所費轉多臣前在直隸辦理河工二十餘年深悉此中利害再四思維惟有就本省司道各庫竭力設法騰挪以濟要需相應仰懇 天恩俯准 敕部作正開銷俟來歲春融即將各工乘時興辦臣仍當隨時督飭認真辦理以重河務下度支部知之○甲申端方陳啟泰馮汝驤電致軍機處竊江浙島匪肆擾前經奏奉 諭旨責成方等認真整頓當經奏請特派新授江蘇布政使瑞澂督辦蘇松太杭嘉湖緝捕清鄉事宜正在籌畫布魯聞據上海道電稟二十二日早招商局利亨小輪拖船由杭回滬行過浙江嘉善廿里在松江

上廿餘里之陳王村遇匪船數十隻圍住放鎗斃搭客三人傷五人該輪急鼓輪逃避未被搶劫旋日本大東公司船至華亭百餘里又被攔劫鎗斃搭客一人載生昌輪踵至同時被劫銀洋衣物均被搶奪據報到縣立往勘驗現由道派輪拖帶被劫船巡緝保護等語方等聞信之下立將統帶飛划營副將徐錦棠統帶巡警水師副將歐陽成祥摘去頂戴勒令迅速奮力剿捕並電松江劉提督嚴飭鹽捕各營一體認真兜剿由驛派水師五百名梭巡保護務期賊破獲航路平安庶免外人藉口乘機干預適燕藩瑞澂在甯營飭即日赴滬先將保護內河輪船辦法妥速籌辦俟前電奉 旨允准後即行認真督飭從嚴剿捕以靖地方並往晤日領而加慰藉以安其心旋又據滬道電稱今小輪仍擬往來生意既難暫阻必先設法保護現與日領商定抽勇三棚攜帶軍械並派弁督率坐公司輪船護送以保目前無虞再籌久遠辦法提督劉光才督率無方應請 旨交部議處方泰驤等事前疏於防範並請交部議處仍當與該等悉心籌策認真辦理以期地方綏靖航路通行仰紓 聖慮謹代奏 上諭軍機大臣等端方陳啟泰馮汝驥電奏悉前以江浙島匪肆擾付送飭端方等認真剿捕並與成劉光才迅即撲滅乃未逾半月仍有大股匪徒滋擾行旅該督撫等果能實力遵行妥加防範何至匪勢若此滋蔓十九日接據該督專電奏股匪業經剿捕解散分布營隊已屬周密乃未及數日竟有匪船數十隻在滬杭往來孔道將中外輪

船圍攻攔劫斃傷多名該督等前奏果已照辦何以匪蹤日益猖獗江南提督劉光才督率無方任意玩忽著交部議處統帶官副將徐錦棠歐陽成祥緝捕不力貽害地方僅予摘頂不足蔽辜著卽行革職仍留營効力贖罪端方陳肅泰馮汝驥疏於防範行不踐言應卽一併先行交部察議仍著該督撫等懷遵歷次諭旨切實籌辦勿再因循並將此次劫案賊賊迅速破獲分別懲辦嚴結以靖地方○會議政務處奏本年十二月初一日准軍機處鈔兩廣總督張人駿奏請將水陸提督仍分兩缺一摺奉 硃批會議政務處議奏欽此臣等謹將此次該督原奏及上年五月間前兩廣督臣岑春煊議改水陸提督經政務處覆奏議准各摺一併詳細覆覈竊查廣東盜賊素多而海盜爲患尤劇自乾隆末年嘉慶初年以來海盜巨魁若張保仔等連橫結黨縱橫出沒南洋數千里商民深受其害以故前兩廣總督百齡亟亟以添設水師提督爲請蓋以水師陸隊各有專長而水師練習風濤駕駛追捕較陸路爲尤難前督臣岑春煊徒慮事權不一遂奏請將水陸提督裁併爲一近年各埠通商以來外國商輪往來廣東各屬外海內河者甚多一遇劫掠輒致枝節橫生欲自派兵輪深入內河自行防護揆度時勢若僅責成提督一員水陸兼顧實有所難今該督張人駿奏稱籌畫粵省情形仍宜將水師陸路提督分設兩缺既經體察明確自應請 旨准如所奏辦理至如何選撥兵丁劃分權限給予廉俸領回印信各詳細章程仍由該督妥訂

奏請施行 上諭會議政務處議擬張人駿奏請將水陸提督仍分兩缺一摺據稱廣東盜賊繁多海盜
爲患尤劇亟宜加意防範若僅設提督一員水陸實難兼顧應仍分設兩缺各專責成廣東水師提督仍
以薩鎮冰補授未到任以前著李準署理陸路提督著蔡炳直補授○乙酉諭祭 太廟 上親詣行禮
○丙戌 上御保和殿賜蒙古王公宴○徐世昌等奏查奉天自改設行省釐定官制一改舊日將軍之
制惟是設官之意要在察吏安民整躬率屬欲其裁革陋規剔除中飽必使祿足代耕乃能趨事赴功廓
清蠹弊從前東省官吏差缺所入甚微遂至貪賂公行浸成風氣現值改章伊始萬不容再蹈前轍自應
明定養廉以挽頹習謹就各省督撫司道以下各官所定養廉分別比照定擬又查奉省迭遭兵燹百物
昂貴數倍內地臣等到任後屏絕供應所有內地辦差各名目及一切陋規概行禁絕凡所取求皆歸自
備若僅恃廉俸一項斷不敷用查各省凡官缺清苦者每於養廉外加給公費卽奉省地方官前將軍趙
爾巽亦曾奏請酌加公費誠以邊遠之區物用翔貴欲責其操守謹嚴盡心民事不得不優給祿精以贍
其身家故於養廉外分別酌定公費數目此項養廉公費銀兩卽由度支司在正款內分別籌給應作正
開銷公費一項遇有照加應由署缺派差之日起支以示體恤至敘事科員等官現尙未定額數暫擬不
定養廉先支公費其外府州縣以下各缺有支廉俸者有支公費者辦理未能一律應俟通盤籌畫酌核

定擬再行奏明辦理至於古江兩省應定養廉公費俟查明該兩省財政情形臣世昌隨時與兩省撫臣酌定再行具奏茲將酌擬養廉公費數目分繕清單恭呈 御覽合無仰懇 天恩俯如所請飭部立案施行得 旨著照所請該部知道單二件併發○馬維騏奏奴才前奉 諭旨裁兵節餉練新軍辦警察以立自強基礎仰見 宸謨廣運洵因時制宜之至計莫名欽佩所有四川綠營前已商同將軍督臣分別裁留曾陳在案惟是法以久而必變亦愚以隱而思防奴才以為弁兵之曾經酌留者固宜勒加訓練成異日有用之才其被裁者亦應設法安插消將來無形之患伏溯我 朝以武功定天下八旗綠營荷 國家養養之恩恃為進身之計者已歷二百餘年一旦散之四方其中嫻紀律耐勞苦者實不乏人置散拋閒廢棄殊屬可惜若其血氣方剛性情素悍連斷其俸餉之資難免不生非分之想當此強鄰伺釁邪說橫行萬一被匪黨之煽引勢必起暴動之風潮則節餉適以糜餉裁兵轉而用兵似不能不有以善其後也奴才愚見擬請 敕下各直省督撫凡編練新軍及警察巡隊於揀換弁兵時以三四成之一二咨取原練兩營弁兵由將軍提督挑選年富力強材武堪資造就者送交該軍隊官認真考驗合格編伍取具聯保三年退伍悉遵定章仍回各該管衙門遇有遣派咨調立至既不背徵兵宗旨又不致有誤戎機收渙散之人心融滿漢之畛域於裁兵節餉暨後之法不無裨益下陸軍部知之○是年統計出口貨

直銀二萬六千四百三十八萬六千九百七十七兩進口貨直銀四萬一千六百四十萬一千三百六十九兩
相抵虧一萬五千二百一萬六千七百七十二兩凡徵貨稅銀三千三百八十六萬一千三百四十六兩

東華續錄

光緒二百十四

臣朱壽朋 謹編

臣張毓英 恭校

光緒三十四年春正月丁亥朔卯刻 上詣 奉先殿行禮 巳刻奉王公百官詣皇極殿 慈福端佑康頤昭豫莊誠壽恭欽獻崇熙皇太后前行慶賀禮御中和殿受禮太和殿受賀午刻詣 大高殿 壽皇殿行禮御乾清宮入宗親宴○授醇親王載灃爲軍機大臣○戊子 上詣 壽皇殿行禮○庚寅沈家本奏臣迭接家鄉電信據稱嘉湖一帶烏匪蔓延勢甚猖獗湖州如石埭重湖新市等處嘉興如桐鄉石門海鹽等處白晝搶劫擄人勒贖甚至拒捕戕官打毀教堂學堂種種不法指不勝屈近聞 朝廷特派重兵前往坐鎮誠以亂萌一日不靖卽閭閻一日不安 聖主眷念東南江浙人民實深慶幸臣查此項匪徒與大股匪黨揭竿起事者情形不同蓋其中半爲昔年裁勇半爲鹽梟有紅幫青幫各種名目其籍貫以皖省之焦湖人爲最多兩湖人次之溫台人亦雜出其間平日以包賭販私爲事業遇便則搶劫訛詐無所不爲恃太湖爲出沒之所沿湖各府州縣蹤跡無常一聞官兵搜捕往往四散逃匿或竟持械抗拒官兵反致失利如是者已數十年辦理總未得手推原其故一由於嘉湖等府港汊紛歧官兵初到情

形并格而匪類游息日久熟悉地形兵至則散而爲民兵退則聚而爲盜往來飄忽未易痛懲一由於民
匪雜居並無標異嘯聚則生搶劫之案散處卽爲游手好閒之徒難以辨別又初無一定巢穴可以悉力
進攻有此兩故所以一時不能殲滅也近來匪勢日熾居民不能安業間亦爲所脅從然究與成股匪徒
設立頭目築寨負隅者迥異故前年江浙兩省有合辦兜剿之議卒難奏效臣愚以爲宜酌用清鄉之法
匪多外籍口音易辨藏匿之所亦易跟尋苟得熟於情事之統領營爲操縱不使良莠混淆南方偏重水
師倘多備礮船扼要屯紮以緝查清匪之源以撫輯散匪之勢寬以時日事必有濟伏乞 飭下江浙督
撫臣於原有緝捕營辦法酌量變通各派大員協同妥議清理之法不動聲色惠無施並令嚴查保甲
舉辦團防庶匪蹤易絕而匪勢自孤較之以兵力痛剿似爲有益 上諭軍機大臣等侍郎沈家本奏江
浙緝匪不宜操切一摺著端方陳啟泰馮汝駉按照所陳各節體察情形會同妥籌辦理原摺著鈔給閱
看○辛卯祈穀於 上帝○慈禧端佑康頤昭豫莊誠壽恭欽獻崇熙皇太后 皇上御乾清宮各國駐
京使臣覲見賀年○癸巳諭軍機大臣等吳廷斌電奏悉夏辛酉原部各營著甘肅提督晏桂題接統未
到差以前皆責成該軍營務處妥爲照料並著晏桂題統率原帶六營會合新接各營汰弱留強共成五
千人開往長江一帶扼要屯紮專作爲游擊之師仍會商沿江各督撫籌辦江防事宜其前派會辦江浙

剿匪一差著卽撤銷○甲午時享 太廟 上親詣行禮○賞加開缺大學士王文韶太子太保銜准其
重赴鹿鳴筵宴○調緩江蘇蘇州等屬應徵錢漕○調緩江蘇江甯等屬新舊錢糧○調免杭州嘉興松
江等屬鹽課錢糧○端方奏蘇省松太浙省嘉湖交界處所屬匪猖獗業經奴才會同蘇浙撫臣奏明
認真捕治並奏派江蘇布政使瑞澂督辦在案查松太捕務向由撫臣就近督飭蘇屬營隊專辦歷任督
臣均因此事向歸撫臣主政一切選將治兵捕盜事宜勢不能不分權限以專責成近日以來島匪勢熾
日張迭出巨案頻領等捕治未能得手勢將蔓延奴才目擊情形不敢循舊因仍稍形拘泥且奴才前署
蘇撫三月餘治地曾著微效於該處情形尙爲周悉是以電商蘇浙撫臣等治島事宜向由蘇浙辦理者
改由甯蘇浙三處通力合作認真妥辦並奏請 特派布政使瑞澂督辦蘇浙捕務是爲甯屬派兵治島
之始布置經營有同草創必須添置淡水兵輪機器快礮並隨時撥派得力兵隊綜計用款爲數不貲蘇
浙財政同一拮据不能盡責該兩處擔任自應協力統籌共舉斯舉所有甯軍一切用款應請作正開銷
得 旨如所議行○丙申 上御 紫光閣賜蒙古王公筵宴○丁酉諭軍機大臣等近來紗布進口日
益增多實爲漏卮之一大宗民間紡織漸至失業固由工作之未精尤因種植之不善利源外溢何所
底止查美洲等處棉花種類精良莖葉高大花實肥碩所出之絨細軟而長織成之布滑澤柔軟勝於內

地所產數倍皆由外國農家於辨別種類審度土性燥濕考驗精詳故能地產日精商利日厚中國棉花質性較遜於外國種植尤不講求南北各省間有數處所產較勝而種植仍多鹵莽是必須博求外國佳種采取培養良法料美工精自能廣行各省保全利權著農工商部詳細考查各國棉花種類種植成法分別採擇編集圖說並優定獎勵種植章程頒行各省由該省督撫等督率認真提倡設法改良其果能改良之棉花紗布經過各關卡應如何優加體恤並舊稅務處妥籌辦理以資暢銷該部未經頒章以前著各省督撫先行體察該省情形勸諭商民實力籌辦或選擇官地試種或集股設立公司多方鼓舞所屬地方官及紳商如有切實創辦早著成效應令將所產棉花送部查驗准其奏請優獎此乃興利急務勿得視為具文致負朝廷振興農務惠利民生之至意○諭開缺山西巡撫胡聘之在巡撫任內昏聩妄為貽誤地方著即行革職其隨同辦事之江蘇候補道賈景仁已革知府劉驥麟大貪劣狼狽為奸賈景仁著革職永不敘用劉驥麟著一併永不敘用以示薄懲○軍機大臣奉 旨秦炳直電奏悉該提督兼資文武熟悉該省情形是以簡授斯任以期得力所請收回成命之處著毋庸議○諭軍機大臣等有人奏腦西不靖宜培元氣以清寇源而厚民生一摺又片奏興辦礦務宜派員招商前赴腦西勸令剋期開辦等語著張人駿張鳴岐體察情形妥籌辦理原摺片均著鈔給閱看○調緩江西南昌等府各屬新

辦錢漕○戊戌以高凌霨爲湖北提學使○己亥諭京師人煙稠密貧戶孔多食用物價稍昂貧小民生計立形困難近日銀價陡漲物值因亦增高嗟我黎庶其何以堪著度支部迅卽撥銀五十萬兩發交順天府府尹承領卽責成該府尹妥擇官商銀號代爲賤價收錢以平銀值一面嚴禁各商肆任意擡高物價其有私運大宗銅元入京者由崇文門監督郵傳部認真查禁倘有奸民私鑄銅元潛銷充斥者著責成民政部直隸總督順天府步軍統領嚴密查拿盡法懲治俟銀價物價皆平由該府尹將承領銀兩解繳部庫其賤價虧耗之款准其核實開單奏銷尙書陳璧前在府尹任內辦理銀錢平價尙屬得法並著該尙書會同府尹妥籌辦理務使操縱得法國幣不至虛糜用副朝廷體恤民困之至意○軍機大臣奉旨前以制錢缺乏各省鼓鑄當十銅元以期相輔而行乃近來銅元益多制錢益少銅元一枚不足抵制錢十文之用而奸商折扣盤剝頗足爲害市面且小民因制錢太少零星日用諸多不便當各省鼓鑄之始原期準作十文與制錢兩無軒輊而錢少元多遂至錢貴元賤不但物價騰漲大礙小民生計抑且鑄本日虧並足損礙銅源自非鑄用一文之錢令一文本位常存不足以顯銅元當十之數保銅元行銷之利前年湖北廣東等省曾奏鑄一文新錢經度支部議奏通行而各省搭鑄一文新錢者仍不多見蓋由於鑄造一文新錢成本較重不免稍有虧耗然以鑄當十銅元餘利酌量提補虧耗尙不至無著所

失無多所全甚大著度支部通行各省廠凡鑄當十銅元必須於定額之外加鑄三成一文新錢以資補救其形式重量銅質鑄本均須預爲核算妥爲配合又必須與當十銅元工料成本大致相準則兌換價值銅元一枚必當新鑄制錢十文庶利推行而資信用至此項一文新錢或宜黃銅或宜紫銅或宜有孔或宜無孔並著該部詳晰考校悉心釐定迅速奏開務期子母相權大小相維以便民生而正國法○庚子 上諭 壽皇殿行禮○辛丑 上諭 大高殿 壽皇殿行禮○以沈曾植爲安徽提學使並署理安徽布政使○壬寅度支部奏光緒三十二年閏四月二十二日前財政處會同戶部奏辦銀行者流通國法之樞機維持商務之根本東西各國有中央銀行復有普通勸業儲蓄各項銀行考其制度約有兩端一爲國家銀行由國家飭令設立與以特權凡通用國幣發行紙幣管理官款出入擔任緊要公債皆有應盡之義務一爲民立銀行爲商民之所請立必由政府批准然後開設大有皆與商民交易凡其集股數目營業宗旨以及一切辦法均當呈明於戶部而款項營業情形仍須隨時報告以上各種銀行戶部皆有統轄查考之權且各設專例以監督之誠以銀行爲通國財政所關實戶部之專責中國現當整飭財政之時凡辦一國幣辦理公幣洋款銀行尤關緊要若無管理之規條恐各項銀行必致自爲風氣則財政仍無整齊之日是以戶部等參考銀行之制設立戶部銀行開辦以來略見成效正籌推廣以立中

央銀行之基礎現邁通曉銀行章程人員參考東西各國規則釐定各種銀行管理及營業專例勒為成書恭呈 欽定頒行嗣後凡國家銀行以及普通農工商業儲蓄各銀行銀號無論官立民立均應遵照辦理庶盡 等管理之責而期與各國成法相符等語奉 旨允准在案 等伏查近年風氣開通官立私立各項銀行日益增多亟須頒布則例俾營業者有所遵循 臣部職司管理亦不可有所據依藉收畫一整齊之效惟此項例文雖有譯成東西各國通行章程可備參考而揆諸中國商務之風俗習慣亦難必其盡合彙輯之餘益用詳慎上年財政處於奏准後遴員編纂成帙移交到部 臣部復派員細心研究擬定銀行則例四種 臣部所設銀行原名戶部銀行即為中央銀行現 臣部已改為度支部擬改銀行之名曰大清銀行計則例二十四條中國向無銀行而經營金銀匯兌貿易如銀號票商錢莊以及各省所設之官銀號官錢局凡有銀行性質者即可以普通銀行賅之計則例十五條殖業銀行為農工所倚賴東西各國實業之進步悉由於此現時農業銀行尚未設立而關於路工之郵傳部交通銀行及浙江鐵路之興業銀行皆殖業銀行也計則例三十四條各項銀行之存放款項務取其多而提倡居積之風萃集錙銖之款者為儲蓄銀行各省現已設有數處計則例十三條 等詳加查核尙屬周妥謹繕清單恭呈 御覽 欽定後即由 臣部行知該管衙門及地方官通飭各處銀行一律遵照辦理得 旨如所

議行○癸卯郵傳部奏三十二年五月十三日商部會奏鐵路佔地納稅申明定章一摺通行欽遵在案
原奏內稱官紳承辦鐵路佔用地畝除官道官河本不納稅應毋庸議外其購買民間地畝一經過劃糧
隨地轉卽由各該州縣會同該處辦路官紳勘丈明確仍照原額科則歸入鐵路公司按年完納至借款
官辦各路其合同條款切實載明不納地稅者暫行免收俟合同年滿照繳等語於各路納稅辦法業已
分別聲明惟今日官商續辦鐵路逐漸增多情形亦互有不同亟應安定詳細專章藉資遵守現經臣等
公同商酌除官款官辦及集股商辦各鐵路應仍照原奏自過戶日起照原業主科則徵收地稅外其借
款官辦各路所有資本均經利息折扣而來若取其納稅在 國家正供所賦爲數無多而各路擔承虛
數本息實覺積少成多倘因此不敷續借受欺更鉅擬無論合同內有無載明不納地稅一律俟全路通
車獲利再行照完其全路未曾竣工或工竣通車未獲餘利者均暫不完納以免多負外債至官商鐵路
所佔官河官道前奏業經聲明不納地稅現擬凡未經官用及未撥與民用之官荒如經官商鐵路用佔
亦均照此辦理又各省地方附徵之稅如畝捐隨糧捐等凡納稅之路應一併照納謹會同度支部擬定
官商鐵路完納地稅章程十條開列清單恭呈 御覽得 旨如所議行○甲辰升允奏蘭州城北瀕臨
黃河由甘省至寧夏甘涼各郡及赴新疆各郡等處凡西北大路往來者一切官商行旅皆須從此經過

每年春間向飭皋蘭縣估搭浮橋一座以鐵繩繫船二十四隻面鋪木板以便車馬往來入冬經冰凌冲激則浮橋輒斷又設渡船以濟之迨臘月河冰堅凝船不能渡改於冰上行走土人稱爲冰橋至開春凍解冰消復估造浮橋如初計搭橋渡船各項逐年經費已屬不支且冰橋將結將開之時往往半途失陷每歲溺斃人口牲畜不少病涉貶生於斯爲甚故大學士臣左宗棠前任甘督時已切鑒之會議建造鐵橋因洋商福克索價太昂中止奴才到任後屢與司道籌畫適德商天津泰來洋行喀佑斯游歷來甘願包修蘭州黃河鐵橋一道保固八十年議定橋價工料共銀十六萬五千兩其由天津至甘肅運費並修造時預估船隻木桿麻繩等項概由甘省認籌於光緒三十二年九月十一日訂立合同簽字分執隨卽酌付價銀飭該洋商回國運機購料以便興修據洋務局總辦蘭州道彭英甲具詳前來當經批准照辦並將合同咨送外務部查照在案現在鐵橋料件業已陸續運到立合同人喀佑斯招雇洋工華匠六十餘人亦已先後西來擬卽擇日動工自應奏咨立案查蘭州道彭英甲講求新政應卽廣成該道將鐵橋事宜一手經理以竟全功並派藩臬兩司會同照料總辦工程告蒞利濟行人所有橋價運費等項概由統捐溢收項下隨時覈實撥用作正開銷應懇 天恩飭部先行立案下該衙門知之○丙午 上御勅
政殿奧國使臣顧親斯基覲見○調馬安良爲甘肅新疆巴里坤鎮總兵以周玉魁爲伊犁鎮總兵○諭

都察院左都御史陸寶忠既據陳明戒煙淨盡著仍回任供職○丁未林紹年奏據豫省鐵路總協理禮部左丞劉果等呈稱豫省自辦鐵路經歷任撫臣提議光緒三十三年秋間奏奉 諭旨允准欽遵在案數月以來悉心研究路線及招股籌款辦法愈謂開洛鐵路比公司指日竣工洛潼路線非速籌自辦無以挽利權而維大局惟自洛至潼山重水複工程既鉅需費尤多本省地瘠民貧若專恃招股興修實苦力有未逮現在風氣漸開凡在豫官紳商民皆知維持公益於集股以外切願認捐庶期衆擎易舉食鹽一項爲全省人民所共需而鐵路鉅任卽宜爲全省人民所共負擬請嗣後豫民購鹽無論官運商運每斤均抽捐款四文雖一時不免自食實鹽而積少成多有裨路政在豫民既自樂輸納非特各商綱皆當協力卽蘆潞淮東各鹽政念脣商相依之誼無不主持提倡樂觀厥成一俟路工告竣此項捐款卽行停止仍復原價而顧民食惟既共認捐輸之義務卽應享路股之權利凡經手繳捐之官運商運亦應分給路股以昭公允此項捐輸四文收成鉅款後按照各引地提撥一半填給鹽商股票恩摺所得年息紅利均作爲該商等永遠財產再提撥一半填給地方股票恩摺所得年息紅利一律作爲該屬地方公款以辦公益在路工未成以前除撥歸鹽商利息照付外以地方公款所得緩辦公益暫移作保息抵款俾堅衆信似此統籌兼顧於行銷加價毫無窒礙計四綱所捐之款每年約可得銀四五十萬兩於路政大

有裨益等情當經行司會同糧道核議該司道等所見亦與各紳等大略相同會詳呈請奏咨前來臣
惟保路權卽所以保主權豫省鐵路現已勘定路線聲明自辦然亦勢在必辦查核籌款辦法果屬有益
於國於民並有益於商本與尋常加價歸公者不同且有路成停止期限事既竣辦公允自當力任其難
合無仰懇 天恩俯准勅部先行立案以濟要需而謀公益一俟接奉 諭旨卽欽遵分別咨行遵照辦
理總期洛潼一路早日開工莫爭先著出自 鴻慈所有招股籌款未盡事宜容俟另案奏明下該部知
之○戊申諭軍機大臣等陳璧等奏京城銅元充斥不盡關於奸商私販竄出京外各州縣折合銅元價
值所致著該督隨時嚴密查禁一面通飭各州縣不得私相折扣以保銅元行銷之利而維市面○諭雲
南布政使劉春霖著開缺來京另候簡用○以沈秉堃爲雲南布政使魏景桐爲雲南按察使○以方致
祥爲貴州威寧鎮總兵○郵傳部順天府奏設京師公估官局籌辦銀錢平價允之○已酉度支部奏內
閣鈔出督辦各省土藥稅稅事宜柯逢時奏遵照部議土藥稅局從緩裁撤請 飭妥定章一章程一摺
光緒三十三年十二月二十日奉 硃批度支部議奏欽此欽遵到部臣等伏查土藥統稅由八省而漸
擴各省一切開辦章程先據該督辦詳細釐訂經財政處會同臣部覆加考覈奏准通行卽間有變通亦
由該督辦隨時奏咨立案現惟東三省新疆尚未推廣其餘各省均按統稅定章一道收清概不重徵商

民稍便惟原議以鴉片流毒甚廣寓禁於徵首注重於整頓本銷開辦以來江皖督撫等省辦理頗著成效本銷稅項足敷撥陝西甘肅現在亦自籌辦法無須部局撥款獨川滇兩省變通出口稅章於本銷一項專藉口於零星散處無可稽查現當禁煙令嚴而川滇產數尤多亟應欽遵 諭旨各飭所屬切實辦理不得仍任民間自種自吸漏納稅項致失禁徵並施之意且本銷稅則經 臣部於上年十一月奏准得以隨時隨地酌量變通並以其稅項所入以一半解部以一半留歸本省此非特有裨川滇餉需並裁種販賣吸食各項亦得藉以稽查此川滇本銷之應另籌辦法也此外若浙省產土多在溫台因民風刁悍私販橫行地方官區不過間致稅項竟成無著閩省則部局既收土稅司局復徵膏捐稅與捐劃分為二顯與統稅定章不符查閩浙兩省額撥之款共祇數萬果能切實整頓其收數奚止倍蓰應由該督撫督飭地方官設法稽徵准其於本銷稅內每擔按照該省原徵科則撥還不為限定額數至東三省新疆目前既未開辦凡東三省新疆運入內地之土未貼部局照花者應由第一關卡照章每擔徵統稅一百兩並經費十五兩其各省運往東三省新疆之土凡已貼有部局照花者一概不得重徵其餘若鄂湘贛粵諸省產土亦屬不少現既奉 詔分年減種並令查明煙畝應即一律各飭所屬實力奉行不得恃有部局撥還銷稅即置本產於不問該督辦原奏請禁煙一事要在實查畝數以為按年遞減之根即為按

年徵收之據而爲扼要辦法況現當銳意禁煙稽徵尤不容緩應請飭下各省督撫轉飭各司局會同統稅分局認真辦理不得稍存膜禡倘有地方官奉行不力卽由該督辦指名嚴參請旨懲辦以重權務而儆玩泄至該督辦所請安定以後章程查原定統稅辦法已甚周詳具有應行變通之處統俟臣部所派司員調查回京後再與該督辦妥籌辦理又奏近來在京各衙門新添養廉經費前後統計約需銀一百三四十萬兩除軍機處御前大臣養廉察院王公盤費交進備賞等項銀四十餘萬兩經臣部奏明由江安糧道漕折膠濟關四成洋稅淮南票本等欸項下供支又內閣等衙門經費五十餘萬兩奏明由考察政治經費項下提撥外其餘不敷銀三四十萬兩均由部庫正欸支給各省原認考察政治經費近復紛紛欠解部庫出入有經此項常年之需勢實難於爲繼查京漢鐵路蘆保一段動用官欸五百六十餘萬兩前經臣部咨由鐵路大臣唐紹儀與比公司磋商將按年應得官欸利息劃定數目令該公司照繳嗣由鐵路大臣與該公司定立合同計每年應得恩銀二十八萬一千兩續准郵傳部將光緒三十二年分第一次結算利息公砒平足銀二十八萬一千兩解交臣部在案再查張家口殺虎口兩處稅務經臣部奏明改章整頓近據該兩處監督稟稱歲收數目比舊額均有盈餘前項經費不敷之數擬請按年由以上兩欸湊撥供支以資挹注得旨如所議行○庚戌以前任吉林將軍銘安鄉里重違費

加太子少保銜○丁槐因事開缺以龍濟光署廣西提督○辛亥以袁樹勛爲民政部左侍郎凌福彭爲
順天府府尹○以蔣勵華僑建正 文廟頒給 御書匾額○端方陳啟泰電致軍機處竊照江浙交界
地方島匪四擾經方等奏請特派江蘇布政使瑞澂專辦蘇松太杭嘉湖緝捕清鄉事宜該六屬牧令營
汛防軍歸其節制請遣奉 旨允准查蘇浙島匪以夏竹林余孟亭王老四蔡老七江北阿四石老大夏
小辦子吳小麻子爲渠魁黨與多寡不一而夏竹林兇悍狡險尤爲匪徒信服盤踞江浙太湖一帶經犯
搶劫殺人拒敵官兵之案擾害地方非止一日上年搶劫小輪之案該匪實爲創首居中指揮釀成巨案
往來行旅咸有戒心經方等督飭瑞澂調集小輪四艘酌派弁勇由方撥給快礮在內河來往巡緝蘇杭
兩處亦各照此辦法一面由方飭派三十五標統帶蕭先勝率帶該標第一第三兩營馳往松江太倉等
處三十大標統帶杜淮川率帶全標三營馳往嘉興各屬均經撥給馬克新快礮以資利用三十五標第
一營管帶孟平率帶所部一營馳往湖州南潯等處嚴密飭派管帶仰應環率帶所部一營馳往平望分
紮防剿均歸瑞澂節制調遣其江陰地方商山鄂督飭派統領曾廣大率帶全標三營前來填紮並悉剿
捕嚴緊匪由浙之湖州蘇之溧水迺往皖省廣德寧國等處嚴密飭派管帶剛兆麟率領所部一營駐防
溧水東汝駝嚴飭湖州防營及寧軍管帶孟平認真巡緝並商由皖撫飭派陳興鈺率帶所部全營分駐

甯國廣德等處以杜竄逸一面另派添募水師購置淺水輪船快礮俾厚兵力此奉 旨後密籌布置之情形也本月十二日飛划營統領徐錦棠率領管帶凌秉忠等剿匪於青浦縣尙民田等處斃匪五人受傷八人勇亡二名受傷二名十三日追至崑山縣陸家橋奮力剿捕接戰約六小時之久斃匪小老大顧壽根曹祥生擒獲王得標其餘斃者約廿餘人傷者甚衆匪首余孟亭夏小辮子均各受傷竄逃官兵傷者五人方等接獲電報飛飭各營合力兜剿江南提督劉光才率帶提標步隊親赴金山一帶督剿十八日匪竄金山縣劉巷市經甯軍蕭先勝督兵迎擊對敵良久匪傷極衆時毀橋梁竄逸沿河奮追捕獲兩匪起有金銀贓物十九日匪竄嘉善縣交界之楓涇地方先由嘉境登岸經杜淮川一軍出擊鏖戰三時之久擊斃在岸匪八名內有身穿紫袍指揮匪衆之悍目三名當場斬獲首級斃船傷斃及落水者不少奪獲匪船四隻鎗三桿是夜追至河口復有續來之匪與之對抗適甯軍來援將匪奮擊潰散時值黑夜不知傷亡確數官兵傷者一人是日復有匪黨大股在南柵口登岸圍劫軍火營經官兵看破開鎗向擊甯軍出營馳到夾攻其時提標總捕飛划等營俱到合力攻剿匪首夏竹林督隊抗拒勢甚兇猛鏖戰至五六小時之久經甯軍將匪首夏竹林斃並斃悍目施福山林小老大陸小老大孔小老大沈小老大朱小老大等六名及散匪十餘名生擒六名提標營擊斃四名內一名認係匪目左小老牛餘匪紛

紛落水不計其數奪獲匪船二十餘隻洋鎗數十桿子彈一隻銅礮一尊刀械號衣旗幟各數十件並起出銀錢金珠首飾衣物甚多二十日徐錦棠督率水師追匪至嘉善縣楊字圩奮力攻剿斃匪一名擒匪十二名傷者頗衆奪獲匪船十二隻並快鎗礮旗幟號衣多件內有原燈信函確係商輪被劫原贓訊據獲匪供認夥同行劫商輪不諱是日杜軍又奪獲匪船一隻斃匪二名生擒二名此數日來迭次剿匪獲勝之情形也伏查島匪根蒂深固黨與繁滋現經各營合力奮剿迭次獲勝將島匪巨魁夏竹林首先擊斃並生擒擊斃悍匪爲數甚衆洵足以懾匪膽而快人心茲飭將擒獲之匪訊明正法出力弁兵及陣亡受傷者分別犒恤起程各喊傳主認領無主者變價充賞一面由方等飛飭各營迅速跟蹤追剿務期盡數殲除並由瑞澂將各屬清鄉團練事宜認真舉辦以固民氣而清匪源抑方等更有請者剿匪一事全恃賞罰以爲勸懲嗣後倘有營官人等畏葸退縮甚或通匪縱逸擬請嚴參治罪其情節較重者卽予明正典刑牧令等官辦理清鄉團練不力一併從嚴參辦如有剿辦得力文武員弁亦懇從優獎勵至添募水師購置淺水輪船礮械並犒賞購綫一切需用款項當由方等會商卽在兩省海關雜稅項下提撥作正開銷實於剿辦島匪事宜大有裨益除查明此次出力員弁另行奏請給獎外所有剿辦島匪布置情形及迭次獲勝緣由謹請代奏 上諭軍機大臣等端方陳啟泰馮汝駱會同電奏悉該督等辦理剿

匪尙屬認真仍著嚴飭水陸各營乘此得手跟蹤搜捕務將各屬積匪悉數殲懲以絕根株而靖地方所擬賞罰辦法暨在海關雜稅項下開支稿實購總等費均著照所請該部知道○壬子雲南提督夏辛酉卒照提督軍營病故例賜卹准予原籍及立功省分建祠戰績交國史館立傳○以張勳爲雲南提督○癸丑以田振邦爲四川建昌鎮總兵○農工商部奏光緒三十三年十二月二十四日准軍機處片交本日副都統李國杰奏敬陳管見一摺又奏請飭廣東實力振興礦務一片均奉 旨農工商部議奏欽此欽遵傳知到部查原奏內稱富國善策莫如振興礦務我國人民勤儉耐勞於開礦性質尤爲相近英人經營南洋礦務利用華僑先以寬大廣爲招徠礦業既興乃逐漸修改章程以爲限制是以民樂其利而不覺其屬徵稅雖多而民不以爲苦若中國仿而行之合二十餘省之礦地歲入當可想見擬懇宣布明詔准各省人民不拘何項礦地無論官山民業聽報地方官給照開採不許佔地不辦領照半年尙未開辦者將照註銷另准他人承辦一面招勸殷商開築道路並勸設提化公司收贖礦質行棧遇有爭執官爲裁判曲直不必干涉商權農工商部奏定中國礦務正章七十四款附章七十三條限制防閑條理周密將來礦務盛興可杜一切之流弊現今風氣尙未大開商人或不免疑慮統籌大局不敢苟安緘默等語查礦產爲天地自然之大利中國山川雄厚蘊蓄尤多徒以風氣未開遂至棄利於地臣部設立以

後首先釐訂辦礦暫行簡章奏定頒行商民尙稱利便又奏設各省礦政調查局遴派員調查本省礦產列表報告並勸商民分投開採各省礦地按籍可稽商民試辦頗形踴躍向來南洋各處華僑多以採礦致富近因感服 朝廷德意漸知攜資內嚮興辦實業前經 臣部招致礦業起家之前檳榔嶼領事梁廷芳辦理廣東儋州等處錫礦上年 臣楊士琦奉 命攷察南洋商務復經招致著名辦礦之鉅商胡國廉辦理閩粵等處礦地業經發給執照並咨行地方官妥爲保護聞風興起當不乏人至英人在南洋屬地興辦礦務章程條例初從寬簡繼漸詳密蓋以開闢荒土利用僑民不能不尙智任術駕馭羈縻中國更始圖新情勢與南洋迥異所有一切法制自宜繁簡適中用垂永久升任湖廣總督 臣張之洞遵 旨擬訂礦務正章七十四款附章七十三條均係採取各國礦章折中損益視各國屬地所行之法則較密視其本國所行之法則較寬復經 臣部會同外務部遵 旨核議奏准頒行在案該副都統所請准各省人民不拘何項礦質無論官山民業聽報地方官給照開採不許佔地不辦領照半年尙未開辦者另准他人承辦各節均與礦章各條款所載互相發明惟定章請領執照須聲明各省礦局辦理勘礦以一年爲期展限以六月爲斷限滿不開可由他人承辦應請均仍照定章辦理提化公司及收斂礦嶺行棧誠於礦業大有裨助應由地方官體察情形招商擇地設立或籌集官本以爲倡導其僻遠之礦開通運道

尤爲要圖或以路礦或因礦修路應如何妥定章程擬由臣部咨行郵傳部籌畫辦理總之提倡礦業鼓舞商情在乎勸導之有方行政之不擾至於立法之寬嚴繁簡要賴行法者實力奉行隨時酌量以收盡利盡神之效臣部前於梁廷芳胡國廉等辦理各礦亦未嘗拘以行查限制之常例俾得迅速圖功但臣部爲礦政總匯之地而執行之權仍惟各省疆臣是賴應請飭下各將軍都統督撫飭令總理礦務各員周歷調查認真提倡將奏頒礦章各條款擇要曉諭商民俾人人知其簡而易行不至視爲畏途凡有稟請採礦者立予核辦其海外華商返國辦礦更宜相予以誠信勿得苛責以繁文庶足以資提倡而示招懷至附片所稱廣東籌款以賭餉爲大宗請飭下該省督臣實力振興礦務一俟稍有規模即將礦稅所入比較賭餉逐漸禁賭等語查廣東賭風素盛徒以鉅餉攸出一時難籌相當的款未能驟行禁止而流弊甚大不得不早圖良策設法挽回故凡以該省闔姓彩票等公司稟明臣部立案註冊者皆予駁斥今該副都統所奏以興辦礦務爲禁賭之法礦廠用人愈衆則無業者不必藉賭博爲餬口之資礦稅入款愈充則爲政者不必藉賭餉爲籌款之策一轉移間補救甚大該副都統情形熟習所言自切實可行礦務正章第六款載凡礦商呈繳之礦界年租及礦產出井稅並官地與礦商合股應得之紅利以一半解司庫充本省餉需等語將來粵省礦業大興礦稅所入不難與賭餉相抵應請飭下該省督臣

一俟礦務稍有規模即將礦稅賭餉互相比較酌劑盈虛次第禁止總期淨絕根株以爲正本清源之計
得旨如所議行○甲寅諭軍機大臣等錫良電奏悉滇省關緊重要該督素矢公忠辦事認真自當勉
爲其難以維大局據辦舊疾復發朝廷深爲系念著再賞假一箇月以資調養所請開缺回旗應毋庸議
○乙卯以梁如浩爲外務部右參議○調免浙江仁和等二十三州縣暨杭嚴衛衛所嚴所錢糧○調免
兩浙海沙蘆灘長亭杜濱浦東各場鹽課錢糧○是月奧大利亞國新簡駐華使臣顧覲斯基抵任

二月丁巳朔以李經楚爲郵傳部左參議○戊午祭社稷壇上親詣行禮○己未以袁大化署山

東巡撫○調朱壽鏞爲河南布政使以王人文爲陝西布政使調魏景桐爲廣東按察使以世增爲雲南
按察使○度支部奏查續借英德商款前經奏准以七處盤金作抵內蘇州貨盤八十萬松滬貨盤一百
二十萬九江貨盤二十萬浙東貨盤一百萬宜昌鹽盤並萬戶沱加價一百萬鄂岸鹽盤五十萬皖岸鹽
盤三十萬共盤金五百萬均自光緒二十四年閏三月十一日起由稅司代徵抵還洋款惟前項盤金業
已指明抵還洋款各該省京協各餉以及本處防餉等項向取給於盤金者勢必驟形短絀是以歷年臣
部籌款奏明撥補在案今本年自三月十一日起七處盤金仍由稅司代徵各該省所短盤金五百萬兩
自應仍由臣部照案撥補謹將籌撥各款開列清單恭呈 御覽並請 旨飭下各省督撫轉飭按照單

開數目分別撥解兌收以清款項惟是各省所短盤金既經臣部指款撥補在協解省分固當不分畛域勉籌協濟在受協省分尤當力爲其難凡向來應解京餉等項仍照常報解不得藉口出入不敷任意截留致有貽誤得 旨允行○庚申以大學士孫家鼐鄉舉重違賞加太子太傅銜○調趙爾巽爲四川總督陳夔龍爲湖廣總督○賞趙爾巽尚書銜作爲駐藏辦事大臣仍兼邊務大臣○外務部郵傳部奏蘇杭甬鐵路於上年七月間由外務部右侍郎汪大燮與中英公司商訂正約未就復由署侍郎臣敦彥與該公司接議擬分辦路借款爲兩事路由中國自造除華商原有股本儘數備用外仍需款英金一百五十萬磅向英公司籌借另指的款作抵俟商議就緒卽與訂立合同至造路辦法再會同郵傳部妥商辦理等情業經外務部於九月十四日具奏歷年與英使商論情形暨磋商借款辦法摺內詳晰陳明當奉諭旨著外務部卽派員按此妥爲議定詳細章程務期利我民商慎防流弊等因欽此欽遵在案嗣因江浙兩省紳商於此項路事原委未能洞悉兼之津浦鐵路借款合同亦未定議致未暇同時並舉迨十二月間津浦合同奏准畫押後卽酌派外務部右丞胡惟德右參議高而謙等按照津浦合同底稿並參以江浙兩省現時情勢查該省督撫等迭次來電另與中英公司代表濮蘭德逐節磋商復爭執至月餘之久始行定議臣等詳加酌核所訂合同二十四條名爲中國 國家滬杭甬鐵路五釐利息借款數目

係英金一百五十萬磅按九三折扣交納常年五釐利息以三十年為期若所收此路進項不足則由關內外鐵路餘利項下撥付凡提用款項均由郵傳部或其所派之人經理此鐵路建造工程以及管理一切之權全歸中國 國家該公司代購外洋材料機器以三萬五千磅作為酬勞一切用銀均包在內選用英總工程司一人該總工程司須聽命於總辦各等語名為鐵路借款而凡屬鐵路內之事實與該公司均毫無干涉尚無流弊之可虞臣等伏查蘇杭甬草約第二款曾言明將來訂立正約與滬甯正約一樣而滬甯正約所載若鐵路產業作抵洋員管理帳目虛數九折所得餘利以五分之一歸銀公司各節路權利機諸多損失不無遺憾江浙兩省思患預防殆有鑒於前車且由上海至嘉興一段路工業將告成若再由蘇州另繞興修則滬嘉一路幾成虛設現經該右丞等次第磋磨不用本省押款不須洋員查帳總工程司由我自選餘利用銀均先包盡路纜起點亦改定係由上海或附近上海俾與滬甯鐵路一氣銜接凡係兩省人民所注意之處罔不審慎推求期於就範謹繕具合同清單恭呈 御覽俟奉 旨允准再行簽押蓋印即由外務部照會英國使臣飭令該公司按照合同妥速辦理得 旨如所議行○壬戌諭軍機大臣等錫良電奏悉世增著於半月內起程迅速赴任毋稍延緩○癸亥調千式枝為禮部左侍郎以盛宣懷為郵傳部右侍郎○調李經羲為河南按察使左孝同為江蘇按察使○諭御前行走

御前侍衛乾清門行走前已賞過津貼銀二千兩著改爲每月賞給津貼銀一百兩由度支部給發
○諭軍機大臣等西藏爲川蜀藩籬地方廣莫番民蒙昧舉凡練兵興學務農開礦講求實業利便交通
以及添置官吏整飭庶政諸大端均應及時規畫期於治理日益修明現經降旨派道爾豐爲駐藏辦事
大臣特加崇銜以重事權並調趙爾巽爲四川總督以免扞格而便聯絡應卽責成道爾豐會同聯豫察
度情形將藏中應辦各事通盤籌畫詳擬章程次第奏請施行需用人員准由四川省慎選調派厚給薪
資優定獎勵均准其攜帶眷屬各令久於所事應需款項著度支部按年籌撥的款銀五六十萬兩俾濟
要需並由四川總督無分畛域隨時接濟尋度支部議覆自本年起於四川應解俄法欵內截留二十萬
兩英德欵內截留三十萬兩其四川應解俄法英德欵銀卽由江海關於洋藥稅釐項下如數墊解報關
○農工商部奏臣部於本年正月十一日准軍機大臣字寄奉 上諭近年紗布進口日多民間紡織漸
至失業著農工商部考察各國棉花種類種植成法編集圖說並優定獎勵種植章程頒行各省認真提
倡未頒章程以前著各督撫先行勸辦如有成效應令將所產棉花送部查驗准其奏請優獎等因欽此
欽遵寄信前來臣等伏查棉業一項向爲土貨大宗自各國棉貨日益精良未免相形見絀比年關冊所
載進口各種棉紗布疋絨貨等項歲值銀至一萬五千餘萬兩漏卮之鉅深可駭歎臣部開辦以來首以

整頓土貨爲要義棉業一端尤深致意於三十年四月間通咨各出使大臣攷查各國商務暨棉業情形於三十一年二月間札飭上海等處商會傳知各商整頓棉業清盤積弊於三十二年二月間通咨各省調查全國棉產種類暨歲收總額以備稽核各在案查各省產棉之區以江蘇之通州海門崇明太倉寶山等處爲最盛通海歲產約一百三十餘萬石崇明太倉寶山等處產約八九百萬石此外如順天之涿州薊州武清良鄉各屬山西之蒲州解州絳州各屬河南之安陽洛陽靈寶鄧州各屬湖北之德安黃州漢陽各屬安徽之懷寧潛山太湖宿松各屬雖產額多寡不一而於種棉製棉之法大都因仍舊習未能力求精進迭經臣部通飭整頓並採譯美利堅種棉法日本紡績規約札行各商會統籌改良辦法一面提倡工業獎勵織品於紡紗織布各公司呈部註冊立案者罔不優加保護擇尤彙獎以期風氣漸開爲自保利權之計此臣部歷年辦理棉業之情形也此次欽奉 諭旨通飭整頓亟應欽遵辦理臣等通盤籌畫提綱挈領擬分調查提倡保護三期辦法刻先從調查入手除通咨各出使大臣轉飭商務隨員詳查該國棉花種類種植成法并選購種子繪圖貼說迅寄臣部彙核外一面由臣部擬訂表式通咨各省將全境棉業情形再行詳晰調查遵式列表各省所屬地方土性宜棉者若干處業經產棉者若干畝歲收平均之數畝得若干量以何屬爲最多以何區爲最良以何種爲最佳以及歷年積歉分數衰旺原由

及所出紗布歲額若干行銷能否暢旺比較洋紗洋布良格優劣差別若何卽由各商務議員商務總分
各會分別考核彙報臣部續行遴派農料專門人員分往各省測驗天度之寒燠審察土性之燥濕辨別
種類之良窳採用泰西農學家選子交種培肥料去害蟲諸法集訊鄉農實行試驗務令人人知棉業爲
大利所在其業經產棉地方固當研究改良競求進步卽未經種棉之區亦諭令相土之宜量爲試種以
興地利西北諸行省土性高燥地本宜棉尤宜加意提倡廣闢利源一俟辦有頭緒再由臣部通咨各省
招商設立紡織工廠訪購新式機器改良織品務求精美期與各國紗布棉花相埒其出棉產地以及行
銷處所並通飭地方官妥爲保護以資獎勵俟編集圖說擬訂章程再行奏明辦理報聞○郵傳部奏光
緒三十三年七月十一日准軍機處片交御史沈潛奏開辦郵政宜疏濬運河添駛小輪片奉 旨郵傳
部議奏欽此遵卽分咨查勘去後茲准署直隸督臣楊士驤擬稱北運河自漕糧改運河身淤高若裁濬
取直不獨工大費鉅未易籌辦且恐截溜引水漫溢爲害仍於行駛小輪無益南運河因上游河南懷慶
衛輝等府借水灌田來源減少河身淤高若欲一律開通行駛小輪無論鉅款難籌仍恐水勢太弱難資
浮送署山東撫臣吳廷斌稱黃河以北之北運河前經升任撫臣楊士驤奏修由東昌至臨清九十餘
里此外幾如平陸未易規復黃河以南至江南交界之南運河共長五百餘里全恃汶泗兩河爲一綫來

源水過沙停不免淤淺現擬修濬八閘酌挑淺灘當再奏明辦理惟小輪喫水既深日行數百里開闢啟閉諸多窒礙恐難行駛兩江督臣端方覆稱吳下河淮揚三屬所管境內地窪水深雖有數處淺阻量予疏濬小輪往來可期便利俟估計明確再行奏辦至運河廳所管三汛河身高仰淺灘林立現擬仿照濟漕章程堵閉七閘酌加挑濬雖小輪仍難行駛於商船不無裨益與山東修濬八閘酌挑淺灘辦法同業經彼此派員會勘各等語先後咨電前來查疏濬運河開通航路不獨郵遞便捷並可振興商業惟運河通貫數省情形不一迭據各省查覆惟江南之裏下河淮揚三屬地窪水深雖有淺灘數處酌加疏濬行駛小輪可期便利應由該督臣速飭勘估辦理山東運河所擬修濬八閘江南運河廳三汛所擬堵閉七閘各加挑濬雖未能行駛小輪究於商船有益現在山東撫臣業將修濬八閘需銀十二萬五千餘兩並查明韓十字河衝翼運河不加修治運河仍受其害應卽一併挑濬需銀九萬兩均已奏明分別辦理俟工竣再行核實造報其江南運河廳三汛所擬堵閉七閘亦應由該省督臣迅派委員早日興工仍將勘明辦法詳悉奏報至直隸南北運河均見淤高山東運河除東昌至臨清前已奏修外其餘幾如平陸據稱同時並舉籌款爲難自屬實情但聽其湮廢殊於交通有礙擬請仍由各該省督撫隨時體察情形擇要興辦如此分別辦理庶鉅款不致難籌小輪商船可冀逐漸暢行實於郵政商務均有裨益恭候

命下臣部遵卽分咨辦理得 旨如所議行○乙丑諭郵傳部右侍郎盛宣懷著仍派充會辦商約大臣前赴上海妥協經理○以吳郁生署吏部右侍郎沈雲沛署郵傳部右侍郎○憲政編查館奏光緒三十三年十一月二十日欽奉 懿旨憲政編查館會同民政部將關於政事結社條規斟酌中外妥擬限制迅速奏請頒行等因欽此嗣經御史趙炳麟片奏開會結社未可一概禁止等語奉 旨憲政編查館知道欽此臣等竊維結社集會種類甚夥除秘密結社潛謀不法者應行嚴禁外其討論政學研究事理聯合羣策以成一體者雖用意不同所務各異而但令宗旨無悖於治安卽法令可不加以禁遏其在歐西立憲各國愈進步人民羣治之力愈強而結社集會之風亦因之日盛良以宇宙之事理無窮一人之才智有限獨營者常絀而衆謀者易工故自學術藝事宗教實業公益普舉推而至於政治無不可以稽合衆長研求至理經久設立則爲結社臨時講演則爲集會論其功用實足以增進文化裨益治理然使漫無限制則又不能無冒昧事維之虞是以各國既以人民結社集會之自由明定之於憲法而又特設各種律令以範圍之其中政治社會關係尤重故國家之防範亦彌嚴先事則有呈報以杜患於未萌臨事則有稽查以應變於俄頃上收兼聽並觀之益而下防漸戢張凌亂之風立憲精義實存於此中國古昔雖無政治結社集會之名而往往有政治結社集會之實周永百家競勝各聚朋徒儒兵名法諸家雖

有道德功利之異而同聲相應驟與政治結社無殊其後寓論政於講學善則爲河汾之辨治閩洛之談經足以培養人才扶持國是不善則爲南宋之三學晚明之諸社馴至激發橫議牽制朝廷是以經訓不禁鄉校之遊而王制惟嚴莠言之辟臣等仰體 聖謨參酌中外謹擬成結社集會律三十五條除各省會黨顯干例禁均屬秘密結社仍照刑律嚴行懲辦外其餘各種結社集會凡與政治及公事無關者皆可照常設立毋庸呈報其關係政治者非呈報有案不得設立關係公事者雖不必一一呈報而官吏諭令呈報者亦當遵照辦理如果恪守本律辦理合法卽不在禁止之列若其宗旨不正違犯規則或有滋生事端妨害風俗之虞者均責成該管衙門認真稽察輕則解散重則罰懲庶於提倡輿論之中不失納民軌物之意 國家徵備立憲必以是爲基礎矣惟各直省情形不同其稽查約束之方如有應行酌量變通之處由各該督撫等體察情形隨時奏明諭 旨辦理得 旨如所議行○丙寅諭向來問刑衙門承訊案件完結各有定限乃近來官吏積習於訟獄一事罕能實心清理或聽信胥役稟傳多人或怠惰安逸傳案不訊或祇見昏瞶聽斷無才或瞻顧不斷靜待和息以致羈繫甚多結案甚少無罪者痼斃率累者破家冤慘情狀不忍親聞爲民牧者誰非來自民間設身處地何以堪此卽使不能懷遵例限亦豈盡泯天良卽如大理院承訊春阿氏一案現已延至年餘尙未斷結京師如此外省可知方今朝廷體恤

民瘼修訂法律正汲汲以恤刑保民爲務若此等舊例所有之事尙不能實方奉行更何望其剷除弊根一新吏治乎特此剴切嚴諭法部大理院暨各省督撫著卽通飭所屬各員凡有自理暨承審上控京控案件均須隨到隨訊虛衷研鞠秉公定斷務令按限清結履定考核懲之法京師大理院審判官及外省有司衙門發審督審各局必須選擇明決之員使充此任經此次通諭之後倘仍疲玩不悛殘民以逞一經被人參劾控告除將該承審之員從嚴懲辦外定將該堂官督撫一併懲處斷不姑寬○外務部奏前總理衙門奏明地方官與教士往來事宜一摺附繕清單五則光緒二十五年二月初五日奉硃批依議欽此查奏單內開總主教或教主請見督撫司道府廳州縣其督撫司道府廳州縣各官亦按照品秩相答等語彼時總理衙門議訂地方官與教士往來事宜原期有裨教務惟該主教等在華傳教本無官職之可言實非與督撫等官同其品秩近來地方官按約接待教士已與前此訂章之時情形不同且自該章程通行以後該教士等竟有僭用地方官儀仗情事以致無知愚氓輒多誤會亦殊非當日訂章之本意亟應因時制宜以期妥協相應請 旨將前總理衙門所奏教士與督撫司道府廳州縣等官按照品秩各節卽行一體撤銷嗣後地方官與教士往來應仍查照約章以禮相待恭候 命下卽由臣部咨行各省轉飭遵照得 旨如所議行○端方奏蘇省太湖地方界連江浙水程遼闊港汊紛歧向

爲島匪出沒之所近來匪勢日益猖獗往往聚集匪船數十艘四出搶劫日前且有攔劫內河商輪重案每遇官兵追剿卽行竄入太湖巢穴深窳僅恃蘇省原有緝私礮船斷難制勝必須製造淺水巡輪數艘裝配快礮專令巡察太湖及內河一帶無事則往來查緝有事則駛往剿捕庶足以壯聲威而資利用業經臣等飭令上海船塢妥擬式樣並一切造法擬用梢木船梁船身長六十英尺寬十一英尺六寸艙深四英尺喫水二十英寸連牽約每點鐘九邁當船首安設機器快礮二尊取其能旋轉施放至太湖水內多草行輪每多妨礙該船輪葉周圍力求堅固務期靈便鋒利鼓輪時可以隨勢刈割自無阻滯每艘佔需工料實銀八千三百兩礮價不在其內已飭如式趕造兩艘先行試用造成之後歸甯蘇兩屬各購一艘所需工料銀兩卽由甯蘇照數分撥其需用快礮屆時設法購配一併核實報銷下所司知之○以查春華爲甘肅新疆阿克蘇鎮總兵○丁卯以瑞豐爲度支部左侍郎○戊辰以莊廣良爲湖南布政使調陸鍾琦爲湖南按察使陳夔龍爲江西按察使楊文鼎爲湖北按察使○憲政編查館奏光緒三十三年十二月十五日准民政部咨稱本部會同法部具奏訂擬報律草案請 旨飭下憲政編查館考覈奏定施行以資遵守一摺光緒三十三年十二月十三日奉 旨依議欽此欽遵鈔錄原奏並清單前來臣等查閱原奏示議論之準繩杜詆誤之隱患用意至爲美善竊維環球各國莫不注重報紙凡政府之

命令議院之裁決往往經報紙之贊成始得實行無阻英且與貴族牧師平民列入四大階級之一頁以報紙之啟迪新機策勵社會儼擇文明進步之樞紐也然利之所在弊亦隨之激揚清濁不無代表輿論之功顯倒是非實滋淆惑民聽之懼以故各國俱特設專例爲之防閑如俄羅斯瑞士挪威並明定之於刑法或違警罪中而俄之鈴東爲尤烈中國報界知識甫熾際茲撥備立憲之時固宜廣爲提倡以符百論自由之通例而橫言汜濫如川潰防亦宜嚴申厲禁以正人心而昭公是檢閱原案四十二條蓋折衷於日本新聞條例酌加損益尙屬周密惟第十四條第一款之詆毀 宮廷第二款之淆亂政體第三款之擾害公安皆侵入刑律範圍現在逆黨會匪竄伏東南洋一帶潛圖竊發方且藉報紙之風行逞狂言之鼓吹此等情形久已上煩 宸廑如照原案第二十一條之例僅處二十日至二年之監禁附加二十圓至百圓之罰金殊嫌輕縱似仍應分別情節輕重辦理臣等公同商酌擬請將原案第二十二條改爲違第十四條第一款至第三款者該發行人編輯人印刷人科六月以上二年以下之監禁附加二十圓以上二百圓以下之罰金其情節較重者仍照刑律治罪其餘各條亦多詳加修補悉心改正共盤訂爲四十五條敬繕具清單恭呈 御覽如蒙 俞允擬請 飭下民政部通飭各省一體遵行得旨如所議行○乙巳轉寶銘爲吏部左丞以孫紹陽爲吏部右丞轉毓晉爲吏部左參議以吳敬脩爲吏

部右參議○命寶熙沈雲沛幫辦資政院開辦事務○伊犁將軍長庚奏現辦練兵購械興學商務工藝情形得 旨著卽分條認真籌辦速收實效勿得徒託空言○辛未政務處奏光緒三十三年十二月二十一日准軍機處鈔交熱河都統廷杰奏新開蒙旗各地方亟應添設州縣等缺一摺奉 硃批會議政務處議奏欽此竊維熱河形勢控制邊疆拱衛 畿輔所屬蒙旗地面極爲遼廓從前以游牧之地事簡人稀設官無幾迨光緒二十九年都統錫良卽以熱河州縣轄治動輒數百里非添官不能兼顧等情奏添一府兩縣近則墾務日闢旗務日繁蒙漢雜居尤應酌增員缺以資治理原奏請赤峯一縣兼轄翁牛特等九旗內阿魯科爾沁東西扎魯特以及巴林左右翼等旗又皆散處於潢河以北及阜新縣屬之小庫倫一旗毗連錦義爲馬賊游匪出沒之區距該縣治四百餘里均屬鞭長莫及各等語既經該都統審度形勢妥籌布置自係因地制宜應卽准其於阿魯科爾沁東西扎魯特三旗地方添置一縣曰開魯縣於巴林左翼地方添置一縣名之曰林西縣而以原有之赤峯縣升爲赤峯直隸州知州以兼轄新設兩縣其原設赤峯縣典史改爲州吏目以符體制並准其於小庫倫所屬庫街地方建立一縣益之以奈曼一旗名之曰綏東縣仍歸朝陽府統轄其東土默特喀爾喀二旗則仍隸阜新縣管理以便鎮攝而分權限至所稱建置伊始當爲根本改新之圖屏去贅文請求新治及遴選委員分別試辦試署各節係屬

便事核實起見並請 飭下該都統等遵照所擬認真經理此外如應設佐治各缺及劃分地段後之詳細圖冊慎揀妥員後之廉俸印信並建拜衙署一切未盡事宜統由該都統會同署直隸總督妥爲籌畫隨時奏咨辦理得 旨如所議行○于申楊士琦奏 臣奉 命前往南洋考察商務於上年九月二十日乘海圻海容兩兵艦由上海放洋歷經美屬之飛嶺濱法屬之西貢暹羅之曼谷都城和屬爪哇之巴達維亞三寶壟泗水日惹梭羅及附近蘇門答臘之汶島英屬之新嘉坡檳榔嶼及附近之大小露露等埠所有考察大概情形業經先後電奏在案伏查南洋各埠爲神州之外府瀛海之奧區唐宋以來始通中國航舶互市琛寶偕來昔人所謂海外雜國東南際天地以萬數時候風潮入貢者也自西人航海東來逐漸佔據始則通商建埠久而屯戍設官豆剖瓜分夷爲領土者有之蠻酋島長僅有存者而中國海疆多事亦萌芽於此然地當赤道炎瘴最深西人以水土不宜居留甚少土人則性情喬野營窟偷生惟我國閩粵之人生長南紀耐勞冒險所到之地類能剪除榛莽手闢利源其流寓久者已數百年擁貨巨者或數千萬而衣冠禮俗仍守華風應市規模猶同內地敦本思源之念有足多者 臣舟車所至廣布 皇仁博裕民隱舉凡工商消長之原物產盈虛之故與夫疆域戶口政令風俗之宜謹就考察所及爲我皇太后 皇上陳之飛嶺濱羣島大小千餘以小呂宋爲最巨其地西連閩粵北枕臺澎距香港廈門均

不過二千餘里土產以煙糖麻米爲大宗轉售行銷皆操自華人之手貿易則閩商最盛粵商次之商會學堂醫院銀行規模具備惟商稅既重工禁又嚴來者日形減少前此華僑不下十餘萬人現在統計戶口不滿四萬而市面亦因之減色美官紳漸知非策始議設法招徠本年正月間在該埠特開賽會凡華人來埠者一律優免進口稅名爲賽會意在招商臣晤美督時亦彼此推誠商榷以期互收利益業經函知臣部酌核辦理西貢爲越南沿海巨埠上通瀾滄江內連南圻各省水陸輻輳商貨流通華僑約五六萬人其散處各省者共二十餘萬距海口十二里有巨市曰隄岸係華人貿易薈街尤爲富商所萃土沃宜稻播種於田不煩耘耨故產米之富甲於海南運銷出口者歲約一千二百餘萬石未經墾闢者尙多碾米公司九家而華商居其七米市利權幾盡歸華掌握惟人心渙散因省縣之異分爲五幫曰閩幫廣幫潮幫瓊幫客幫各立公所互分畛域經臣邀集各幫商人勸令聯絡一氣迅設商會學堂並助法幣二千爲之提倡該商等咸感激樂從不久可期成立暹羅爲南洋大國北接滇傲東西介越南緬甸之間越隴於法緬躬於英獨暹羅尙能自立近歲採用西法外交內政均極講求惟民貧財殫於海陸軍備尙未能擴充整頓其都城曰曼谷居湄南河下游民物殷阜產米鹽賤均於越南象牙犀角瑪瑙燕窩尤稱珍品全國華僑約三百萬人氣誼團結過於西貢暹政府間歲課華民身稅一次特爲入款大宗此外尙無苛

待情事現聞粵各商正在籌設商會復經臣手札勸諭商情益形鼓舞俟訂定章程後卽呈報臣部奏明立案爪哇全島大於和蘭本國四倍分爲二十三府環海而治西部五府以巴達維亞爲都會中部九府以三寶壟爲都會東部九府以泗水爲都會日惹梭羅則爲內地著名都會其地在赤道以南與澳洲相近氣候炎燠土脈膏腴物產最富東部以糖業爲大宗西部以米業爲大宗瀕海則擅魚鹽近山則饒林礦華僑散居全島約六七十萬人和官選其才者爲馬腰甲必丹等官專理華民事務各埠現已設立商會七處學堂四十餘所頗能請明大義愛戴君親民氣最爲純樸惟和官稅重政苛事事稍制華人不以平等相待汶島屬蘇門答臘在爪哇之西北地富錫礦礦工五萬餘人均係粵籍華工入境後卽受和人束縛食以粗糲居以茅茨且道經該島停輪撫慰並派員往視附近礦場華工數百人環求拯拔情殊可憫亟宜設法保護以衛民生暹羅之西南海岸有地如股斗入海中內多巫來山部落皆屬暹羅轄爲地股今歸英人保護統名曰海門屬部地股之極南有島曰新嘉坡幅員甚小農產亦稀自英人開埠後免稅以廣招徠由此商舶雲集百貨匯輸遂爲海南第一巨埠華僑十二餘萬人工商而外擅陂沼園林之利商會成立最早勢力甚雄英官頗假以事權而海外各商會亦以此爲樞紐學堂四所課程規則悉遵學部定章宗旨純正英人法令頗爲寬簡商民尙得自由惟五方雜處良莠不齊奸宄之萌尙難盡

絕地股之西岸有島曰檳榔嶼商務亞於新嘉坡而農產過之果品海產尤爲出口大宗華僑二十餘萬人自商會成立以來公訂規條自相約束游惰者資之回籍貧窶者教以營生英官頒行新例有不便商民者商會得援律駁阻故華人極限以此埠爲最寬中華學校一所爲前太僕寺卿張振勳等所設經臣部奏明立案蒙 恩賞給匾額一方圖書集腋一部 宸翰題規模遂爲各校冠從前商人子弟肄業英校者僅以律師醫士起家今則請求政學研究中文商智漸形發達由檳榔嶼東渡海峽登大陸迦山南行而至大小霹靂亦海門屬部之一四山皆礦產錫最饒華人來此往往以赤手致富所產之錫歲值九千餘萬元由檳榔嶼出口運銷東西洋近歲錫價低賤年甚一年業此者頗多折閱若礦業一停則華工二十萬人皆虞失所而新檳兩埠商務亦視此爲盛衰關鍵至爲鉅要以上所歷皆係通都大埠華僑薈萃之區商務以新嘉坡檳榔嶼爲最繁物產以小呂宋爪哇西貢暹羅爲最富而經營壘關全恃華人故論南洋者輒謂西人雖握其政權而華人實握其利柄其中不乏開敏通達豪傑有志之士徒以懸隔海外不親中國禮樂衣冠之盛者幾數百年忠愛之忱永由自達此次蒙 朝廷特派專使撫慰商民以爲奇榮使車所至衢市閭閻家設香案戶懸國徽結綵張燈恭迎 恩命臣每抵一埠卽赴商會學堂公所等處演說敬謹宣布 皇太后 皇上德意萬衆聞聽額手嵩呼歡聲雷動外人旁觀亦爲改容觀民

心愛戴之深可知 聖化涵濡之遠所到各學堂均酌給獎賞以資鼓勵總期爲 朝廷多布一分膏澤
卽爲僑氓多添一分感情至獎勵保護及一切應辦事宜另摺陸續奏明辦理報聞○癸酉署黑龍江巡
撫程德全因病奏請開缺允之○以周樹模署理黑龍江巡撫朱家寶爲吉林巡撫○以何彥昇爲直隸
按察使○趙炳麟奏臣於光緒三十三年十月初三日奏請勸求 帝學仰蒙 兩宮採納令孫家鼐等
逐日進講我 皇太后 皇上睿智淵深 宸衷沖挹臣迂陋小儒何足窺見萬一然有 君如此臣冀
其媲美於唐虞三代之隆以強吾國而救吾民此志未敢一日去諸懷抱者也臣觀後世奏疏惟宋臣朱
熹述帝王之治理極其精微論亂亡之陋習極其沈痛熹嘗望其君以勸求上理力挽京流乃其君不能
用後數百年至我 聖祖仁皇帝一切用人行政無不由於朱熹之學說咸豐間倭仁曾國藩諸臣亦以
其學事 文宗憲平大難臣考朱熹論治要領不外振綱紀厲風俗嚴賞罰辨是非肅宮闈杜賄賂之數
者必人君學識進於明強而後萬事萬物之來如影在鑑地疑莫遁以此進退臣工督責功過曷事不舉
曷令不行故人君之一心又爲萬政之本也臣不揣樸昧謹將朱熹奏疏關係治本者節其要而擇其精
彙輯爲書恭呈 御覽不過萬數千言而法戒備於此矣得 旨書留覽○命胡惟德充出使日本國大
臣○外務部奏光緒三十二年十月初六日准軍機處鈔交本日會議政務處奏籌擬禁煙章程摺單一

件奉 旨依議欽此欽遵到部查原奏清單第十條內開洋藥來自外洋事關交涉應由外務部與英國使臣妥商辦法總期洋藥與土藥逐年遞減屆期同時禁絕又印度洋藥而外尚有由波斯安南南洋和屬輸入中國者亦屬不少如係有約之國可商諸該國使臣一體嚴禁如係無約之國可施行我國自治法權嚴禁進口並由各將軍都統督撫等督飭所屬暨稅務司於各該省水陸邊界設法稽查以杜走私漏關越又查有嗎啡一名莫啡鴉及刺入肌膚之嗎啡鍼其損體傷生較之鴉片尤甚應查照中英續議通商行船條約第十一款中美續議通商行船條約第十六款切實申明分飭各稅關如查有不因醫治使用販運來華者一概不准進口並嚴禁中國舖戶無論華人洋人均不准製煉嗎啡及製造此項之鍼以期弊絕風清等語當由臣部商擬辦法六條一洋藥分年遞減以五年內進口總數折中定額自一千九百七年以後年減一成十年淨盡一印度之嗎里古達為洋藥總匯之地由中國派員前往監視拍賣打包得知發運洋藥實數一土藥稅每擔現已加抽至一百十五兩洋藥力址併於土藥而原有之釐稅併徵祇一百十兩應照原定之稅數加倍徵收以微為禁一香港為洋藥熬膏之地應由港督協助嚴禁煙膏不得運入中國境內一租界內煙店煙館及各吸煙之所并各行店售賣煙具其清查籌禁之法照中國地方官辦法一律辦理一嗎啡及嗎啡鍼之害設法禁止已載在中英中美新約惟須有約各國應允

照行方可舉辦現擬即時舉辦切實施行繕具節略面交英國駐京使臣請其轉達英國政府上年該使臣迭與臣等晤商往來文牘議定第一節印度洋藥以運往各國之全數爲限制以印度出口五萬一千箱之數爲定額按年遞減五千一百箱自一千九百零八年爲實行之始十年減盡第二節派員前往印度之噶里古達監視拍賣打包申明該員祇查發運洋藥實數並不干預他權第三節洋藥稅釐徵收加倍以土藥統捐及土藥價值非一時所能調查明確所有加徵稅釐之議稍緩續商第四節香港所熬之煙膏禁止運入中國境內兩國各行設法自防在本境私入之弊聲明港膏禁止出口入華并禁止煙膏由華入港之貿易第五節各口岸租界內禁止煙館及吸煙處所并不得售賣煙具如華官在各項租界外實行照辦各該處工部局不俟華官之請自行設法辦理第六節禁止任便運入嗎啡及嗎啡鍼一俟有約各國全允卽應照行經英國政府應允由該使臣照覆臣部在案至洋藥有從越南及南洋各島運入者經臣部照會法國和國駐京使臣協助嚴禁查澳門亦爲洋藥轉運之地又爲洋藥熬膏之區并經臣部照會葡國駐京使臣分行申禁各在案惟波斯爲無約之國得可自行設法限制洋藥進口已由臣部咨行稅務處轉飭總稅務司籌擬辦法其嗎啡及嗎啡鍼禁止任便運華本先於光緒三十二年三月間通行照會各國陸續准各該使臣照覆多已應允祇有日本尚未照覆計此事關係甚重諒亦無不贊

成此臣部與各國商議禁煙辦法之情形也竊維禁煙一事原屬美舉各國本有同情而印度爲洋藥所
從出之區經臣部與英國駐京使臣籌商報告政府卽允爲竭力相助決議印度出口之洋藥自一千九
百零八年正月起爲實行遞減運數之期是英國之有意協助禁煙足徵睦誼惟曾經聲明試行三年視
中國於栽種及吸食實行減少限滿再行遞減等語是於減種土藥一端必須自行切實辦理并如何嚴
禁煙館之開設與煙具之售賣務須認真查辦使吸食者日形減少方可以對待外人查西歷一千九百
八年之正月爲中歷三十三年之十二月自彼時起在印度之洋藥業已減運來華轉瞬三年卽爲限滿
所有英國聲明各節全視中國之能否切實施行機不可失而事無可緩臣等公同商酌擬請 飭下民
政部度支部速行會訂稽核章程通頒直省責成各該督撫實力奉行其府屬州縣卽以此爲考成不得
玩誤因循空言搪塞庶期沈痼可去而大害以除足鼓國人振拔之新機并足副各國贊成之美意 上
諭據外務部奏籌議禁煙與各國商定辦法暨另籌抵補藥稅各摺片鴉片煙盛行以來流毒異常慘烈
染斯疾者破其財產天其壽命習爲偷惰職業全廢卽各直省吞煙自盡之案歲計不知凡幾盜賊訟獄
因此滋繁傷天地好生之心殊堪悲憫且令神州古國種類日弱志氣日頹自強更復何望近來官紳士
庶多知悔悟爭相結社勸戒卽聚賭鴉片者亦未嘗不痛心疾首自怨自艾各國善士尙多倡設公會勸

禁裁賈廣施藥方每以中國鴉片不除引爲深憾則身受其害者應如何淬勵奮發力拔根株前經降旨頒布禁煙章程期以十年使洋藥與土藥同時禁絕現經英國政府允許分年減運各友國亦多樂爲協助文明之舉嘉慰良深英國現已實行遞減相約試行三年視中國裁種吸食實行減少限滿再爲推減我若不如期禁查轉瞬三年何以答友邦政府之美意何以慰各國善士之苦心此機一失時不再來若永遠困於沉痾勢必無以爲國我君臣上下一念及此能無愧悚難安引爲疚責著民政部度支部迅卽會訂稽核章程嚴定考成請旨頒行一面責成各督撫按照政務處奏定成案督飭所屬切實舉行並體察該省情形將減種減食實在辦法先行奏聞所有按年減少數目每屆年終彙奏一次其藥稅指抵各款由度支部另行籌補以備應付事關國勢強弱民命壽夭著內外臣工協力通籌認真辦理無論如何爲難必期依限斷絕毋得稍涉因循致干重咎餘依議○外務部奏光緒三十三年十二月十三日准軍機處鈔交署理北洋大臣直隸總督楊士驤署山東巡撫吳廷斌會奏東省酌設辦理洋務商稅專員一摺奉 硃批該部議奏欽此欽遵到部查原奏稱東省洋務日趨繁重不但威海膠澳交涉緊要此外凡有商埠路礦教堂之處無不關係全省大局必須設有專員妥慎經理擬請酌量設缺援照奉天添設交涉司成案添設山東全省交涉道兼兵備道銜責成該道辦理全省洋務兼監督濟南周村濰縣三商埠

事宜并擬在濟南設關在周村兩處添設分關以扣其所運貨物稅捐其關道卽以奏設之交涉道兼充所收稅捐留撥三商埠常年經費該道應領廉俸公費暨本署應支各款擬請從優核給再聲明該道俟奏准設缺後遴選熟習本省洋務人員先行奏補一次以後再按照各海關章程辦理等語等查東省洋務近來益形繁重原屬實在情形著北洋大臣等擬請添設辦理交涉道員自係因時制宜起見惟以道員管理山東全省交涉事務則該省原有登萊青道監督東海關向來管理該地方交涉事宜於權限殊有未清若歸其統轄於體制亦有未合如援照奉天添設交涉司成案議設交涉司則職權又未免過大且等公同商酌署北洋大臣等所請添設東省交涉專員之處應暫緩置議俟改定外官官制一律實行後再行照辦該省洋務緊要原設有洋務局應當行責成該局員隨時稟承該撫辦理所有濟南周村濰縣三商埠監督并議仍照向章由濟東泰武臨道兼充以免紛更而重責任至設關徵稅一節查該處洋貨悉由膠州進口業經該關徵稅後已無可重徵祇該處土貨出口得有應徵稅項但係出洋貨物則膠關自必按照稅則徵收似於稅項尙無關係且一經設關常年經費浩繁稅項所入恐亦未必能抵所出當該三商埠初開時原奏明暫不設關徵稅以廣招徠現在各該埠商務亦尙未見興旺並議仍暫緩設關徵稅應隨後體察地方情形再行斟酌辦理其辦公經費如何核給補缺章程如何核定現既

緩設交涉專員所請應毋庸議 旨允行○丁丑命達壽回京供職改派李家駒為考察憲政大臣○諭雲南提督張勳著仍留在奉天直隸省帶兵毋庸赴任○壬午以李家駒為內閣學士○調錢恂為出使義國大臣以陸徵祥為出使和國大臣○諭軍機大臣等有人奏江西布政使沈瑜慶結黨營私劣跡昭著據實糾參一摺著端方按照所參各款確切查明據實具奏原摺著鈔給閱看○癸未度支部奏近年以來各省銅元局鑄造日多不免充斥為害經前財政處會同戶部奏定鑄額嚴為限制並將各局大加歸併改為戶部造幣分廠以便審察盈虛隨時消息上年核撥考察銅幣大臣陳璧奏訂章程聲明如再有充斥之患即應停鑄等因奏准在案現查京外各處銅元益見其多民間減折行使以致銀價日貴物價昂昂仰蒙 欽派郵傳部尚書陳璧會同順天府辦理銀錢平價業經戶部遵撥庫款銀五十萬兩收買市面銅元自未便仍舊鑄造且現時總分各廠正在鑄鑄一文新錢尤應趕緊剋期開鑄俾得迅速推行以救銅元低折之弊所有各種大小銅元擬令各該廠一律暫行停鑄至一文新錢鑄數係按所鑄當十銅元枚數加鑄三成今擬停鑄銅元自可各就機力僅鑄一文新錢至少以原定三成為度不得再有減少仍按月仿照鑄造銅元辦法將每日鑄數銷數填表報部此項新錢工本不免虧折原案係將銅元餘利酌量提補今銅元一經停鑄餘利提補無著然事關整頓國法公家即有虧耗亦所不惜應由臣

部飭令各該廠設法籌辦如數月以後察看幣價較平屆時仍當復鑄銅元以資應用再官鑄既停若非將私鑄私運嚴行禁絕仍恐難以補救應責成在京該管各衙門及各省督撫飭屬一律嚴禁以維圖法如蒙 俞允應請明降 諭旨宣示俾眾咸知一體欽遵辦理 上諭度支部奏請令各廠暫行停鑄銅元一摺現在京外銅元日益加多民間減折行使銀價愈貴物價愈昂前經發欵減價收買銅元仍是充斥未收實效著照所請京外各廠暫行停鑄銅元數月俟銅元價值稍平察看市面情形再行復鑄餘著照所議辦理○己酉台布志銳電致軍機處志銳勘地回城河中堡膏腴可耕須修大渠不僅本營敷用如涼莊駐防均可安插惟所費不資查故提督董福祥遺囑報効藏金四十萬兩洋鎗千六百枝現議運存寧夏甘督不日入告擬請代乞 恩施賞撥銀二十萬兩此間歸農開辦實業均可次第辦理如蒙 俞允台布志銳必當激發天良認真經理以副 朝廷贖恤旗兵至意其馬鎗亦請撥留一百枝以資操防由布等電告甘督如數扣留請代奏軍機大臣奉 旨台布志銳電奏悉所請賞撥董福祥報効銀兩鎗枝著升允體察情形酌量撥給○是月瑞典國新簡駐華使臣倭倫曰抵任

東藩續錄

光緒二百十五

臣朱壽朋敬編

臣張毓英恭校

三月丙戌朔 慈福端后康頤昭豫莊誠壽恭欽獻崇熙皇太后 皇上御乾清宮義國使臣文吉瑞典國使臣倭倫白觀見○調湖州駁爲江西巡撫以柯逢時爲浙江巡撫仍兼督辦土藥統稅事務○外務部奏臣部於光緒三十四年正月三十日准軍機處鈔交出使德國大臣孫寶琦奏滬陳外交事宜一摺奉 硃批外務部議奏欽此查原奏四條首列推廣駐使據稱駐使爲國家之代表卽爲國家之偵探非廣布耳目不足以諜其真情中國與各小國無甚猜嫌派使駐紮必皆歡迎傾忱相告請查明歐美亞三洲有約之國連卽派使無約之國次第訂約等語查中國在各國已有十館其有約之國除日葡及祕古墨國由駐法美使臣兼使外若歐洲之丹馬瑞典那威美洲之巴西非洲之剛果均經訂約因與各該國交涉無多故未派使近今環球列國情勢每隨時而變遷之際亦隨宜而應付如其於商務有益或於情勢相關多結友邦未始非聯絡外交之計上年臣部以暹羅同處亞洲華商甚衆宜與通好正在籌商又以美洲哥倫比亞利用華僑殖民爲便該國亦甚願與中國訂約業經提議外歐美諸國無約者或宜訂

約有約者或宜派使應由臣部酌度情形隨時奏明辦理又原奏內稱各大國宜改設頭等公使中國爲東方大國國體攸關請籌酌改等語查各國通例頭等公使代表君主一切朝會典禮如宮內筵宴君主筵拜等事待過獨爲優異各大國每互相遣派原爲國際平行一經彼此商改其品位既屬相當則對待必期同等且在我恐多窒礙改派大使經費需增不過體制較崇於使事無多實益緣公法頭等與二等禮節雖殊其辦事之權仍與品級無涉臣等悉心籌酌揆諸現在情形應暫從緩議又原奏預儲外交人才一條請招考閣部院各員挑取四十人分赴英法德美四國專令研究外交學習語文期以六年兼通兩國語文學成以備器使等語近來交涉事煩需才孔急該大臣請於京曹內慎選通才分派歐美諸大國專精於外交一途期收效宏而程功較易應請准如所奏由各部院中遴選其學有根柢才識明敏之員擇尤酌派至應如何考驗如何分派以及酌定名額籌撥學費試驗成績各事宜容由臣部續行妥商奏請舉辦至請釐定外交官公服條內聲稱採取各國服制參酌頒定專爲在洋外交官之公服等語在該大臣之意自係以使臣在外與各國人士交際往來慮因服色懸殊致生隔閡起見查各國衣服雖大致無甚差異而俗尚各有所宜其外交官沿用之公服仍循其本國禮服所規定中國冠服自有定章若專爲外交人員參酌釐定強與各國從同其用意固屬權宜於本制究嫌歧出所請改定之處應毋庸

議得 旨允行○丁亥倉場侍郎劉恩溥卒賜卹如例○諭近日京城錢價仍未甚平固由於銅元之充斥亦由於私票之繁多現在業經飭令各廠銅元暫行停鑄而私票仍漫無限制奸商但知牟利並無實存銅元任意開寫錢票片紙架空爲害更甚若不設法整飭恐銀價終無平減之日著袁成順天府迅即詳定章程嚴立限制除本非錢業一概禁止出票外其錢業所出紙票必須準該銷寶存銅元之數定其出票之多寡倘再有架空出票取巧害民擾亂市面定予從重罰辦並著民政部步軍統領衙門協力查禁認真整頓勿得任其朦混抗違以肅國法而利民生○調緩浙江仁和等三十一州縣及嘉台二衛所衛所錢糧○戊子民政部奏前准考察政治館咨開內閣奉 上諭張慶親王奕劻等奏稱各省按察使擬改爲提法使並增設巡警勸業道缺應卽次第施行著山東三省先行試辦此外直隸江蘇兩省風氣漸開亦應擇地先爲試辦等因欽此刷印原奏清單咨行欽遵辦理前來臣部查原奏各省官制清單內第十四十五等條各省巡警道專管全省巡警消防戶籍營繕衛生事務每省各設一員應酌設屬員分科治事其細則由民政部訂之各等語竊維巡警爲民政之大綱中央爲各省之總匯臣部忝司內治有管理地方行政之職權而警察一端尤爲防患保安之要務非有指臂相使之用不能收整齊畫一之功比年以來屢奉 明詔興辦警務疊經臣部通咨各省實力奉行以副 朝廷保衛閭閻之至意現在逐

加稽核各省警政雖已先後創行而編制各殊章程互異不獨精神未能統一卽形式亦復參差掣厥由來實緣警察機關未臻完備內外隔閡呼應不靈不得不各闢方隅姑仍舊貫臣部屢經籌議擬於各省增設巡警專司以爲挈領提綱之計徒以事關官制非通盤籌畫未敢率請施行現值 朝廷銳意更新勤求治理 特旨令各省增設巡警道並准令臣部詳訂細則通行各省仰見 聖明燭照振興警務規畫周詳莫名欽感臣等遵卽督飭員司按照釐訂官制王大臣奏定外省官制內關涉警政事項並參酌學部奏定各省學務詳細官制章程妥慎釐訂擬成巡警道官制及分科辦事細則十五條謹繕具清單恭呈 御覽事關職制應請 飭下憲政編查館按章考核奏請 欽定頒行以資遵守得 旨如所議行○會議政務處奏光緒三十三年十二月十八日軍機處鈔交御史徐定超奏翰林院升途擁擠請變通官制一摺附片一件奉 旨會議政務處議奏欽此竊維該御史原奏各節大都以翰林院爲儲才之地 國家定例本較他曹爲優年三官制屢更各部自爲升轉而翰林院轉慮沈淪本策勵英俊之心爲添設階級之請並遞及於五經博士等缺纖悉靡遺所陳不爲無見惟臣等以爲翰林院官制自 國初以來迭次更訂近年臣工條奏亦復加詳屢經廷 臣議定事關制度未敢率爾更張況值新政創行練才尤亟固不敢謂詞曹容與未足以建事功亦不敢謂新進名流俱足以資幹濟若徒爲疏通人員之計增

設官缺而不爲之開出路定課程誠恐徒虛名無關實際且慮疏通於下級轉滋壅積於前途亦屬於事無濟是以臣等再四商榷爰就該御史原奏所已及並原奏所未及而爲臣等所見及者引伸其說詳定規制冀有裨於翰林之遞轉并無礙各部之遷除庶幾羣才得並進於朝而京外可兼資其用謹分條論列爲我 皇太后 皇上縷晰陳之一原奏請將掌院學士改爲實缺升從一品遇有大學士尙書缺出一律開單請 簡查掌院學士本有品級向以大學士尙書兼充並無窒礙應請仍照舊制一原奏請將翰林院學士添設兩缺升從二品遇有尙書都御史侍郎巡撫缺出開單請 簡查翰林院學士係光緒二十九年甫經政務處議覆給事中熙麟請復舊事府摺內奏請添設二缺選升內閣學士未便復行更改轉滋複沓今擬請遇有侍郎缺出由軍機處將內閣學士副都御史翰林院學士與各該部左右丞分別列單請 簡若遇有巡撫缺出則將內閣學士副都御史與該省布政使分別列單請 簡一原奏請將翰林院侍讀學士侍講學士升正從三品遇有侍郎內閣學士副都御史及藩學臬三司缺出開單請 簡查侍讀學士係於光緒二十九年甫經升爲正四品未便遽改今擬仍從舊制而遇有內閣學士缺出與翰林院學士內閣侍讀學士翰林院侍讀各照從前應升及其次應升人員之例一併開列并酌增順天府尹缺出仍照舊章將翰林院侍讀學士侍講學士開列並將翰林院侍讀比照從前庶子

開列之例一體繕單請 簡至藩學臬三司缺出除提學使向由學部將翰林院侍讀學士以至編檢各員密保外其布政使按察使缺出應查照順治十二年定制詹事少詹事以布政使用侍讀學士以按察使用及近年各部承參三四品京堂 簡放藩臬等官之例將侍讀學士侍講學士與翰林院學士及各部承參京堂由軍機處分別開單請 簡一原奏請將侍讀侍講升正從四品查翰林院侍讀係於光緒二十九年市經升爲正五品未便復行更改惟既將侍讀升爲正五品嗣後由侍講轉侍讀應卽改爲升任庶與侍講學士升任侍讀學士之例相符一原奏請添設撰文四缺升正五品查翰林院撰文係光緒二十九年奏設四缺定正六品未便復行更改惟自裁撤詹事府國子監後員缺較少擬請酌增翰林院祕書郎四缺定爲從六品以便遞轉一原奏請將修撰升從五品編修檢討升正從六品查現在翰林院學士正三品侍讀學士侍講學士正從四品侍讀侍講正從五品撰文正六品益以新添從六品之翰林院祕書郎一階已屬完備修撰編檢各員品級應仍其舊一原奏請將撰文修撰編檢各員由掌院學士認真考察擇其品學兼優內而堪勝各部承參外而堪勝提學使等差缺者每年密保一次開單請 簡查翰林院編書局本年卽將告竣擬令專辦講習館事宜所有侍讀學士以下各員除兼有要差及已調各部外其餘人員俱令入館肄業就各部所需之收學取其於平日學問相近者專習一門由掌院學士

認真考察擇其成績最優之員每二年密保一次每次每部不得過二人任缺勿濫以備各部亟多之用其各部奏保及先行調部行走者仍聽其便一原奏請將五品以下之京察截取保送等語悉如其節查截取保送等例節經奏定有案自應照舊辦理惟翰林院近年員數較多擬請遇有京察年分除內廷供奉之合例人員一律保薦外其餘各員請以六員計額以廣其途一原奏請將五經博士典簿改爲七品待詔改爲八品孔目筆帖式改爲九品未入流不設官查現在自翰林院掌院學士以下品級俱未更動其五經博士至孔目等官應亦悉仍舊制以免紛歧以上各條係就該御史原摺所請逐一敷陳意見俱屬相同至另片所稱編書處與學部編譯圖書局制度相複請酌量裁併以編書處改爲 顧問處等語臣等竊以爲侍直 鑾坡備員 講幄俱爲 朝廷侍從之臣 聖明如有諮詢隨時可以入對現在編書處既將截止似毋庸另設一處抑臣等更有請者新學固宜研究國粹尤應保存此後中國學堂畢業及留學東西洋畢業諸生獎用編檢庶吉士者應仍遵光緒二十九年學務大臣暨上年憲政編查館會同學部先後奏定章程認真考核冀拔真材而免倖進得 旨如所議行○己丑農工商部奏前准都察院咨稱光緒三十三年八月十九日本院代奏陳發續條陳一件奉 旨著都察院咨行外務部暨楊士琦酌核辦理欽此恭錄咨行欽遵等因前來查原呈內稱暹羅一國土地二十餘萬方里人口數百萬

自宣布獨立以來法律政治教育軍備及農工商著著進步顧其國上有貴族下有奴隸而無與國同休戚之中等人民故識者皆知彼不足以圖強徒爲英法各國所利用彼所謂中等人民者卽我國旅居彼國之商民全國商業皆在我民之掌握以彼物產之豐富供我人民之懋遷此實中國天然之殖民地也近者東西各國皆有駐暹使臣故商業日見進步吾民則既無國家保護之力又無社會公共之心羈旅海外自謀生活與政府絕無關繫種種邪說得乘間入之於國民商業前途所關甚鉅擬請 特諭外務部及出使大臣楊士琦考察旅暹商民情形是否能仿彼國派駐暹出使大臣或領事以維商務而營鄰交等語臣維暹羅立國南徼互市之利始自隋唐流寓之人多係閩粵梯航通道久被華風係我 朝屬國近歲銳意圖強儼然獨立與各國訂約通商冠蓋四出西人咸目爲東方比利時國不以弱小而輕之其全國戶口不滿千萬而華僑乃三百萬人人數之衆過於爪哇商業之盛過於西貢惟我國尙未派有使臣領事爲之保護勢孤氣餒外人未免相輕臣在暹時商民等環訴籲求殷殷仰望竊以世界大勢趨重商戰因國際貿易之交通發達而國際之交涉由是而生故兩國通商卽互有締結條約派遣使臣之權利初不以大小強弱爲殊況暹羅近居東亞地接滇南屢以緬越界務與英法相交涉尤囑繫中國邊防固圉保商均關緊要該生所呈各節似屬可行擬請 飭下外務部酌核情形相機辦理以示 朝廷

惠保商民懷柔遠人之至意下外務部知之○度支部奏軍機處交出翰林院侍讀學士惲毓鼎奏部議試辦印花稅宜再酌改章程一摺光緒三十四年二月二十四日奉 旨該部知道欽此據原奏內稱查度支部原奏仿行印花稅法本為抵補洋土兩藥稅款起見參酌東西各國成法釐定稅則明定章程原期於公帑有增而輿情不擾立法至為周妥查原奏辦事章程第三條載明各直省藩署或相當局所附設管理印花稅處責成藩司遴派妥員專司本省發售印花事宜等語夫藩司職守事務殷繁一切應行事宜勢必委員辦理如牙稅督銷等局一經假手胥吏無不公費浩繁甚至差役勒買加費希圖中飽弊將不可勝言況中國商民向無貼用印花之習慣一經官售窒礙殊多且恐差役藉此招搖重為民累臣愚以為辦理之始似不宜由官經售現在度支部銀行分設漸廣信用既彰似宜由部印造各種印花發交總銀行分派各處分銀行承領發售具有銀行未設處所即歸銀行妥招總發賣人經理此事再查印花稅則第一類如提貨單發貨單收存貨件文契之憑據抵押貨物字據豫定買賣貨物之單據保險單公司股票又第二類匯票期票各種其在通商口岸商民多係與洋商交易宜由外務部先行照會各國公使飭洋商一律遵守以免後來糾葛其第一類當票一項雖票面須銀錢數合十千文以上者貼印花二十文但典質銀錢皆貧民不得已之所為當鋪估本既輕取息又重竊恐藉口印花加利盤剝則貧民

益重滋困累現在 朝廷舉行新政於整頓財政之中寓體恤民艱之意擬請將當票印稅一項暫行寬免其有各省鹽引茶帖行帖等類則皆販賣商戶之事業似可概令貼用印花在官商營亦樂從擬請飭下度支部將稅則章程詳籌酌改以期盡善而利推行等語伏查臣部恭奉 諭旨試辦印花稅業經擬定稅則章程奏蒙 俞允在案所定辦法一以寬簡為主不敢稍涉苛細原於整頓財政之中寓體恤民艱之意茲據該學士奏稱前項稅則章程尙宜詳籌酌改自係爲整頓弊端慎防交涉起見臣等覆加研究逐細推求如原奏所稱各種印花宜由 臣部銀行經售一節查印花稅推行各省必須各府州縣均有發售之處使商民易於購買而稅則乃便於通行 臣部銀行現正籌擬推廣各省尙未編設若責以經售印花深恐邊遠省分鞭長莫及且印花一項原爲民間財產貨物權利轉移之確證每與地方詞訟有關其遇訟查驗照章科罰均係有司之責自非統以藩司亦不足以資督率又原奏所稱洋商交易宜由外務部先行照會勸遵一節查徵收稅項係屬內政本非他國所能干預況印花爲各國通行稅則外人貼用久成習慣中國仿行印稅似不必慮其阻撓且中外交易中國商民受外人之愚證外人貼印花中國商民恐事後糾葛遇訟被罰必不樂於收受外人意在推廣貿易當亦不至新此區區若中國商民受外人之愚證則貼用印花者係在中國商民自應遵守法律又原奏所稱當票暫行免稅一節查當票

應貼印花所費出自商該商資本既厚取數又微當不致於滋累若慮其藉口印稅加利盤剝則當商取息具有定章且當票十千文以上貼用印花止制錢二十文未必因此少數遽議增加利息即使商人和析秋毫亦不過於典質貨物估價略從低減典質之時所估物價既低即取贖之時所償資本亦少於貧民似尚無所虧損又原奏所稱鹽茶引行帖概令貼用印花一節查印花稅之性質原以財產以物權利轉移商民私立契約必貼用公家印花以爲確證若前項引帖本係部頒官紙且已徵收稅課與商民私立契約不同既無庸重加保證自未便再事徵收以上各節擬請仍照奏定章程暫行試辦毋庸更章仍俟開辦以後體察情形有無窒礙再行斟酌辦理至原奏所稱各省藩司經理局務假手胥吏公費浩繁差役招搖重爲民累等語自爲近日官場之通病臣等前擬印花稅辦事章程令於藩署或相當局所附設管理印花稅處不准特設專局致滋糜費各府州縣發售印花均令招商承領不准胥吏經售其商民貼用印花亦於稅則內明定罰章不准旁人挾嫌告發地方官亦毋庸派人查驗即已籌慮及此但徒法不能以自行得人乃足與爲政印花稅事屬創辦尤不可不慎之於始擬再申明前奏請 旨飭下各省督撫轉飭藩司及各地方官妥慎經理不得有假手胥吏虛糜公費及縱令丁役勒索苛徵情弊如或奉行不善稍有擾累一經覺查即由臣部嚴行參處以爲假公病民者儆得 旨如所議行○以玉牒

成子在館各員煙照等獎敘有差○允農工商部奏於西貢河內爪哇添設領事○庚寅 上詣 壽皇殿行禮○以前辦雲南礦務大臣唐炯鄉舉重違實加太子少保銜○壬辰諭鴉片流毒爲害甚深前已迭降諭旨剴切申禁內外大小臣工宜如何淬厲奮發仰體力行乃近聞臣工內平日沾染嗜好者仍不乏人或陳明斷戒其實未盡祛除或癮已沈痼表面巧爲掩飾甚或明目張膽吸食如故若不專派重臣認真查禁恐禁煙之令難望依限實行著派恭親王溥偉協辦大學士鹿傳霖協辦負政院事務景星丁振鐸充辦理禁煙大臣由該大臣精選中外良醫立即設立戒煙所專司查驗除在京各衙門屬員有確知其素染嗜好者由該管堂官照章多辦外其情形可疑之員均咨送該所切實查驗限於三箇月內妥定章程建修局所奏明開辦如禁煙大臣訪問各衙門員司有斷煙未淨者卽向該管衙門調往查驗若係堂官大員准由該大臣奏請發交查驗外而監司以上大員如經訪問確亦准指名奏請訊驗凡經驗人員其確無嗜好或實已斷淨該所出具憑結准其照舊供職倘驗明仍有嗜好卽據實照章奏參京外各衙門屬僚仍責成該管長官嚴密設法切實查禁如係經禁煙大臣發覺查驗實有煙疾並將該管長官按其瞻徇失察情節分別交部議處該禁煙大臣等均係選擇任使務須破除情面不避嫌怨實力奉行勿得顧忌因循致負重任倘嗣後辦理禁煙仍無起色該大臣等亦不能辭其責也該所應需款項

著柯逢時在土藥統稅項下先撥開辦經費銀三萬兩並撥常年經費銀六萬兩以濟要需○諭車機大臣等有人奏前署蓋平縣知縣現任興京撫民同知馬俊顯質酷性成串通劣紳舞弊等語著徐世昌唐紹儀按照所參各節確切查明據實覆奏毋稍徇隱原片著鈔給閱看○癸巳以袁樹勛署山東巡撫烏珍署民政部左侍郎○以邱俊鳳爲江西南贛鎮總兵○諭楊士琦奏保薦南洋華僑人才懇恩錄用各摺片花翎鹽運使銜胡國廉著賞給三品卿銜花翎候選道吳梓材著賞給四品卿銜○郵傳部奏臣部定制凡官商鐵路均有統轄之責光緒三十二年間開部伊始准督辦關內外鐵路大臣袁世凱督辦京漢滬甯各路大臣唐紹儀先後將京奉京漢滬甯京張正太汴洛道清各路關防文卷移交當經臣部分別奏明接管在案查萍潭一路亦用官款修築前以該路係爲運煤而設暫由前督辦鐵路總公司事務大臣盛宣懷一手經理現萍鄉煤礦已奏明合併漢冶萍廠礦公司專歸商辦是官商股本自應劃清界限且該路現須展築至昭山四十餘里利便轉輸尤須一律籌備官本俾資添修之用經總理盛宣懷與臣等面商擬卽改歸臣部管轄以符定制又奏萍潭鐵路原議上起安源礦界下訖湘潭縣運東之昭山逐節興修以便煤焦運抵昭山後由船轉至漢口程途暢捷銷售利便惟萍沅一段雖已告成洙昭一段尙未展築船載之煤由洙洲而下須迂繞湘潭曲灣淺水阻攔行舟從前每日出煤數百噸已不能源源

載運現煤礦大槽已通每日約可出煤二三千噸若不速籌通運將有貨棄於地之虞且漢陽鐵廠現正竭力擴充需用煤焦數倍往昔尤應力圖接濟以振要工查由洙洲至昭山計程約四十里接築尙不甚難臣部正在籌議間准漢冶萍廠礦公司總理盛宣懷咨商前因並稱訪問粵漢湘境幹路擬由洙洲繞至湘潭對河太平街以達易家灣較洙昭直綫須多行五十里計算運費過多於礦廠均有損害且礦局每日運煤以三千噸計每車裝煤二三十噸富有重車空車共二百輛日往來於此四五十里幹路之上轉輪輻輳行車時刻難以騰挪若與他項客貨相遇趨避不及益多危險查各國大礦恆有專運鐵路誠以銷場既廣出貨復多一或停滯受虧必鉅今煤礦運道甚艱自應就萍洙已成之路接連展築以達昭山水次俾可由輪船直運漢口藉符原議當經節次派員前往勘估由洙至昭約四十里需款在五十餘萬兩擬由臣部妥籌興築旋據湖南粵漢公司呈稱湘潭紳商力懇將幹路由洙洲逕達易家灣直綫改爲繞道湘潭對河太平街以達易家灣弧綫以保潭埠商務呈請核辦等情臣等以該公司所擬辦法與臣部展築洙昭路綫均爲保全商業起見彼此利益不相妨礙應准其改用弧綫一將來粵漢商路再築洙洲易家灣直綫則官築之洙昭應聲明不載他貨以期無損於商路卽或客貨趨便附載其所定車脚亦應比粵漢較昂庶於平均費率之中卽寓維持商本之意恭候 命下臣部欽遵辦理再此係因萍

株成路在先學漢湘境尙未興造自不能不先由萍津展築以救垂成之礦本如此後有近礦之路籌議與築自應先歸附近幹路承辦縱使專運礦產仍不得援此爲例合併聲明得 旨如所議行○甲午呂海寰張之洞袁世凱奏津浦鐵路原本於津鎮雖易鎮江爲浦口乃同隸江蘇轄境合同內所載路線係由天津經道德州濟南府至附近山東南界之嶧縣均係天津浦口鐵路北段再由嶧縣至附近揚子江南京對岸之浦口均稱天津浦口鐵路南段並未聲明由嶧縣至浦口應行經由何處臣海寰奉 命後當卽詳考輿圖自山東嶧縣起與江蘇接壤者爲徐州府屬銅山縣若由銅山縣取道安徽之宿州靈璧鳳陽定遠滁州等州縣以入江浦縣境而至浦口鎮均係驛路其勢較爲直捷若由銅山縣取道邳州宿遷桃源清河天長六合等州縣以入江浦縣境而至浦口鎮其勢似較迂折內惟天長縣係屬皖境餘均江蘇屬地論軌道以直捷爲便路工以省費爲主然過通都大邑商埠市場應行遷就者雖取道和迂亦不可但圖省費總之以便利商賈行旅增益日後養路之資庶爲合算正在核議間復據蘇省鐵路公司以津浦路綫與津鎮截然不同正當規畫應由嶧縣經江蘇徐州府城而入皖境蘇路北綫自清江經桃源宿遷徐州以達豫復自清江東北接沐陽以達海州又由清江南至瓜洲各綫呈請概由公司籌築又據安徽京官以津浦路綫須經過安徽省轄境與原訂津鎮鐵路未曾涉及安徽省界不同應與三省一

律伏查三省均蒙 欽派督撫會辦皖撫亦有購地保護之責公呈奏請加派以專責成並准郵部先後據情咨會請飭屬勘定津浦南段路綫復部核辦各等因前來臣海寶與臣之洞等熟商此次津浦鐵路雖係官爲借款辦理而十年後仍准三省紳商自集成本將此項債票撥與一半任其收回卽爲官商合辦之路並各視其境內地畧若干里爲攤買債票準繩與他路借款辦法迥別是該路綫無論如何勘定但求有裨權利官商卽交受其益蘇路公司本可無所用其爭論惟查光緒三十二年間商部奏准江蘇紳士籌辦本省鐵路摺內曾聲明自江以北由海州經徐州以達於豫等語則海徐一路自應遵照奏案由蘇路公司籌築現考諸輿圖探諸衆議既以南段路綫必須取道皖境而皖省京官亦願照三省一律相應請 旨飭下安徽巡撫一併會同辦理臣海寶卽一面飭派南段總理以及總工程司按照所擬路途趕緊前往詳細測究應取道何處爲宜具稟後臣海寶再行親往攷勘審定如果自徐州以下全由皖境則皖省自應按照三省攤買債票以期利益均沾按鐵路通例必以枝路交匯爲有益今幹路南端若改由皖境取道洪澤湖以西則江北淮揚海等府州商務繁盛之區凡在洪澤湖以東者皆與此幹路隔絕江北商民未免向隅應請自徐州橫造枝路一條達於清江以利江北商民此路儘先准江蘇省商民集款修造限於四年內興幹路一律造成如四年內幹路造成以後查看情形倘蘇路公司所築軌道

尙未能與津浦軌道相接則由官爲集款卽從徐州築一枝路以抵清江使蘇省商民亦得共出其途早獲交通之益屆時仍當酌定年限准該公司限滿備款贖回一半與津浦幹路一律均作爲官商合辦之路以歸畫一而昭平允得 旨如所議行○乙未 上詣建福宮行禮○諭軍機大臣等近日京城地面常有火災難保無匪徒混跡縱火情事著民政部步軍統領衙門順天府一體嚴查究辦○御史黃瑞麒奏駐洋人員及在外華民有沾染嗜好者應令速卽戒除等語下外務部知之○丁酉陸軍部奏查奏定陸軍營制內開各省已練新軍由部奏請 簡派大員前往考驗每三年由部奏請 簡派知兵大員數人輪赴各省認真校閱據實覆奏詳細章程另行專案奏定等因光緒三十三年十月初二日經臣部擬訂考驗章程繕單具奏奉 旨依議欽此欽遵在案現在各省編成之鎮已有將屆三年應行遵章校閱者凡申明紀律整肅車徒嚴飭戰備規畫教育敷其程度明其實罰等事均應明定規條以資遵守除俟將應行校閱之省旗由臣部另摺奏請 欽派大員前往校閱外茲謹按應行事宜擬訂章程敬繕清單恭呈 御覽伏候 欽定俟 命下之日卽由臣部欽遵辦理至將軍督撫親閱該省旗軍隊暨該省旗鎮協標統將按期校閱所部各章程前經奏定係令咨報備案備數當由臣部陸續擬訂總綱咨行各省旗遵辦以符定章而歸畫一得 旨如所議行○戊戌論端方等奏查辦江西南康贛縣教案業經議結

一摺所有縱容匪徒開教之已革署南康縣知縣楊寅揆著永不敘用並不准投効他省別請獎敘其防範不嚴之贛州府知府關榕祚贛縣知縣張學培南安府知府裕隆署崇義縣知縣張超著一併交部議處餘著照所議辦理該部知道○諭軍機大臣等吳廷斌電奏悉德皇頒給何彥昇等七員寶星准其收受○民政部奏臣部前於光緒三十二年十二月十七日會同軍機大臣具奏民政部官制章程內開臣部管理地方行政等事凡直省民政等官臣部皆有統屬考核之權各等語欽奉 諭旨允准在案良以臣部職掌略與各國內部相當凡地方行政之得失有司之賢否均應詳加甄察嚴定考成以收統一內治之功而免彼此隔閡之弊惟現行制度地方官吏銓選除授之事屬於吏部而激揚舉劾之權又分屬於各省督撫臣部雖有統屬之名曾無考核之實夫親民之官莫要於州縣今部以民政為名而於州縣事實無所聞知其非設部之初意伏思光緒三十年五月十四日曾經欽奉 諭旨著各省督撫將各州縣分別優劣開列簡明事實奏到後交政務處詳核具奏請旨勸懲等因欽此旋經政務處奏定通行畫一章程遵照辦理嗣後政務處歸併考察政治館又改為憲政編查館因歸該館核辦查此項事實表冊於各地方政績之良窳進步之多寡分類臚陳逐年比較以之考求吏治雖不敢謂事無遁形詞無虛飾而循文責實亦庶幾有所憑依實於整飭地方推行民政不無裨益臣部職司所在自應勉從事以企

成功擬請 飭下各省督撫將州縣事實表冊除照章咨送憲政館外另造一分咨送臣部詳細考核俟核定優劣分別等第後仍行咨請憲政編查館王大臣覆核主稿會同臣部具奏請 旨勅懲其章程表式如有應行增修改訂之處爲臣部所見及者亦擬隨時酌定會同具奏庶使內外相維名實相副用收監督地方行政之效而冀 朝廷實事求是之心如蒙 俞允卽由臣部通咨各省並咨行憲政編查館欽遵辦理得 旨如所請行○己亥祭 先農壇遣溥偉恭代行禮○度支部奏議覆趙爾巽電奏請暫緩停鑄銅元得 旨著仍遵前旨暫行停鑄以歸畫一○商約大臣盛宣懷奏創辦公司請籌的款以充公股而開風氣得 旨著照所請股票及利息均著交農工商部○庚子調王人文爲四川布政使許涵度爲陝西布政使○郵傳部奏本年二月初四日臣部會同外務部奏明商民承領部撥存款路歸商辦一片奉 旨依議欽此原摺內稱兩省公司接款還款容電商江浙督撫臣妥籌辦法並徑由郵傳部議定章程俾資遵守等語當即擬議章程邀約股東公舉數人來署閱看均稱妥洽地資遵守其部借款合同原有折扣虧耗各款當日係欲收回草合同之虧損因定以利易權之法惟路歸商辦商力微弱臣部有維持路政之責自未便專令商民受虧而江浙兩公司亦能仰體時艱於所領部撥存款承認年息五釐五毫其不敷之款由臣部分別籌墊除籌墊款項辦法另片奏明外謹將擬具章程十四條繕列清單恭

呈 御覽伏候 命下臣部分別咨照欽遵辦理一面勻撥款項交該兩公司趕緊接造以期克底於成抑臣等更有請者滬杭甬全路約六百餘里之長所領存款仍慮不敷兩公司應多集股本濟用且路短則利微路長則利厚尤須陸續接展始足以資周轉而便交通臣部總理路政責無旁貸仍隨時咨商督撫臣勸令各該省商民循名責實始終勤奮該兩公司深明大義必能竭力維持以副 朝廷振興實業之至意又奏江浙兩公司承領部撥存款所有借款合同內中英公司應得之九三扣及九三扣虛恩提付餘利及提付餘利虛恩還本小二五行用還利小二五行用倫敦存款四釐虧恩購料包用及購料包用虛恩共九款三十年內統計約虧三百四十九萬兩除兩公司所認利息溢出五毫三十年內約繳銀八十五萬兩外其餘不敷之款經臣部面商度支部及電商江蘇浙江督撫與臣部分任籌墊議定度支部每年認墊銀二萬兩江蘇督撫每年認墊銀三萬兩浙江巡撫每年認墊銀三萬兩臣部每年認墊銀一萬兩均於每年四月如數以庫平銀撥交臣部彙交中英公司又存放上海之匯豐銀行利息喫虧一欸匯費一欸十年外加還二磅半一欸均先由臣部墊發以上墊款俟江浙兩公司獲有餘利時卽於原奏江浙兩公司承認報効餘利中每二十分中之一分內儘數歸還似此通融摺注公家既先代籌墊商力亦可藉少紓如蒙 俞允臣部卽分別咨照欽遵辦理得 旨如所議行○壬寅以剿平吉林幫匪予

出力人員張勳等獎敘有差○乙巳諭候選郎中楊度著以四品京堂候補在憲政編查館行走○戊申上詣 壽皇殿行禮○庚戌諭軍機大臣等柯逢時電奏悉方碩輔著以四品京堂候補幫辦土藥統稅事務仍著柯逢時督率經理以專責成勿得稍存諉卸該撫現在患病應趕緊調治一面料理迅赴新任所請派員接辦土稅之處著不准行○辛亥張之洞鹿傳霖袁世凱奏幣制簡明總要暨說帖並度支部說帖各督撫議覆幣制摺奏及電奏各件下會議政務處資政院總裁協理幫辦會同妥議具奏○諭軍機大臣等廟爾喀貢使著理藩部於四月初三日在勤政殿帶領引見○壬子農工商部奏竊臣等於上年九月初三日奉 旨會同考定度量權衡畫一制度群擬推行章程等因欽此當於九月內由臣等將設局開辦情形會奏在案數月以來督率局員於古今中外之制度官商民用之習慣折衷採取定以一尊釐爲大事謹縷晰爲我 皇太后 皇上陳之一曰恪遵 祖制以營造尺清斛庫平爲制度之準則也中國度量衡之制始自虞書詳於漢志其言度之數本於律權量之數本於度自晉迄明罕通斯義惟我 聖祖仁皇帝稽古同天前民利用以橫累百黍之度爲古律尺縱黍之度爲今營造尺凡清斛升斗之容積庫平法馬之體積以營造尺之寸法定之然後律度量衡四者乃真符彛典班書之精義皆一貫以相通爲列朝所未有今工部營造之祖器雖已無存而 御製律呂正義之圖與倉塲所存康熙時

之鐵斗證其尺寸不爽是成法確可據依卽舊貫無煩改作此 祖制之所以宜恪遵卽臣等所調定一
等者也一曰兼採西制以實行畫一各種度量權衡之制度也法國適當之制風靡一時英俄日本等國皆
已參行然其本邦舊制仍多未改況中國五十年來之習俗百姓日用而不知何必更張反滋紛擾顧有
以不改爲便者亦有以改爲便者如近日學堂工廠鐵道建築多用英法之尺兼及英日之權器已徧於
國中觀必求諸域外何若以伐柯之則爲塞漏之謀以集合所長爲統同之計此西制之所以宜兼採也
顧尙有進者 祖制雖宜恪遵而立法或因時而異故康熙時之定制雍正乾隆以來已有變通今就會
典所載擬增損者約有八端一改量地之步弓爲鏈尺一依今庫平之式改方銀爲圓圈改兩尖齒爲對
鍼一改法馬爲圓筒形不用扁圓筒式一改金銀每方寸之比重爲純水一立方寸之比重一於制度之
內增矩尺一種一於量制之內增勺合概三種一勺合升斗均各增圓式一種一於衡制之內增商用天
平及一毫二毫五毫一釐二釐五釐之法馬六種凡此皆習用已幾於默化而官司尙未有明文允宜纂
入定章垂爲世守此用舊制而不能不加損益之情形也西制之採用者除度制之內酌增擗尺鏈尺捲
尺三種衡制之內增重秤一種及上條之圓筒法馬純水比重外其餘各種制度粗者既未必通行精者
又驟難倣造卽如西國精平以權中國生銀之重卽時有損壞之虞與其製不合宜曷若俟諸異日此又

探西制而不能遽求全備之情形也以上四者於制度之所宜似已得其大要顧欲實行這一必須先挈綱維小人革僮由君子風行上有道揆斯下能法守今若不將官用之器先求一律又何以風示齊民故官用之器期以二年全行新制若商民所用之器改之太驟恐積習難移轉成虛飾遲之過久恐相安無事又至愆忘擬期以十年將舊章全廢十年之中先於第一年內將各省府州縣城鄉市鎮最通行之舊器酌留一種再於第二三四年內將各省城及各商埠所留之舊器全改用官器再於第五六七年內將各府城所留之舊器全改用官器再以三年之期使各州縣所留之舊器全改用官器而總以舊器准用而不准造及舊器與新器相差若干一一折算之辦法爲扼要之圖而且由官以及於商民由省會商埠以及於內地施之有序操之不愆必使在下者無紛更之患在上者無阻格之虞而後整齊風俗之規乃不至爲刻覈厲民之政此又一等斟酌推行章程不能不倍加慎重之一端也然而中國向來所以不能畫一者固由廣土衆民自爲風氣亦以宋斤魯削絕少師承若非由臣部特設一廠凡各種度量權衡之器皆用機器製造專歸此廠發賣不能使式樣材料均歸一致考宋太宗時度量權衡皆由太府掌造以給官民之用實爲前事之師近代各國由官專賣者爲財政計則如日本之煙草普奧之富鐵爲行政計則如英日之電郵法德之鐵路今日部以專賣爲畫一之基固爲行政計而非專爲財政計矣此由部設

廠專賣尤爲畫一制度最要之一事也惟是立法雖在部臣行法則全資疆吏初辦雖宜寬假持久則要在精嚴故有虞五載而一正量衡月令一歲而兩平權概明代三日而一較斗秤卽各國之制亦有巡警以爲檢察有自治局以助稽查故能令行而禁止中國警察自治皆在萌芽已有者尙堪相助爲理未有者豈能坐待其成祇可於地方官之外責成商會以爲樞紐庶易推行惟官商通弊尙有二者必宜慮及一則度量衡器縱極精良用度量衡器之人仍可意爲高下一則平制雖經釐定而銀色仍可低昂此非明定幣制不用生銀斷難有濟但幣制未能卽定亦當嚴束在官之人以祛前之弊徧設公估之局以祛後之弊至臣部所定章程如有於地方不便者儘可由各省隨時商改如果有奉行不善者亦當由各省實力嚴懲庶聖主便民經國之大猷不至爲猾吏奸商之所阻此又不能無望於行政之人而預爲籌及者矣茲將臣等所擬度量權衡畫一制度圖說總表及推行章程四十條分繕三冊恭呈 御覽至於列代制作之源流此次定章之本末以及製造檢查之一切法則或已載於表說或須別擬詳章尙當陸續奏陳以期完善惟茲事體大輿考各國改制之初無不參稽國俗造就專家綿歷歲年久而後定卽我朝之定法亦經康熙雍正乾隆三朝之釐訂而始底於純全今臣等才謝專門事非素習乃以半年之考校期爲一代之規程終度缺失之滋多敢冀措施之悉當應請 旨飭下會議政務處詳細核議俾無

疏并以便施行下會議政務處議奏○農工商部奏創辦京師自來水公司擬招華股洋銀三百萬圓並請飭下直隸總督每年籌撥官款銀十五萬預存銀號爲保恩之用允之

夏四月乙卯朔時享 太廟遣醇親王載灃恭代行禮○諭軍機大臣等有人奏兩淮運司趙瀛彥營私藐法病國虐民一摺著端方陳啟泰按照所參各節秉公確切查明據實具奏勿稍徇隱原摺均著鈔給閱看○丙辰 上御勤政殿日本國使臣林權助謁見○諭前因歸化城副都統文哲珲奏參貽穀敗壞邊局欺朦取巧蒙民怨恨各款當經派令鹿傳霖紹英前往確查嗣據貽穀奏參文哲珲等侵吞庫款亦卽諭令鹿傳霖等一併查辦茲據查明覆奏貽穀督辦軍務有二誤四罪等語朝廷放舉蒙地意在開荒備邊並非攘地圖利乃貽穀不顧藩部邊氓大局祇爲一己罔利起見專用小人苛索巧取以官地墾局巧立公司名目輾轉漁利定章每畝地價三錢公司輒浮收八錢墊熟之地亦復勒繳地價甚至房基廬舍鋪面街道勒交租價每畝竟多至三百數十兩且縱勇濫殺燒斃台吉丹丕爾一家五命之多復羅織成獄輒將丹丕爾置諸重辟尤屬殘酷無倫所收地價以八錢計算約收銀四百餘萬兩除支撥有案及代爲約計用款外其查無用項者尙有二百餘萬之多顯係貽穀及各局員等朋分吞蝕貽穀又需索蒙旗扣留荒價操放官缺批索銀兩開設鋪店戕兵扣餉似此貪婪相濟擾害蒙民敗壞墾局實屬辜恩負

國綏遠城將軍貽穀著革職拿問由山西巡撫派員押解來京交法部審訊監追治罪文哲珪於庫款亦
有侵挪且向亦阿附貽穀聽其苛斂隨同書諾並著交部嚴加議處其隨同婪賄虐蒙之山東候補道甄
傑聚斂附益婪欺不貲雲南候補直隸州知州景昶苛暴險說商農共憤五原廳同知姚學鏡心貪手辣
率定爰書均著卽行革職拿交法部監追治罪署東勝廳同知岳鍾麟離職經叛幾壞邊局山西候補知
縣吳棟堯以兵壓民形同寇盜分省補用府經歷誌良逼追地價慘用非刑均著革職發往新贛効力贖
罪候補參將譚勇發虛報冒功縱兵擄物著革職發往軍台効力贖罪分省補用知府陳光遠直隸州知
州黃桂芬山西候補直隸州知州呂繼純同知郝敬端余寶滋知縣鄭天馥林毓杜喬樾隨通泰均屬驕
諂互用迎合殃民著一併革職所有貽穀歷年辦賑保案著該部查明一併撤銷塔爾巴哈臺參贊大臣
榮昌著解任赴綏交接任將軍切實查辦餘著照所議辦理至鹿傳霖等條陳善後事宜及請派員接辦
等語著派信瀚前往接充督辦賑務大臣暫行兼署綏遠城將軍查照鹿傳霖等各條陳辦法體察情形
妥籌辦理務期痛除積弊既須振興賑務尤須深恤艱艱以示朝廷撫綏藩部之至意○諭軍機大臣等
有人奏固安縣知縣吳貽孫抗旨剿民劣跡昭著請飭查辦一摺著順天府按照所參各節確切查明據
實具奏原摺著鈔給閱看○丁巳諭軍機大臣等溥偉等奏辦理禁煙請推廣訪查一摺著官有糾劾之

資白當雷意訪察著於三箇月後如訪有沾染嗜好巧爲掩飾者立即參奏該大臣等職司禁查責無旁貸尤當隨時查訪嚴定章程認真摘發不得稍有瞻顧以收實效○軍機大臣奉 旨本日理藩部帶領引見之庫爾喀正使噶箕浦熱八哈都熱更扎多扎且底熱副使薩爾達熱噶哈新卡扎噶且底熱均著加恩賞戴花翎○戊午諭軍機大臣等錫良電奏悉越邊匪黨前曾竄擾桂邊勢頗猖獗滇省近在接壤白金柱所部營隊無多防範恐難周密應就原部各營酌量增募增足五千人爲一軍責成白金柱統帶巡防除原食底餉仍由雲南照數籌撥外所增之餉著度支部迅即指撥○諭軍機大臣等鹿傳霖紹英查辦一案業將貽穀暨各委員拿問追究該犯員等所立嬰務公司及各鋪店均係贓私產業著寶榮迅委廉正大員馳赴綏遠城先將該公司資產暨各鋪店貨物分別點驗除公款商款外所有該犯員等私款一律收存備抵先將收存數目據實奏聞○軍機大臣奉 旨信勤未到任以前督辦嬰務大臣綏遠城將軍印務著歸綏道胡宇宸暫行護理○軍機大臣奉 旨都察院奏游擊袁祖禮進呈戰守心法書冊據情代奏一摺袁祖禮不通兵學妄行洩陳原呈暨書均著擲還並傳旨申飭○諭據柯逢時電奏差缺重要勢難兼顧土稅仍須留鄂經理厚軀久病赴浙未能定期等語浙江爲海疆重地朝廷特簡柯逢時補授巡撫原爲因地擇人乃該巡撫一再演奏赴任需時而海疆要缺詎可久懸浙江巡撫柯逢時著

卽行開缺仍責成督辦土藥統稅事務以期專心籌辦免贖成局○以增餉爲浙江巡撫吳廷斌爲直隸布政使朱其煊爲山東布政使鹿學良爲福建按察使○己未度支部奏光緒三十一年京師創設勸辦國民捐以清償外債其時因此項捐款應按年存放生息暫由臣部銀行代收當經銀行刊發簡明章程宣布在案創議之始內外官紳士庶均動於公義踴躍輸捐究之物力艱難近來體察情形似不無心餘於力之事所有前項捐款至今本息合計僅得四十一萬三千餘兩近日捐款益復零星清償外債殊難懸望查銀行代收捐款之時聲明此項國民捐款專俟積有成數預還賠款此外無論何等急需決不挪用又章程內稱如將來公家決議不行提用可由原捐之人執持收照到銀行將本息一併取出等語臣等竊維自外債既深朝野上下皆引爲巨梗此次倡辦國民捐固由我國民好義急公亦冀及早清還藉以寬其擔負乃現在統籌成數清償之事既難預期而款項徒存究無以慰國民之望臣等一再思維自應另籌辦法以持久遠查臣部銀行現擬附設儲蓄銀行前項國民捐款可否飭銀行刊發告白凡捐款之人有願照章將原捐取回者限期由原捐之人執持收照到銀行將本息一併取出有願改爲本人存款者限期執持收照由銀行核明改爲本人存款本息亦隨時由本人取回或願永遠作爲國民捐則仍舊存放生息以後續捐之款亦一律代收以期集有成數仍爲預還賠款之用概由儲蓄銀行經理存放

似此分別辦理既足昭公家之大信亦無礙國民之感情而零星存款改由儲蓄銀行經理亦符名實如蒙 俞允卽由臣部飭飭銀行監督妥慎辦理以昭信實 上諭度支部奏銀行存儲國民捐款另籌辦法一摺京師前辦國民捐款原爲清償外債起見現由該部銀行收存生息在國民捐輸踴躍足見急公好義之忱惟統計成數清償洋款尙難預期所有存儲款項自應另籌辦法以維久遠該部現經附設儲蓄銀行著照所請由該銀行通行曉諭凡捐款之人有願將原捐取回者限期執持收照將本息取出有願改爲存款者本息亦聽其隨時收取餘著照所議辦理該部卽督飭該銀行認真經理以昭信實○庚申諭軍機大臣等開缺雲南布政使劉春霖前經降旨來京陛見計其行程當抵湘鄂現時雲南邊境匪黨竄擾勢頗猖獗錫良正在派兵防剿劉春霖著加恩以三品京堂候補派令幫辦雲南邊防事務所有派往前敵各軍均歸節制調遣會同錫良妥籌防剿事宜遇有緊要軍情准其專摺奏事該員未到差以前仍責成錫良督率各將領認真籌辦勿得稍涉諉誤並著陳夔龍岑春煊查明劉春霖行程傳知該員無論行抵何處迅卽兼程折回滇邊至應取道何處暨應如何招集舊部並著該員籌酌情形由電奏聞請旨遵行○諭徐世昌等奏查明知府收稅增多祇交例額酌擬辦法一摺吉林候補道王昌熾前在長春府知府任內徵收牛馬稅祇交例額雖係照章辦理惟當戰事甫平之後地方凋敝田土荒蕪農民購

買牛馬自應減收稅課以興農業且直隸熱河以鄰省地方尙且蠲免出境赴奉牛馬稅乃該員仍復按價估徵至逾正額數十倍之多又並不報明充餉實屬貪苛臆妄王昌熾著卽行革職並勒繳銀十萬兩解交吉林巡撫留爲辦公之用該部知道○學部奏竊維興學宜因勢利導求學宜由淺入深奏定學堂章程自初等小學以至大學畢業升學皆有一定之資格階級分明秩然不紊惟因開辦之初及格者鮮而過時失學者多故暫定爲變通考選之法於高等學堂考錄入學章內開學堂初開可酌選品行端謹中國經史文學確有根柢者先補習普通學一年然後升入高等學堂正科於中學堂計年入學章內開此時創辦應准十五歲以上十八歲以下文理明順略知初級普通學者亦得入學於高等小學計年授學章內開此時創辦凡十五歲以下略能讀經而性質尙敏者考驗合格亦可入學等語並經逐條聲明此例於學堂開辦合法五年以後卽不行用是學堂本以循序遞升爲正辦其變通考選乃一時權宜之計並非經久之規自奏定章程頒行以後將及五年臣部考查各省學務情形大都省城則注重高等學堂而中學或猶未備府城則注重中學堂而小學或僅數區州縣設高等小學堂而初等小學或竟未設不揣本而齊末如崇墉之無基學堂名目雖有等級之可分學生程度幾無高下之可別推求其故皆由辦理學務者但知援據變通招考之例而不問學生程度果否如奏章所云遷就招收喪失本意而其流

僻所及則各處皆聚一方之財力設立一二名稱較崇之學堂於小學不復相意爲學生者亦不日揣其學力之如何但冀考入名稱較崇之學堂以爲僥倖獎勵之地遇有高等學堂招考學生則中學全班學生爲之舉動徧是遞推然紛紜轉徙下級學堂永無畢業之人越級級升高等課程更多遷戶之庭英敏子弟無由深造普通教育無由振興貽誤後生妨礙學務非細故也臣等以竊以救此弊非立將高等以上學堂變通招考之例先行停止不可擬請自本年六月爲始凡奏定學堂章程所定分科大學大學選科大學實科高等學堂高等農工商實業學堂優級師範學堂初等學館方言學堂以及未列專章之郵電路礦暨法政學堂正科屬於高等教育者概不得招收未經中學堂畢業之學生以期深造至中學以下及各項選科尙可略寬期限以待年長失學之人惟須明定資格增設課料並由臣部體察情形分別停止招考以求漸加嚴密庶幾數年以後普通畢業者漸多而高等學科乃有精深之望臣等爲通籌教育辦法力求實際起見謹就奏定學堂章程所訂各項學堂入學資格反覆討論酌擬各項學堂分別停止招考及考選詳細辦法章程繕具清單恭呈 御覽如蒙 俞允卽由臣部通行京外自本年六月爲始凡各項學堂考選新班一律遵照辦理概不得私自變通致涉紛歧得 旨如所議行○貴前署山東督糧道郭鑑襄三品卿銜○開缺福州將軍崇善奉賜卹如例○辛酉子故湖北提學使黃紹箕事蹟交

國史館立傳○陸軍部奏竊維治軍之要紀律宜嚴而先事之防稽查宜密攷之歐西各國於軍隊駐紮處所皆設有軍事警察兼爲地方警察之輔助日本仿行其制名爲憲兵海陸軍人悉歸監視法良意美收效無形中國自光緒三十年奏定營制後各省遵章編練率已蔚成鎮協粗具規模將來三十六鎮依限編成兵數自較前益衆若不將如何防護如何稽察各辦法及時籌定深恐軍隊日增軍紀漸弛於戎備殊有關繫臣等公同商酌擬於臣部管轄之憲兵學堂內挑選畢業學生編成陸軍警察隊一營駐紮京師監察近畿各鎮但各鎮有分紮直隸山東等處亦應稽查因再添編兩隊的量派往皆任以實行防護稽察各事俾爲推行之基礎俟辦有成效卽由臣部遴派陸軍警察員弁前往各省於鎮協駐紮處所照章分設責令查照管區監察軍隊其應設營隊數目當權衡鎮協情形分別酌定以足數分佈爲度嗣後營多事繁再於京師設立陸軍警察處一所隸屬臣部以爲各省陸軍警察隊總匯之區現時暫勿設立以節糜費該隊應辦事宜由臣部飭司辦理其辦法規則以及營制餉章經臣等詳細酌核分別擬定敬繕清單恭呈 御覽如蒙 俞允臣部卽欽遵辦理其餘未盡事宜容隨時續擬具奏待 旨如所擬行○壬戌諭軍機大臣等錫良電奏悉著張鳴岐傳知龍濟光挑簡精銳親自統率由桂邊星夜馳赴開化帶去各營如須增募統由該署提督酌辦應需餉項運費著度支部迅卽籌撥未領到以前由廣西雲

南藩庫先行墊發錫良奏請飭部迅撥的款著度支部速議具奏○甲子諭軍機大臣等錫良初八日電奏悉度支部現籌撥銀五十萬兩因雲南市面乏銀如電匯過多恐致牽動市面已先匯銀二十萬兩仍備五十萬兩正在設法撥發著度支部電令四川迅即劃解以應急需○憲政編查館奏竊查臣館有統一法制之實前經奏明各部院各省所訂軍行法及行政法規皆歸核定兼得修改增訂各項法制欽奉諭旨允准在案伏維經國之要首重法制因革損益隨時異宜歷年愈多則條例益富前人所創著以爲法後王所定疏以爲令非整齊畫一勒爲成書則散見錯出遵循不易周禮稱凡治以典待邦國以則待都鄙以法待官府以官成待萬民以禮待賓客賈公彥疏之曰此皆言以者當別有篇卷使人執持施行之是知法令所垂必有專帙而後官司遵奉方免淆雜并格之虞溯自光緒元年以來我 皇太后皇上振興庶政丕煥文明大而制度之改更小而科條之增益方策所布日以加多際茲憲政肇新立法尤密一切內治外交之要均難執成格以相繩而兵刑教養之繁亦多因時勢而措置新章故事先後每歧奏案例文援引易外各部二十四年所纂則例有未成書者有未刊行者續修會典亦斷自開館之年此後更無編述時間三紀事倍六典而櫛引鉤索未有專書以致述舊者無所折衷更張者苦其煩雜學治者難於研究釋文者易以欺朦自非詳爲考求悉心纂述不足以規畫一而詔方來昔唐臣杜佑宋臣

司馬光皆以編輯政書爲治本刻下預備立憲編纂法典關係尤重臣等公同商榷擬自光緒元年起所有各衙門成例之刪改新制之推行及已辦成案應纂入則例者各按年月先後勒爲長編竊取貞觀政要之義名曰光緒政要由臣館恭查 欽定續修會典並咨各衙門調取則例鈔送檔案分別輯錄彙爲一書卽酌令館員分司其事其從前各衙門則例事例文字浩繁義例複雜並擬鉤元提要彙括其詞別爲簡編以資遵守庶幾源流沿革朗若列眉上稽 本朝法度之精乃可以旁採列邦規制之善似於行政出治之方不無裨益謹將酌擬編輯光緒政要體例繕具清單恭呈 御覽如蒙 俞允擬卽通行各衙門欽遵辦理又奏光緒三十三年八月十八日准民政部咨稱本日具奏酌定違警律草案請 飭下憲政編查館核定頒行一摺奉 旨依議欽此欽遵鈔錄原奏並清單知照前來臣等伏查原奏內稱唐虞薄笞惟齊衣冠周漢司隸亦先罰贖近來東西各國均有違警之科皆所以恩禍患於未萌期秩序之共守京外警政推暨日廣各省亦多有擬行違警辦法藉示懲儆者自應酌定章程以資遵守等語自係防漸杜微納民軌物之意者違警之懲蓋始於周禮司救及野廬氏等官罰嚴三讓未因過失稍寬令肅四畿本爲防姦益厲觸撻之誅厥源已古逮漢以還互見刑律其事理有未盡者則設不應爲條以概一切良由犯係輕微未注重也現在民政既設專官凡屬警政正待擴充則違警律亟宜析出單行近今

泰西各國立法例於違警罪之說約舉有三一融會於刑法中不設違警名目者如紐約芬蘭等刑法是二因刑之重輕而爲違警罪之分類者如法蘭西墨西哥德意志等刑法是三因罪之性質而爲違警罪之分類者如奧大利匈牙利荷蘭義大利白蘭加利亞那威等刑法是綜核其說第一說於理論雖當今既定議單行則宗旨不符毋庸深論第二說易記刑之重輕而不能知其罪之性質第三說易知罪之性質而不能記其刑之重輕二者互有短長然各國最新法典及草案採用第三說者爲多蓋因違警罪之預防搜查及逮捕當其衝者實爲警察警察之法學知識未能完備使其易於記憶不如由性質而爲之區分也檢閱該律草案刑之種類釐爲七等並分總則國安政務公共危害交通郵電秩序風俗身體衛生財產爲十章共四十四條又附則二條實本第二第三之說而折衷一是體例完密可冀推行無阻其間範圍廣狹實兼採東西制度增警吏之權限卽所以保閭閻之又安況刑律雖經告成頒布尙須時日而違警律單簡易行於時勢亦甚切合惟原案總則內條文次序尙宜酌改如第三條至第六條係不論罪在律中爲例外而敘次轉在正面辦法之先似嫌倒置其餘類此頗多今稍加更易大率先敘正面辦法及罰例等次加重例次減輕例次不論例次釋語義庶於體例較合又第二章所列關於國安之違警事項如情節較重則宜歸入刑律情節較輕則不至闕及國安今略爲刪減併入政務違警罪內通爲第

二章以下各章卽按次遞進至各章內所舉事項有應入官吏職處分者列入連警亦有未合今酌量刪節以清界限其餘辭義未妥及字句歧出文詞生澀之處亦皆一律修改務令吻合國情俾官民易於通曉臣等公同核訂擬將該草案釐定爲十章四十五條敬謹分別繕具清單恭呈 御覽伏乞 欽定擬請 明降諭旨頒行京外一體遵守得 旨如所議行○乙丑常雪大祀 天於 闕丘 上親詣行禮○軍機大臣奉 旨前據貽穀奏稱杭錦貝子阿爾賓巴雅爾阻撓聖務請開去伊克昭盟盟長以副盟長烏審旗貝子察克都爾色楞哲著並以台吉沙克都爾扎布署理副盟長嗣據奏稱杭錦貝子悔悟效順籲請開復以盟長記名均經准如所請現經查明該貝子阿爾賓巴雅爾尙能輸誠報効加恩著仍補授伊克昭盟盟長察克都爾色楞仍回副盟長本任毋庸署理盟長沙克都爾扎布毋庸署理副盟長○度支部奏本月初四日軍機處片交奉 旨錫良電奏悉越邊匪黨前曾竄擾桂邊勢頗猖獗滇省近在接壤白金桂所部營隊無多防範恐難周密應就原部各營酌量增募增足五千人爲一軍責成白金桂統帶巡防除原食底餉仍由雲南照數籌撥外所增之餉著度支部迅卽指撥欽此又於初八日奉 旨錫良電奏悉著張鳴岐傳知龍濟光挑簡精銳親自統率由桂邊星夜馳赴開化帶去各營如須增募統由該署提督酌辦應需餉項運費著度支部迅卽籌撥未領到以前由廣西雲南藩庫先行墊發錫良

奏請飭部迅撥的款著度支部速議具奏欽此欽遵到部臣等查雲南邊防緊要亟應寬撥餉需以資接濟本月初五日臣部電詢該省白金柱所部原有人數餉數未據覆覆即於初八日先行電撥鎮江關銀六萬兩蕪湖關銀六萬兩九江關銀四萬兩江漢關銀四萬兩宜昌關銀三萬兩共銀二十三萬兩令其迅即電匯滇省濟用此次龍濟光一軍由桂邊馳赴開化餉由滇撥加以白金柱增募之營一切餉項運費雖未能指出確數要當預爲籌備除已電撥各關銀二十三萬兩外擬再撥江海關銀三萬四千兩金陵關銀一萬兩蘇州關銀一萬兩長沙關銀一萬兩並請由督辦土藥統稅大臣柯逢時飭令宜昌等局在於徵存土藥統稅項下就近撥銀二十萬六千兩計共湊足銀五十萬兩一併解滇當可勉敷應用俟奉 俞允臣部遵卽分電各關局迅速報解勿得延誤得 旨允行○丙寅直隸布政使吳廷斌因病懇請開缺允之○以崔永安爲直隸布政使惠森爲浙江按察使○張人駿奏開廣東花縣煤礦允之○丁卯上詣 萬壽寺拈香畢幸頤和園駐蹕○龐鴻書電奏雲南軍事緊急請接造貴陽至興義電綫得 旨著郵傳部速行撥款興造○己巳 慈禧端佑康頤昭豫莊誠壽恭欽獻崇熙皇太后 皇上御仁壽殿十四國使臣希特等親見賜宴○辛未軍機大臣奉 旨達賴喇嘛到京後住錫普靜禪林著內務府理藩部會同預勘估計修理○馮汝駉奏竊浙江杭嘉湖三府屬地濱太湖港汊紛歧密如蛛絲島

匪往來飄忽結隊成羣利械快船肆行搶擄出沒於蘇浙之間此拿彼竄又以利誘愚民暗相勾結浙省連年荒歉饑驅日眾節次裁兵之後水陸巡防各隊未能實力經營以致匪蹤愈熾臣蒞任之初正值浙西島患鴟張浙東伏莽蠢動起事非有強兵利器不足以壯聲威杭嘉湖三府屬原有水師零星分駐呼應不靈欲調集則要隘深慮空虛欲驅戰則平日苦疏操練於是擇尤參撤力圖更始就原有水師之中先抽練游擊一隊駐紮嘉興居中策應繼添募游擊三隊分布嘉興湖州杭防另添練水師一小隊均於上年十二月本年正月成軍一切營制仿照部頒巡防隊章程辦理食貴兵艱時異勢急舊營之餉酌量加增俟游擊各營訓練精熟擇要扼紮梭巡隨時換防調操即將舊營酌度裁汰以免虛糜此添兵增餉情形也添兵應配船隊暫租民船應用務擇快利輕便統俟造成更換去臘三公司輪船在蘇境被劫後行旅戒嚴人心驚擾保護航路不容稍疏當經臣電商兩江督臣端方江蘇撫臣陳啟泰江浙兩省各先在滬價租商輪拖帶兵船無分晝夜往來梭巡浙省共租小輪十艘並在南洋船塢定造淺水兵輪四艘計至五月陸續造成轉瞬絲市貿易繁盛商賈輻輳為浙省出產大宗民生命脈所繫尤宜防意外而保商業一俟定造四輪告成即將商輪退租以節經費艦隊各軍應配利器先後在江南製造局購辦七密星九口徑快鎗一千桿隨配子彈五十萬顆上海洋行德國七密星九口徑快鎗二千桿隨配子彈二十

萬顆又訂購二生的七密里口徑克魯蘇士乃得快礮四尊子彈二千顆愛司色爾得輕機快礮四尊子彈二萬顆目下鎗械均已運浙礮訂五月間運到此又添置輪船礮械情形也臣查太湖遼闊毗連兩省島匪利我事權之分轉得潛藏之密荷蒙 俞允江蘇藩司瑞澂督辦浙西各軍悉歸節制調遣洵能不分畛域兩省定造淡水兵輪各四艘即歸瑞澂一手經理仿照各國海軍章制編為聯隊無事則會操巡弋有警則協力剿防冀臻劃一整齊通力合作似於兩省大局均有裨益至徵練陸軍之外各省舊營應照部頒巡防隊章程次第編齊臣移任江西在即各營亦因事調遣出防應如何裁減歸併之處未能即時撤回編定自當移交接任撫臣照章妥辦下陸軍部知之○壬申軍機大臣奉 旨徐世昌朱家寶電奏悉俄皇獎給訥陵常陸各寶星著准其收受○軍機大臣奉 旨軍機大臣奏浙江鹽運使王慶平具呈聲明原籍應否迴避據情代奏等語王慶平著毋庸迴避原籍○法部奏審明革員瑞洵報銷尙無侵挪限內贓款全繳應否仍行發往軍臺得 旨瑞洵著仍發往軍臺効力贖罪餘依議○癸酉以徐紹楨署江北提督○乙亥予游學畢業生章宗元等進士舉人出身有差○丙子外務部奏光緒三十一年中日兩國全權大臣會議東三省事宜條約第十款內載中國政府允許設一中日木植公司在鴨綠江右岸地方採伐木植至該地段歲狹年限多寡暨公司如何設立並一切合辦章程應另訂詳辦合同總期

中日股東利權均攤等語當經奏奉 諭旨允准在案三十二年七月日本使臣林權助擬訂鴨綠江木

植公司要目函送臣部並請定期會商當經臣部以木植一項關係商民生計應由奉天將軍北洋大臣

詳查情形再行核議照覆該使令赴津與北洋大臣就近晤商旋准奉天將軍趙爾巽派員前往該地沿

岸詳勘稟覆據稱東邊木植鴨綠兩江並稱繁茂鴨綠江產地較寬而木質比渾江為遜近水之區所產綠

林頻年斫伐殆盡至鴨綠一帶自十八溝至二十四溝方圓約五百里距江較遠斧斤罕到存蓄甚多若

劃作公司界限可供二十年採伐渾江與鴨綠兩事不在合辦之列詎日本林使於三十三年三月

到津與臣世凱會議數次即堅執鴨綠江右岸指該地全段言之連渾江流域均包在內地城既廣年限尤

多經臣世凱將所送提案十一條逐條辨駁迄未就範未幾林使回國代理使臣阿部守太郎送交臣部

節略將前擬提案略加改易於地段一層仍包括鴨綠兩江流域及支流在內臣那桐復與迭次會議惟

拒定量擴鴨綠江木界而不牽及渾江之宗旨竭力與爭擬改由帽兒山至二十四道溝沿江木植歸公司

採伐以距江六十華里為界以為最後辦法該代使則仍謂鴨綠流域須擇帽兒山以上渾江流域須擇

通化以上均以分嶺為界惟白頭山一帶自山頂五十里以內概不採伐此係本國政府深願公司從速

成立竭誠擬定讓步已到極處彼此相持幾至無可再議迨十一月間林使回任後復來照申明前議臣

等仍與割辦渾江流域通化以內不能混爲鴨江右岸之地約內既指明爲岸則地段之廣狹自應以距岸最近之江心起算該使雖無可駁覆而卒未照允本年二月奉天巡撫唐紹儀奉 命來京臣等卽偕同該撫與林使接商前案以此事懸宕經年屢議屢阻所不能就緒者其關鍵祇在該使欲將渾江包括在內若徑行照允則該處木把生業全失必於地方市面大受影響且渾江原設之江浙鐵路木植公司曾係奏准之案尤不能禁其採買計惟有定明渾江森林仍歸中國商業木把採伐所需款項向公司貸借所採木料歸公司照市價收買庶公司不至壟斷而商業仍得保全遂由該撫另擬提案與林使所交對案按條磋商隨時由臣等悉心參校復與爭持至月餘之久始行定議所訂章程大綱十三條名爲中日合辦鴨綠江採木公司其地段仍照前議劃定鴨綠江右岸自帽兒山起至二十四道溝止距江面幹流六十里爲界中日兩國各出資本一百五十萬元以二十五年爲限該公司總局設在安東以東邊道爲督辦中日兩國各派理事長一員公司所有進款以餘利百分之五報効中國國家應納木料稅項可商准地方官照章酌減俟此大綱議定後卽由奉天督撫及日本駐奉總領事派員商訂詳細章程俟章程定後限三箇月內卽行開辦該公司開辦後日本政府允將現在鴨綠江之木材廠一概撤去以上各節均經彼此商允無異因林使回國期迫勢難再延由臣那桐會同該使將此項章程互換簽字蓋印以

昭信守伏查鴨潭兩江一帶林木薪鬱確係絕大利源自日俄戰事起兩國兵民恣意斫伐日本軍隊復設立廠所抽收軍用材料木把生計半爲所奪上年三四月間日員小島派人沿江攔截木筏幾釀事端中日協約既議定兩國合辦鴨綠江右岸木植自應從速訂立章程藉資補救奈日本使臣以鴨江右岸牽引渾江始終固執毫不鬆動等亦知於地方生業關係匪輕未肯稍事遷就磋商至今始克就緒綜核章程所載地段年限暨經理之事權稅項之輸入較之日使原送節略均相去懸殊是於利益均攤之中尙不失保守主權之義得旨如所議行○會議政務處奏本年三月初三日軍機處鈔交雲貴總督錫良奏實行禁煙擬請改縮期限以圖進步一摺奉 硃批會議政務處議奏欽此臣等覆覈原奏稱該督到任後飭屬禁煙已有成效惟省界邊關人數眾多辦理未能一律訪諸輿論皆以限期過寬反形棘手擬請趁此人心激發之日改縮期限凡吸煙之人種煙之戶均限至本年年底禁戒淨盡其舊商土棧亦准行銷至本年年底截止自三十五年正月初一日起通國不准再有吸煙販煙種煙之人等語竊維朝廷注意禁煙屢頒 嚴諭於文武官吏尤不利予寬容至定立期限所以寬至十年者以地方之腴瘠不同國民之程度亦與不忍操之過感以示體恤之仁然奏定章程內第一條第八條所載本極明晰如果禁絕在十年以內地方官得蒙 恩獎是從速禁戒之意臣民當共知遵守大抵立法之仁在 朝

廷而行法之實在疆吏卽論減種一端屢經奏飭各省查明產煙地畝減種實數列表咨部乃一年以來僅有數省奏報中國幅員廣博產煙之區所在多有若不清查實減豈能盡絕根株應請 飭下各省將軍督撫臣遵照政務處奏定章程嚴飭所屬府廳州縣親身履勘於栽種習慣之區召集父老曉之以申儆並詳察土性所宜責其改種糧食等物要在勸懲互用非專恃禁令之嚴也至清查之後編造冊籍通詳該管上司由各督撫每歲派員抽查分定州縣功過一面列表咨部以備稽核現在洋藥進口業已訂明分年減運允先試行三年視中國栽種吸食實行減少限滿再爲推減此事關係甚鉅如各省禁止確有成效屆時再當察酌情形籌商辦法滇省既稱踴躍禁煙自不必拘定十年之限且禁種禁吸漸次淨絕則外省土藥之輸入亦自無地銷售此在該督一力堅持以收令行禁止之效得 旨如所議行○戊寅都察院左都御史陸寶忠因病奏請開缺允之以張英麟爲都察院左都御史○諭吏部吏事勢乃宣著以四品京堂候補在憲政編查館行走○民政部奏二月二十日內閣鈔奉 上諭據外務部奏籌議禁煙與各國商定辦法暨另籌抵補藥稅各摺片著民政部度支部迅卽會訂稽核章程嚴定考成請旨頒行一面責成各督撫按照政務處奏定成案督飭所屬切實舉行並體察該省情形將減種減食實在辦法先行奏聞所有按年減少數目每屆年終彙奏一次其藥稅指抵各款由度支部另行籌補以備應

付事關國勢強弱民命壽夭著內外臣工協力通籌認真辦理無論如何爲難必期依限斷絕毋得稍涉因循致干重咎餘依議欽此竊維禁煙之舉所以掃除沉痾振起疲羸爲自強第一要政迭經 嚴旨申明尅期減盡頒行禁令至再三寶已洪纖備舉效復欽奉 諭旨飭令 臣部會訂稽核章程嚴定考成仰見 軫念民生實事求是之至意 臣等遵卽往復會商悉心酌奪竊以爲禁煙之有無成效視稽查之疎密爲衡奉行之是否實力視功令之寬嚴爲斷欲使杜絕弊端力戒粉飾自非詳訂禁煙稽核章程嚴定考成辦法不可惟是禁煙頭緒至爲繁瑣舉凡稽核栽種吸食販賣等事在在均關緊要而入手辦法尤以清查種煙畝數分期減種爲正本清源之策其他如調查吸食人數封禁煙館限制販賣辦法亦當亟爲籌措次第施行以上諸端或關於地畝課稅事項或屬於警察衛生範圍 臣等職司所在自應切實籌畫擬訂禁煙稽核章程請 旨飭下各省督撫按照 臣部奏定章程詳細分別咨報 臣部以資查核其能否縮短期限力圖進步或酌量變通之處應由各該督撫查看情形辦理至嚴定考成一節卽以稽核之是否嚴密奉行之是否切實定其考成之高下惟所請議敘議處各條事關吏部本軍所定不過大綱其詳細專條自應由吏部查例酌擬奏定遵行以昭畫一其有身爲表率沾染嗜好者應由禁煙大臣核議查辦施行得 旨如所議行○己卯調達壽爲理藩部左侍郎以寶熙爲學部右侍郎○以馬亮爲鎮

黃旗漢軍都統董帥爲烏里雅蘇臺將軍○端方奏籌辦學務經費短絀擬懇勸用庫款作正開銷不允○庚辰諭軍機大臣等錫良電奏悉趙金鑑督率各營轉戰三日收復四隘洵屬異常奮勇趙金鑑著先賞給靖勇巴圖魯勇號以示優異尤爲出力各將弁准其查明奏請優獎並著錫良嚴飭趙金鑑等乘勢長驅克復爛酒以期與白金柱兩路會合早奏膚功現值溽暑伊邇滇邊煙瘴素惡士卒冒暑苦戰朝廷軫念時殷特頒發痧藥平安丹各三十匣回生第一仙丹十五匣由驛發交錫良分給各路軍營以資調護○憲政編查館奏本年三月初三日民政部具奏擬訂直省巡警道官制並分課辦事細則一摺奉旨依議欽此由該部鈔錄原奏清單咨送前來原奏內稱巡警一端爲防患保安之要務非有指臂相使之用不能收整齊畫一之功各省警政雖已先後創行而編制各殊章程互異不獨精神未能統一卽形式亦復參差 朝廷銳意更新 特旨令各省增設巡警道並令 臣部詳訂細則通行各省遵卽按照釐定官制王大臣奏定外省官制內關涉警政事項並參酌學部奏定各省學務詳細官制章程擬成巡警道官制及分課細則十五條應請 飭下憲政編查館按章考核奏請頒行等語查民政之有巡警所以整齊地方納民軌物近來東西各國請求規制日益精嚴其能約束人民號爲法治國者實賴巡警職司完備呼應靈通中國幅員遼闊新政初興將各齊其民俗之宜以爲推行之準自非增設直省實缺

大員不足以專責成而速治化該部所擬巡警道官制及分課辦事細則十五條臣等詳加考核係爲統一規制整理警務起見應如所奏通行各增設巡警道一缺將所有原設巡警等局歸併辦理惟員缺首責得人而官屬必期當秩現在屢奉 明旨各部承參不准指名保授巡警道爲行政重要之官各省新設此項員缺或遇有缺出應由督撫遴保堪勝此任人員奏請 簡放或先行試署民政部亦可預保人員請 旨存記由軍機處開單一併進呈恭候 簡用原奏第二條所稱由部奏請及督撫咨送一節自應酌改以符體制又第八至第十條警務公所分設四課課長秩視五品副課長秩視六品等語查各部分司俱以郎中領職各省提學司提法司所屬各課課長亦均以五品爲限警務公所既爲道屬品秩自應略降擬請改爲課長秩視六品副課長課員以次遞推俾示區別抑臣等尤有進者警政之善否與民生之休戚關係最密方今預備立憲之初舊章新律交互施行凡從事警務人員必皆融會貫通方能措之無弊是其品格行能之優劣卽地方之利病繫之各省巡警學堂今猶未能遍設此項人才尤稱缺乏自巡警道以下及巡官警長若就舊有之弁勇丁役敷衍改編程度不齊而操之已感恐保安不足而釀亂勢多原奏祇稱用畢業之巡警學生而未注重學堂辦法自應由民政部奏定章程通飭各省先從辦理巡警學堂入手務以造就此項人才足用而止故臣等考核原奏清單各條酌爲改併益以第十一條

之巡警學堂一項以期養成警務人員又上年釐訂外省官制原奏聲明各省增設巡警勸業兩道應將
守巡各道一律裁撤等語今若應裁者尚未盡裁而應設者先行編設各省財力拮据亦恐有所不支應
請飭下各省督撫迅將應裁守巡各道妥議裁撤一面增設巡警道缺認真整頓庶節虛糜而重要政
得旨如所議行○辛巳以前署貴州布政使黃元善鄉舉事逢賞加內閣學士銜○岑春煊奏湘潭縣
株洲地方現當路礦之衝請移設同知巡檢以資治理下部議奏○壬午命醇親王載灃詣 堤生寺祈
雨○錫良電致軍機處承准電寄二十五日 諭旨仰蒙 訓示方略以中路進取匪易飭山東西兩路
夾攻等因 聖謨宏遠明鑒萬里欽佩莫名查中路軍情昨據增厚電稱該統領王正雅因知西路已長
驅進兵該匪必潛分精銳往救亟應乘此力拔老范寨爰親率十餘騎馳赴前敵指揮分三路進攻以一
路從上游渡河沿山擊賊繞後山抄出一路以正兵直進並約白金桂派營分路策應匪仍死守經該統
領躬冒矢石而前各營勇氣百倍匪遂不支當將老范寨克復匪由右山斜徑退竄三十五散離泥巴黑
地方據險抗拒現仍約會東路兜剿等情是中路一軍近日亦頗稱得手理合先行擬要電陳謹乞代奏
又電竊中路前敵收復老范寨昨已另陳在案茲據西路道金鑑電稱自田房大捷後審察地勢以田房
爛酒之間小龍膊地方最為險要二十五日率隊進取沿途見有傷斃賊屍並據探詢匪首黃和順於田

房之戰係受傷而逸我軍到小龍勝已無匪蹤尙遺有宰食牲畜當卽於二十六日進薄場酒該匪未致接仗先已狂奔卽又跟蹤追剿是晚進紮曼我地方距河口約僅三十里擬卽直攻河口等情錫良查該匪在田房既受大創且中東兩路方緊逼猛攻機勢萬不可失惟匪情狡詭偏師直抵仍飭加意審慎一面約會中東兩路之師至中東兩路現已將併爲一路據南防副營務處護開化府知府陳先沅報稱二十四日中路進攻泥巴黑踞匪白金柱派軍接應該府亦自古林督率保衛隊營官金殿舉周順等助戰經分頭痛擊是日立將泥巴黑賊壘攻克現擬會攻第二十九散羅車河地踞匪倘將車河地收復距南溪不過十五六里等情旋據白金柱報同前情所部督帶官袁家斌生獲悍匪一名快鎗一桿營官馬發林奪獲首級二顆快鎗一桿幫統白映庚亦奪取該匪號衣均經驗明給賞現以一路會攻車河路另分兩路進攻大小南溪等情惟中路如何接戰詳情尙未據該統領王正雅報到自因戰事方殷且地不通電之處理合先行電聞以紓 廑注謹乞代奏 上諭軍機大臣等錫良以念六七兩日電奏悉趙金鑑由西路收復河口王正雅由中路攻克老范寨將士不避艱險奮勇圖功深堪嘉慰現在匪蹤歸路截斷業入重圍著錫良督飭各路將領併力合剿杜其竄逸之路務將餘匪悉數殄除以竟全功而肅懲賞倘有潛逸首要亦須懸賞購緝按名搜捕免致死灰復燃所有被匪擄害之居民商旅由地方官分別查驗

妥爲撫恤勿任失所○軍機大臣奉 旨趙爾巽電奏停鑄銅元實有礙難等情著度支部速議具奏○
開缺都察院左都御史陸寶忠卒賜卹如例賞其子廩工商部主事大坊以員外郎用尋予諡文慎○癸
未錫良電致軍機處竊本日拜發收復煙酒電奏後承准電寄二十六日 諭旨蒙 恩先賞趙金鑑勇
號飭令查明尤爲出力將弁奏請優獎並以前敵將士冒暑苦戰殲鄉頒賞藥品 聖恩優渥至此凡屬
身隸行間敢不激發天良爭圖自効以錫良待罪疆圉尤宜感奮謹卽恭錄傳示前敵並叩頌代謝 天
恩查尤爲出力人員迭經錫良遵 旨隨案隨時存記惟因此次變起倉猝匪蹤飄忽上犯亟飭諸統將
等各舉所知勇將分起募兵應敵邊防民氣夙強授械卽能擊賊本爲滇省特色甫克成軍隨督接仗電
文呈報僅具姓名履歷既未齊到無從查悉底銜雖其中藉將多有夙知而一體立功未便稍偏先後現
正飛飭指查一俟到齊擬奏先行懸獎一次餘俟河口收復再懸獎奏分別予獎以作士氣而勵將來理
合電陳謹乞代奏又電前據白金柱電稱派營會攻中路老范河地踞匪一面分路運攻大小南溪業經
奏陳在案茲據電稱探悉匪在馬革寨谷拔寨馬多衣大小南溪等處據險各建礮臺爲死守計當於二
十四日夜經督帶官胡興乘夜派胡得勝營趨襲馬革寨沈正朝趨襲谷拔寨皆穿營越山潛伏而進馬
文仲等營則由竹瓦房地方以奇兵先截馬多衣等處賊潰去路該督帶自率王洪順馬世珍李國治及

保衛隊李朝雲等營直進小南溪時天尚未明各路匪黨驚覺力拒經我軍奮勇兜擊該匪再卻再前卒
乃大潰爭奔渡河復跟追痛剿計攻平礪壘八座淹斃匪黨二百餘名鎗斃一百餘名又鎗斃僞統領熊
連卿一名從該處搜有逆信僞令等件生獲悍匪二名削獲首級十六顆並奪獲旗幟鎗械馬匹多件立
將大小南溪地方一律收復等情理合電陳正譚發閱後接西路趙金鑑本日捷電據稱我軍已克復河
口地方惟電文甚略尚未得悉實在情形特先報聞以紓宸廑謹乞代奏又電頃據蒙關道增厚轉據
西路前敵趙金鑑電稱二十七日收復河口扼險立營等情除查詳細情形電奏外謹請先行代奏以慰
宸廑 上諭軍機大臣等錫良二十七日三次電奏均悉白金柱於廿四日分派各營潛襲各寨先以
奇兵截匪潰路調度深合機宜用能攻堅奪壘匪甚多立即克復大小南溪匪黨經此痛剿精悍當已
殆盡廿七日收復河口未始非得力於此役白金柱暨出力各將領著先傳旨嘉獎由錫良分別查明奏
請給獎出力弁兵由雲南藩庫撥發賞銀二萬兩解交白金柱查核分給併帶官胡興謀勇兼優連克要
隘著先賞給捷勇巴圖魯勇號以示鼓勵